

ДАГЪУСТТАН РЕСПУБЛИКАЛУЛ ДУККАВРИЛ ВА ЭЛМУЛУЛ МИНИСТЕРСТВО  
ПЕДАГОГИКАЛУЛ ЭЛМУ АХТТАР ДУЛЛАЛИССА А. А. ТАХО-ГОДИЛ ЦІАНИЙССА  
ИНСТИТУТ

**П. М. Магъдиева**

**АРУЛЧИНМУР КЛАССРАВУ  
ЛАКРАЛ ЛИТЕРАТУРА ЛАХЪХЪАВУ**

МахIачкъала

2011

## ЛУТТИРАВУ БУМУР

Хьхьичімахъ.....	3
I. Арулчинмур классраву лакрал литературалул дарс дишаврил мурадру ва масалартту.....	5
II. Халкъуннал дакінихсса творчество лахьхъаву.....	15
III. Халкъуннал эпосраціун бавхіусса лирический балайрду лахьхъаву.....	29
IV. Назмулий чивчусса произведенияртту лахьхъаву.....	35
VI. Арулчинмур классраву дайсса теориялул суаллал ялувсса даву.....	45
V. Арулчинмур классраву дуклакисса оьрчіал дакінихсса ва чичрулийнусса гьалгъа магьир баву.....	56
VII. Лакрал литературалун хас дурну, классрал ва школалул къатіув дайсса давуртту.....	73
«Бархъаллал къайдар».....	95
Гь. Саэдов. «Леххяву».....	99
С. Габиев. «Къачіуннивкъай», «Аьйб мадари».....	103
К. Закуев. «Бюхттулнинмай».....	109
А. Къапиев. «Интуристнашалсса ихтилат» («Шаэр» тіисса повестъравасса бутіа).....	114
М. Чаринов. «Лакку кіану».....	121
М.-з. Аминов. «Бархъаллахасса балай», «Ттула гьумук шагьрулий», «Аьрав Маннархъал Мусай».....	126
А. Оьмаршаев. «Хіухіалал балай».....	130
Н. Юсупов. «Кіул акъасса солдатнаясса баллада».....	133

## ХЪХЪИЧИМАХЪ

ЦІанакулсса чІумуву, лакрал дяниву, жула щалвава билаятрай кунма, оьрус маз куртІсса мархри итабавкъуну, цІакъ хьуну бур. Мунил оьрмулунсса агьамшиврия, аьркиншиврия гьалгьатІунвагу аьркин бакъар, мунийн циняв мукІруну бур.

Жула хьунмасса билаятрайсса циняв миллатирттал дянивсса дусшиву цІакъ дуллай ми кунначІан ку гьан буллай бур оьрус мазрал, амма мунил цукунчІав инсаннал цаламур ниттил маз хьама битан бучІиссар тІий бакъар.

Мюрщиминнан бикІу, дуклаки оьрчІан бикІу ниттил мазрайсса мукьул биян бувсса асарданул кІану ссалчІав къабугьаву – му щак бакъасса зад бур.

ОьрчІал лагма-ялттуса оьрмулук буруглагаву, оьрмулуя кІулмур чІяву шаву хьанай бур циняргу дарсирдай: биологиялий, математикалий, физикалий. Амма вай дарсирдай цува увсса кІанттухсса ччаврил асарду тарбия буллай бакъар, бакъар тарбия хьанай цаймигу личІи-личІисса дакІнил асарду.

Оьрму ххуйну къакІулсса инсантурал хасиятирттаву чІявумуния хавар бакъасса дуклаки оьрчІан литературалул лахьхьин байссар геройнал вивмургу, дакІниймургу, хасият-тІабиаьтгу. Вай цимурца бувчІин оьрчІан кумаг байссар лакрал литературалул школарттансса программалий лахьхьин ккаккан дурсса литературалул.

Литературалул дарсирай хьуннасса бургаву дайссар оьрчІал маз авадан баврих ва пасихІ баврих.

Литературалул дарсирдал мурад хьанай бур дуклаки оьрчІру зунттал халкъуннал дакІнихсса творчестволук, хьхьичІарасса ва цІанасса литературалул хьинми произведениярттащал дус баву, гайннул гьанусса мяьна ва художественный хасиятру лахьхьин даву, литературалул теориялук хІакъираву цанна лайкъсса куццуйсса кІулшиву дулаву.

Чјавуми школарттай лакку мазрал ва литературалул дарсру дихълахъисса учительтурал хІарачат буллай бур багъайсса кІулшиву цала ниттил мазрая бикІу, литературалия бикІу дуклаки оърчІан дулун.

Бухъурчагу му даврихунсса дахчичру чІярусса дур, цила багъайкунсса кІулшиву оърчІангу дулун хъанай дакъар.

Бакъар школарттай гъарца аьркинмунил щаллу бувсса кабинетру, методикалул пособияртту.

«Арулчинмур классраву лакрал литература лахъхъаву» тІисса давриву хІарачат бувну буссар ва классраву дарс дишайсса учительнан кумаг бан лакрал литературалул дарсру аьркинсса даражалий дишин.

## **I. АРУЛЧИНМУР КЛАССРАВУ ЛАКРАЛ ЛИТЕРАТУРАЛУЛ ДАРС ДИШАВРИЛ МУРАДРУ ВА МАСАЛАРТТУ**

Лакрал литература, предмет хIисаврай, школалий цIана ххюлчинмур классрава байбивхьуну лахьлай дур.

Литература лахьхьаврил гьанусса мурадну хьанай бур дуклаки оьрчIаву оьрмулувусса ххуймур тарбия бавуну.

МуницIун бавхIуну лакрал литературалул программалул личIи бувну бур оьрчIру тарбия баврил ва миннан за лахьхьин баврил личIи-личIисса шачIантту.

7-чинмур классраву лахьлай бур лакрал ва дагьусттаннал чичултрал ва шаэртурал произведенияртту.

Ми бивхьуну бур луттираву куннил хьирив ку, лархьхьусса темарду хIисавравун ларсун. Курс байбихьлай бур халкьуннал дакIнихсса творчестволул произведенияртту лахьхьаврийну. Гания гихунмай хронологиялул низамрай литературалул личIи-личIисса произведениярттугу лахьлай бур.

Дарсру дишаврил гьанусса масаларттуну хьанай бур оьрчIан цивппа художественный произведенияртту, литературалул тарих лахьхьин баву ва миннул гьанулий оьрчIаву адав, инсап, оьрмулувусса ххуймур тарбия баву.

Литература лахьхьаврийну вай масалартту щаллу баншиврул, учительнан хьуннасса ургаву дан багьайссар лахьлахьисса произведениялул гьанусса мяьна дурчIин даврих. Хьуннасса агьамшиву дуссар личIи-личIисса дарс дишаврил кьяйдарду ишла дуллай, произведениялул хьирив лаяврил яла асар хьунми ххуллурду лякьаврилгу.

Учительнан аьркинссар ялун личин дуллан лахьлахьисса художественный произведениялуву тарбия аврин захIматрал цуксса агьамшиву дуссарив. ХIарачат бан аьркинссар чIалачIи бан чичул захIмат ххирасса инсаннал чулухуннайсса ургаву цукунсса дуссарив, оьрмулуву захIмат байнал кьимат цукун бищайссарив.

Литературалул дарсирдай хъуннасса бургаву дайссар оърчІал маз авадан баврих ва пасихІ баврих. Му даву шаллу шаву мурадрай, циняв классиртгаву оърчІал цала опытрайн чул бивщуну, школалун, обществалун мюнпат бусса давривух гъуртту шавриясса, улча лахъхъаврин ва м.ц. давурттан хас дурсса темардаясса сочиненияртту, изложенияртту чичайссар.

Арулчинмур классрансса литературалул программалийну ккаккан дурну дуссар произведениярдал шанна сияхІ:

1. Чарабакъа циняв дуклаки оърчІал лахъхъинсса ва ххал бигъинсса произведенияртту;
2. Классраву лахълахъисса произведениярдал темардачІан гъансса темарду дусса, ялун букин ххи бувсса произведениярду;
3. Классрал къатІув букинсса произведенияртту – вай произведенияртту учительнал классрал къатІувсса буквавил дарсирдай, букултрал конференциярдай ххал бигъайссар. Ва сияхІ цІуну бувксса луттирдайну авадан дангу бучІиссар.

Литературалул дарсру бучІиссар дахІин классрал къатІув дайсса давуртташал. Ми хъанахъиссар личІи-личІисса литературалул кружокру, луттирдайн бувсса диспутру, литературалул вечерду, музейравун театрданул постановкардайн, кинорайн гъаву ва цала улча лахъхъаву.

Литературалул дарсирдаясса тІалавшинна хъуннасса духъукун, учитель за кІулну, усттарну, ттизаманнул методика ишла дуллай зун аьркинссар.

Дарс дишаврил устталугърал гъанусса щаращину цуппа оьрму, школалай дарс дишаврил практика хъанахъиссар. Гъарца къини школалай дарсру дихълахъаврил учительнан цанма къулайми ххуллурду лахъхъин кумаг байссар.

Учительнахъ хъунмасса бияла буссар оърчІаву ххуйми асарду тарбия баврил.

Оьрму ххуйну кьакIулсса, инсантурал хасиятирттаву чIявумуния хавар бакьасса дуклаки оьрчIан литературалул лахьхьин байссар геройнал вивмургу, хасият-табиатту.

Вай цимурца бувчIин оьрчIан кумаг байссар лакрал литературалул программалий лахьхьин ккаккан бувсса произведениярдал – учительнал каялувшиврийну.

Литературалул дарсирдай хьуннасса бургаву дайссар оьрчIал маз авадан ва пасихI баврих, дарсирдал мурадну хьанахьиссар дуклаки оьрчIру халкьуннал дакIнихсса творчестволушал, хьхьичIвасса ва цIанасса литературалул хьинми произведенияртташал дус баву, гайннул гьанусса мяьна ва художественный хасиятру лахьхьин даву, литературалул теориялул хIакьираву цанна лайкьсса куццуйсса кIулшиву дулаву.

ОьрчIру дуккин бавриву ва тарбия бавриву лакрал литературалул цинма хасьсса бияла барт бигьиншиврул, чара бакьа аьркинссар дуккавил план, программа, мунил хьхьичI бивхьусса масаларттаха лавхьхьусса бикIан. Му бакьассагу лакрал литература дишайсса учительнахьхьун булун аьркинссар литературалул ва педагогикалул элмурдай гьану бивзун, учительтурал хьхьичIунсса опытрайн чул бивщуну сакин бувсса методикалул пособие.

ЧIявуми школарттай лакку мазрал ва литературалул дарсру дихьлахьисса учительтурал хIарачат буллай бур багьайсса кIулшиву ниттил мазрая бикIу, литературалия бикIу дуклаки оьрчIан дулун, бухьурчагу школалий вай дарсру лахьхьаврил даража, учин бюхьанссар, уттигу ялавайну бур куну.

Ванин саварттугу дур: школарттай биялну луттирду бакьашиву, дарс дишин бюхьайсса кIулшиву ва хIадуршинна дусса учительтал бакьашиву, цаппарасса каялувшиву дуллалиминнал ва халкьуннал образованиелул зузалтрал ниттил мазрал ва литературалул дарсирдан

агъамшиву къадуллалаву, учительтуран кумагрансса лакрал литературалул методикалул пособияртту бакъашиву.

Литература лахъхъаврил даву лайкъсса даражалий дишавриву ца хъинну агъамсса кІану бугълагъиссар методикалул.

Методикалул мурад, дарс дишаврил яла къулаймур ххуллу ахтгар бувну, лакрал литературалул дарсру дихълахъисса учительнан кумаг бавур.

Арулчинмур классраву литература лахъхъаврийну оърчІру кІулшайссар чІявусса произведениярттащал, миннул оърчІан тІайлану пикри буллан лахъхъин байссар ва гъалгъа магъир байссар. Учительнал оърчІан кумаг байссар цала бувккумур бувчІин ва бувчІумуниясса цала пикри бусан. Му бакъассагу учительнал хъхъичІ бавцІсса масалану хъанахъиссар оърчІан лахълахъисса произведениярттацІун дархІуну литературалул теориялуясса кІулшиву дулаву.

БачІва дурккусса текстрал мурад бусаврийну ва гъалгъа магъир баврил ялувсса давурттайну учительнал цала хъхъичІ бавцІсса масалартту щаллу къабантІиссар.

Лажълахъисса произведениялул оърчІан асар биян бан аьркинссар гъарца чулуха, гъалгъа магъир баву бакъа, авадан дан аьркинссар миннал мукъурттил луртан.

### **1. Литературалул произведение лахъхъайни мунил ялув дайсса давурттал низам**

Гъарца художественный произведение – му цІусса дуниялли, цІусса оьрмур. ОьрчІан багълагъиссар га дурчІин лахъхъин, цанчирча га цІусса асардал, цІусса хъунабакъавурттал дуниял дунутІий. Укун бухъувкун, учительнал бурж гъарца дуклаки оьрчІал чичушалсса хъунабакъаву яргсса, авадансса, дакІний личІансса хъун давур.

Произведение лахълай байбишиннинсса хъхъичІмукъуйну учительнал оьрчІру га бувчІаврин хІадур байссар ва ганих гъира бутайссар.



Вступительный мукьул (хьхьичІмукьул) хьун-чІивишиву, ганил методика дикІайсса произведениялул хасиятрах, оьрчІал оьрмулук бурувгуссар.

Учительнал хьхьичІмахъ бикІан аьркинссар кутІасса, оьрчІан ххуй бизансса ва гайннан дакІний личІансса. ОьрчІан учительнал бувсмур дакІний битан кумаг бантІиссар учительнал доскалий чирчусса цала бувккумунил пландалул, чичултрал, произведениярдал геройтурал цІардал, ми чивчусса чІун чІалачІи даврил, цІуну лахьлахьисса мукьурттил.

Дарсирай гьартану ишла дуллан аьркинссар чІалачІи пособияртту, художниктурал дурсса, лахьлахьисса произведениялул темардачІан гьансса куннасса суратру. Масала, М. МахІаммадовлул «Ккуллалул цІалцІи» тІисса назму лахьлан хьхьичІ учительнал оьрчІру кІул байссар буттал кІанттул цІанийсса дяьвилул чІумалсса халкъуннал оьрмулушал. Бусайссар дяьвилува жула чулуха 20 миллион инсантурал ливтІушиву, жула билаятрайсса гьарца шагьрулий ва шяраву дяьвилий жанну дуллусса талаталтран хасьсса гьайкаллу дацІан дурну душиву. Бусайссар мукунма шяравату жула Ватан дуруччин лавгун, дяьвилул майданнайва ливчІминная, шаппай дяьвилий ккуллардал щавурду дурну бувкІминная. Ва «Ккуллалул цІалцІи» тІисса назмулувугу бувсун бушиву кІия дусная – ца дяьвилийва ливчІсса, цагу ккуллалул цІалцІушал аьрщарай яхьанахьисса. Ва паракьатну итлай акьар кІира кьювулул – ца дуснацІа шаврил, цагу цала базурдавусса ккуллалул цІалцІул.

Укунсса журалул бусавуртту, темардах бурувгун, дан бучІиссар личІи-личІисса назмурду, хаварду, поэмарду лахьлан хьхьичІ.

## **2. Учительнал ва оьрчІал букваву**

Программалый лахьхьин ккаккан бувсса цинявгу произведенияртту оьрчІал бувккуну бикІан аьркинссар.

Хьирив лаллан бивкІукун чІалай бур оьрчІал цайнува цала бувккусса произведенияртту, чІявуну, миннан щаллуну бувчІуну кьабикІайшиву,

класраву пасихІну бувккусса произведенияртту тІурча, оърчІан ххуйну бувчІайшиву, мунияту учительнан хІарачат бан аъркинссар лахьлахьисса произведение бюхъавай класраву буккин, агар произведение хъунмасса бухьурча, ганил гъануми бутІри. Буккаву дайссар цала учительнал, хьхьичІва буккин хІадур бувсса оърчІру бухьурча, бучІиссар миннахь буккин бангу. ЧІявуну учительтурал цІусса произведениялул бутІри оърчІахь цахьва буккин буллан икІан, мукунсса буккаврия я вичІи дирхьунан, я цанма буклакиманан хайр бакъассар.

ТІайлану, пасихІну буккавил бюхьу оърчІаву ялавайми классирттаву сакин хьуну бикІан аъркинссар. Агарда арулчинмур класраву дуклакисса оърчІаща цила багъайкун буккаву дан бюхълай акъахьурча, дакІний битан аъркинссар 5-10 минутрай, нюжмардий цалкІила дарсирай буккин аврийну ганан кумаг бан къашайшиву, оърчІал буккавил ялув бацІан аъркинссар шаппами, му чІявусса буклай икІан аъркинссар цайнува цувагу. Лахьлахьисса произведение пасихІну буккин, буклай унува вив итабакьин бюхъаврил хъуннасса агъамшиву дуссар произведениялул гъанусса мяъна дурчІаврин ва ганил хьирив лаяврин. Арулчинмур класраву дуклакисса оърчІан кІулну бикІан аъркинссар предложениялувусса аъркинсса махь чІунийну личІи бан, пасихІну буккин, буккаву произведениялул журалух, хасиятрах бурувгун дан, ми аглан хьун аъркинсса кІанай къавхьуну, махьру бувчІинну къабуклай, цаппара махьру гайминнаяр лахьну, анаварну буклакини – гай тІайлабацІан буллан аъркинссар. ПасихІну буккин лахьхьин баврил ялувсса даву дайссар анализрайн чул бивщуну, ганицІун дархІуну.

### **3. Мукъурттищалсса даву**

Арулчинмур класраву оърчІал лахьхьайсса личІи-личІисса журалул произведенияртту мазрал чулуха авадансса бур. Вай произведениярттайн чул бивщуну, учительнангу багълай бур дуклаки оърчІал маз магьир бан,

мукъурттил луртан авадан дан. Муниятту, чІалачІисса зат бур мукъурттил ялувсса даву учительнан гъарцагу дарсирай дуллан аьркиншиву.

Маз миллатрал авадашивуну хъанай бур. Мазрал ур инсан щаллу увну, му бур инсаннал кІунттихъсса агъанмур ярагъ. Ванин бувну, школалий бикІу, кулпатраву бикІу мазрал, ихтилатрал чулухунмай хъуннасса аякъа дикІан аьркинни.

Лавай кІицІ лавгсса куццуй, литературалул дарс дишайсса учительнал хъхъичІ бавцІсса агъамсса масалану хъанай бур оьрчІан цила багъайкун тІайлану, пасихІну, бувчІинну гъалгъа бан лахъхъин баву, гайннал пикри куртІ баву, мукъурттил луртан авадан даву. Ва бакъассагу, ниттил маз хъанай бур цинявгу дарсеру дишин аьркинсса ярагъну. Мунияттур оьрчІал гъалгъа магъир баврил ишираха мудан зун аьркинсса. Амма ва чулухунмайсса ургъил жула учительтурал хъинну чансса бур. ОьрчІал гъалгъа магъир бансса, мукъурттил луртан авадан дансса давуртту диялсса дакъар. Даймургу – кІива ягу шанма махъ дакІних бувчІин баврийну гъашиву дай.

Гъалгъа магъир баврил ишираву дуссар личІи-личІисса давуртту: мукъурттищалсса даву ва кунницІун ку бавхІусса махъру бусса гъалгъалушталсса даву ва мукунма цаймигу.

Лакрал литературалул дарсирай мукъурттищалсса даву дайссар личІи-личІину:

- 1) Мукъурттил луртан авадан даву, яни оьрчІан хъхъичІава къакІулну бивкІсса махъру лахъхъаву, мукъурттил цІусса мяьнарду кІул даву;
- 2) ХъхъичІва кІулсса мукъурттил мяьнарду куртІну кІул даву, синонимирттал ва омонимирттал дянивсса тапаватшиву кІул даву;
- 3) Буллалисса ихтилатраву махъ ишла баву;
- 4) Литературный мазраву бакъасса цала лугъатрай ишла буллалисса махъру гъалгъалува буккан баву.

ОърчІал мукъурттил луртан авадан дуллалисса щаращивну хъанахъиссар художественный произведениярду. Произведениялул анализ дуллалисса чІумал, учительнал аьркинссар оьрчІру кІул бан литературалул терминнащал. Агарда терминну оьрчІан къакІулну бухъурча, ганил анализ, мяьна, мурад бувчІин захІматссар.

Цалчин учительнал оьрчІру литературалул терминнащал кІул байссар. Ва даву дайни оьрчІащал учительнал геройнал сипат ккаккан дан чичул ишла дурсса къяйдарду ххал дигъайссар:

- а) геройнан цанма хасъсса ихтилат, маз ккаккан баву;
- б) авторнал цала чулухасса пикри бусаву;
- в) геройнал сурат шаллу даву;
- г) лащан баву ишла даву;
- д) геройнал цаява цала буллалисса ихтилатрайну;
- е) тІабиаьт ккаккан даврийну.

Ва даву дурну махъ, учительнал бучІиссар лахълахъисса произведениялул мазрал анализ дан, ккаккан бан мазрал цукунсса кІану бугълай буссарив геройнал сурат ккаккан давриву.

Ва даву дурну махъ, учительнал бучІиссар лахълахъисса произведениялул мазрал анализ дан, ккаккан бан мазрал цукунсса кІану бугълай буссарив геройнал сурат ккаккан давриву.

Дарсирайн хІадур хъанахъийни учительнал личІи байссар словарьданий чичинсса махъру. Масала, «Хан Муртазааьли» тІисса лахъи балайлуву хъунабакълай бур захІматсса махъру: жазаирду, байрахъру, шагъ-къирман, симирдарал нину, тавруз, къизил баш, гада. Бюхъайссар оьрчІан кІай мукъурттивасса махъру кІулну бикІангу, бухъурчагу махъру бувчІин бувну, кІайннун синонимру лякъин бучІиссар.

Произведениялуву махъру, миннущалсса даву мунил гъанусса мяьналуцІун дархІуну дур. Махъру биялну ва куртІну бувчІин баврин кумаг байссар текстравусса предложениярттал, цанчирча махъру

куннишал ку бавхIусса текстравур миннул зунххими ва кутIами мяънарду  
цила багъайсса куццуй аьч шайсса.

Методикалуву махъру бувчIин баврил жура-журасса къяйдарду дур:  
суратрайну, мукъурттийну, антонимирттал, синонимирттал кумаграйну.

Синонимру (гъансса мяънарду дусса махъру) цачIу бивхъуну бувчIин  
баву хъанахъиссар яла чIяруну, сайки гъарца чIумал ишла дан бюхъайсса  
къяйдану. ЦIусса мукъуцIун гъансса мяъна дусса махъру ляхълай оьрчIал  
ганил мяъна кIул дайссар. Масала, сумала хъу – ттирхIусса хъу, васият –  
аманат, ливас – лаххия, лажин – симан, сичча – нетIа, буллугъшиву –  
аваданшиву, ахIвал бушиву, питна – дяъви, къалмакъал, талатаву – бияву.

Синонимру гъансса мяънарду дусса махъру бунугу, гайннул дяниву  
личIишиву дуссар. Ванин бувну, учительнал мурад бикIан аьркинссар,  
мюрш ивкIун, мукъурттил мяънардал личIишивуртту чIалачIи дансса.

Антонимру – куннин ку къаршисса мяъна дусса махърур. Гай ишла  
байссар гъалгъалуву къаршисса зад ккаккан дан:

Масала,

Ссут аьтIун диркIунни,  
Баргъ хъян бивкIунни,  
ЧIапIимур бат хъунни,  
Аьвну лавгунни.

Увччучунан ккашилчув къакIулссар.

Къадарну яшаяр виричуну ивкIуну хъинссар.

Антонимирттащалсса давривух оьрчIру гъира буну хIала буххайссар.  
БучIиссар ми антонимру бусса предложениартту сакин дуллали бангу.

Гъалгъа магъир бавриву хъунмасса кIану бугълагъиссар  
фразеологизмардал учаларттал, лашан бавурттал, чIяру мяъна дусса  
мукъурттил ва омонимирттал. Вай кIицI лавгсса маз пасихI бай махъру  
калимартту оьрчIан художественный произведениярттаву мудангу хъуна

дакълантІиссар, мунияту вай мукъурттищал цила багъайкунсса даву дачин дан аьркинссар.

Гъалгъа магъир бан, кунния ку буцан бан къашайсса мукъурттийн фразеологизмарду учайссар. Масала, арцул кару, неьматрал урцІи, ненттабакІ тІивтІусса, бакІ магъулун щусса ва мукунма цаймигу. Шивунма буххайссар учаларду ва бусаларду.

Мунихлуну художественный текстирдаву хьунадакъайсса калимарду (фразеологизмарду) дурчІин дан аьркинссар гайннул анализ дурну. Давурттал дуссар личІи-личІисса жуларду. Масала, гай лув кІицІ ларгсса калимарттал мяьна дурчІин дара: акъа чара бакъу, лялух мухІлу дахІин, дакІ мяш хьунну.

Лув кІицІ ларгсса калимарттан синонимру лякъин:

ДакІнил хІалимшиву –  
 Ччурччу дикІуйн цІу бичаву –  
 Лякъа дан –  
 БутІа бакъа дустал –  
 Бушкъаправа уккан –

Лув кІицІ ларгсса калимарттащал предложениярду сакин дара:

*Бюрххул дакІ, хІакъсса зат, лажин кІяласса, ненттабакІ тІивтІусса, оьрмулул уччин, багъа бакъасса.*

ОьрчІал маз магъир бавриву хьуннасса агъамшиву дуссар учаларттал ва бусалартталгу. Учаларттал маз пасихІ байссар, пикри куртІ байссар, байсса ихтилат кутІану, аьщуйн щуну буллали шайссар.

## II. ХАЛКЪУННАЛ ДАКІНИХССА ТВОРЧЕСТВО ЛАХЪХЪАВУ

Арулчинмур классраву лакрал литература лахъхъаву дайдишайссар лахъи балайрдая. Вай бур хъхъичІавасса халкъуннал оърмулуву, тарихраву хъанай бивкІмур чІалачІи буллалисса, оърмулул иширттацІун бавхІусса балайрдугу. Лахъи балайрдащал оърчІру кІул хъуну бивкІссар ряххулчинмур классравугу, бухъурчагу цІунилгу оърчІащал тикрал байссар лахъи балайрдая кІулмур. Бусайссар оърчІахъ чичрулийнусса литература хІасул хъуннин лакрал халкъуннал цала пикри, багъу-бизулул чулухунмайсса, лагма-ялттумунихсса бургаву ккаккан дурну душиву дакІнихсса творчестволуву. Бусайссар дакІнихсса творчестволувугу хъунмасса кІану бугълай бушиву балайрдал. Балайрдавасса чІявумий бушиву мукунма оърмулуву хъанай бивкІсса личІи-личІисса иширттан хас бувну ляхъан бувсса лахъи балайрдугу.

Дуклаки оърчІру кІул бан аьркинссар хъхъичІазаманнул оърмулул сурат хъхъичІ дацІан дуллалисса фольклорданул произведениярдал агъамшиврущал ва ми произведениярдан оьруснал ва цайми миллатирттал критиктурал бивщусса кьиматращал.

Литературалул критик Н. Капиева дагъусттаннал халкъуннал дакІнихсса творчестволул аваданшиврия ва мунил личІи-личІисса жанрардая укун чичлай бур: «Ттуршрахъул шиннардил мутгалий хІасул хъанай диркІсса дакІнихсса творчестволувун бухлай бур циняв жулардал балайрдугу. ЧІявусса бур халкъуннал оърмулуву тарихраву хъанай бивкІмур аьлтту буллалисса эпический балайрдугу, хъунмасса кІану бугълай бур фольклордануву мазрал ва мурадрал чулуха бюхттулсса кьимат бищун бучІисса вирттаврахасса балладардал, лирический балайрдал, аьдатрацІун бавхІусса ва оърчІан хас бувсса балайрдал. Дагъусттаннал халкъуннал дакІнихсса творчестволул произведенияртту чІявуми кунниха ку лавхъхъусса бур. Му бувчІин бигъар, цанчирча миннал оърмулул ххулу, багъу-бизу, дин, аьдат-эбадатру чІяруми лархъхъусса диркІун тІий. Лащаву

духъурчагу, Дагъусттаннал халкъуннал дакІнихсса творчестволул дур гьарца миллатран так цанна хасъсса ляличІишиву»<sup>1</sup>.

Лакрал халкъуннал ляхъан бувсса вирттаврахасса тарихрацІун бавхІусса балайрдаву, дагъусттаннал цайми халкъуннал балайрдаву кунма, вирттаврал дурсса виричушивуртту хъинну бюхттул дурну дур, миннун халкъуннал хъунмасса кьимат бивщуну бур. Амма лакрал бур цайми миллатирттал балайрдаву бакъасса лакрал цала вирттал, цайминначІа бакъасса хІалтІухъантураятусса балайрду, оьрчІал балайрду ва хъярчъчи балайрду.

Вай жучІанма бивсса хъхъичІазаманнул произведениярттах бурувгун, лакрал литературалул дарс дихълахъисса учительтураща бюхъантІиссар дуклаки оьрчІру кІул бан хъхъичІавасса жула халкъуннал оьрмулушал.

Учительнал аьркинссар бувчІин бан оьрчІан цайми миллатирттал халкъуннал оьрму кунма, лакрал халкъуннал оьрмугу историялул лахъишиврий захІматсса бивкІшиву, гай захІматшивурттайн къарши бувккун, гайннуяр ххувшаву мурадрай талатисса виртталгу халкъуннал дянива буклай бивкІшиву. Бусан аьркинссар оьрчІахъ хъхъичІазаманная жучІанма бивмунил бувчІин буллай бушиву ччянивагу жула зунттал халкъуннал дяниву хІала-гьурттушиву цащала цалла дакъассагу, оьруснал, гуржиял ва цаймигу миллатирттал халкъуннащалгу диркІшиву. Амма мунияр махъ, мангъулнал, туркнал, ираннал чапхунчийтал дагъусттаннал халкъуннайн дяьвирдайн ххяхлай, зулмукаршиврийну цанма ччимур цІакъ буллай, шикку ялапар хъанахъисса халкъуннаща тархъаншиву зехлай, миннал сакин дурмур зия дуллай, миннавусса ххуймур бугъ дан хІарачат буллай ттуршрахъул шинну ларгссар. КІулсса зад бур, мукунсса

---

<sup>1</sup> Песни народов Дагестана. Сов. писатель, 1970. Вступительная статья Капиевой Н.



тагъарданий яхъанахъисса зунттал халкъуннал я маз, я культура хъхъичІуннай хъанай къадиркІссар.

Я чил билаятирттал чапхунчитураща, я кІанттул хан-багтураща, куртІсса мяъналул ва гужсса асардал видурцІусса дакІнихсса творчество лещан дан къабювхъуну бур. Ми халкъуннал ляхъан бувсса произведениярдал барашин дуллай бур жула зунттал халкъуннал история хъунмасса бушиврун ва миннал цала искусство ччянияцІара сакин дуллай бивкІшиврун.

ЛичІи-личІисса мазру ва миллатру бусса дагъусттаннай инсантурал оърму ва къадарду ца лашаврин бувну ва миннал дянивсса уссушиврийсса дусшиврийн ва хІалагъурттушиврийн бувну, дакІнихсса творчестволул произведенияртту чІявумий лавхъхъусса бур. Ми произведениярдал цІарду лархъхъусса дур, миву цава ца виричувная гъалгъа тІий бур, так ми чивчуну бур дагъусттаннал миллатирттал личІи-личІисса мазурдий. Балайчитурал цанма ххуй бивзсса чІаххувсса миллатрал мазурдийсса балайрду цала ниттил мазрайн таржума буллай бивкІун бур. Мунияту яруссанначІа, лакрачІа, даргиячІа хъунабакълай бур Хучбардуясса, Гъумучири оърчІаясса ва Азайни душниясса, Камаллул Баширдуясса, удаман Алиясса лахъи балайрду. «Агар вай балайрдаву гъарца миллатрал мазрай чивчумунил так цанна хасъсса лишан къадиркІссания, гай гъарцагу балай хъхъичІва-хъхъичІ цумур мазрай чивчуну бивкІссарив кІул бан къабюхъанссия»<sup>1</sup>, – тІий чичлай ур фольклорист Х.М. Халилов.

Лакрал лахъи балайрду сакин буллалаву, чІалачІиссаксса, ччянира дайдирихъуну дур. Ми сакин баврин сававрдунугу, чІявуну, халкъуннал виваллил ва къатІаллил душмантуращалсса талатавуртту хъанай диркІун дур.

Ххюттуршунния лирчусса шиннардил мутталий лакрачІа яхъуну бур дунияллийх цІа дурксса аьрчча Тимурдул аьралуннащал талатаву дурсса

---

<sup>1</sup> Халилов Х.М. «Лакский песенный фольклор». Махачкала, 1995 г., стр. 73.

лакрал вирттаврал кьюкьлул бакIчийну бивкIсса ПартIу ПатIимаясса лахъи балай, яхъуну бур мукунма арулчинмур классраву лакрал литературалул дарсирай лахъхъайсса XVIII ттуршукулий цала тархъаншиврул цIаний, лакрал халкъуннал къажарнал аьралуннащал дуллай бивкIсса талапатавурттаясса «Хан-Муртазааьли» тIисса балай. ОьрчIал арулчинмур классраву лахъхъинтIий бур «Багъадур Аьли», «БурхIай Изажа» тIисса лахъи балайрду.

Лохъи балайрдащал бакъассагу арулчинмур классрал оьрчIру лакрал литературалул дарсирдай кIул хъунтIий бур халкъуннал эпосрацIун бавхIусса лирический балайрдащал. Ми балайрдаву яргну чIалачIи бувну бур инсантурал щугълурду, пикрирду. Миву буслай бур захIматрал агъулданул къарцинсса оьрмулукъу, миннува баллай бур тархъансса талихIрал оьрмулукъу цIанийсса талатаврин гъаз хъияра тIисса леххаврил чIурдугу.

Халкъуннал оьрмулувасса яла захIматми чIуннал бусала буллалисса историялул памятникруну жула халкъунначIа бюхттулсса хIурматрай бур эпический балайрду.

Мий балайрдаву халкъуннал ялун дурксса кьини виртталну лахълахъимийну ккаккан бувну бур зунттал арамтал ва хъами»<sup>1</sup>, – тIий чичлай ур Дагъусттаннал халкъуннал шаэр Ю. Хаппалаев.

Ттининнингу кIицI лавгсса куццуй, жула лакрал хъхъичIава ляхъан бувсса балайрду шанма бутIуйх бачIин бюхълай бур. Мий балайрдал куннил-кунниясса личIишиву, миннул хасият оьрчIан дурчIин дан учительнан кумаг бантIиссар яларай ришлашисса, лакрал фольклордануха зузисса аьлимчу Х. Халиловлул ми балайрдал жулардаясса бувчIин баврил. Халилов Х. Чичлай ур: «Халкъуннал оьрмулуву, тарихраву хъанай бивкIмур аьлтту хъуну бур балайрдаву. Элмийну ми балайрдан укунсса

---

<sup>1</sup> Лакрал халкъуннал маьгри. БавтIиссар Пашаев М.-Х. МахIачкъала, Даг.кн.изд-во, 1977. С. 21.

аьмсса царду дур: аьдатурттацун бавхусса балайрду, эпический балайрду, лирический балайрду.

Аьдатурттацун бавхусса балайрду учайссар хьатгул аьдатур дуллалини ва мукунна цаймигу аьдатур дуллалини учайсса балайрдайн.

Лирический балайрду учайссар эшкьи-ччаврил, кулпатрахасса, багьу-бизулиясса, хIалтIухъантурахасса, тарихийсса балайрдайн ва балладардайн.

Вирттаврахасса, тарихийсса балайрдаву хъанахъимур циняв агъалинан аьмсса бур. Укусса балайрдавусса инсантал Буттал кIанттул тархъаншиврул цайми-цаймигу циняв халкъуннан аьмсса иширттал цIаний талай бур.

Лакрал ляхъан бувсса вирттаврахасса, тарихисса балайрдаву, дагъусттаннал цайми халкъуннал балайрдаву кунма, вирттаврал дурсса, дуллалисса даву хъинну ларай дурну ккаккан дурну дур. Мукусса вирттал бур ПартIу ПатIима, Муртазааьли, Къайдар ва цаймигу. Вай вирттавраву жям дурну, ккаккан дурну дур халкъуннал къирият, аькьлу, гьунар. Ватандалухсса ччаву, оьрму ххирашиву, цала Буттал кIанттул тархъаншиврухлу жан дулун хIадуршиву.

Вай балайрдаву иш бюхъавай хьусса куццуй ккаккан бувну бур. Шиву бусаву ца иширая, ца тарихравун агьсса инсанная бур.

XIX ттуршукулий ляхъан бувсса балайрдавусса инсантал мяйжаннугу оьрмулуву бивкIсса инсантал бур. Вай балайрдаву ккаккан дурну дур паччахIнал аьралуннайн къаршину, цала Ватан ядуллай зунттал халкъуннал дурсса виричушивуртту. Амма шариаьт ва мюридизм гужсса чIумал ляхъан бувсса вай балайрдаву жунма чIалай бур диндалул мадарасса асардугу. Цаппара хъанахъимунин къатIайлану кьимат бищавугу дур шиву. Амма вай балайрдаву гьанумур пикри бурган бувну бур тархъаншиврул, узданшиврул цIанийсса талатавриясса бусаврих.

Шиву Ватандалул цІанийсса зунттал халкъуннал дяъви бусравну ккаккан бувну бур. Ва дяъви тІайласса дяъвину чІалай бур зунттал халкъуннан, мунихлуну цала кЪириятгу виричушивугу ккаккан дурну дур»<sup>1</sup>.

Арулчинмур классраву лакрал литературалул дарсирай хЪхЪичІвахЪхЪичІ лахълахъисса произведенияну хЪанай бур «Хан-Муртазааъли» тІисса лахъи балай. Балай лахъхъаву дайдилахъиссар дуккавил шин дайдирахъуну кІилчинмур дарсирай. Цалчинмур, байбихъулул дарс, учительнал хас дарча ххуйну хъунтІиссар оърчІал гЪинтнил мутталий бувккумур ххал бигъаврин ва цІусса дуккавил шинал оърчІал цала лахъхъинмунишал кІул баврин.

Балай лахълан хЪхЪичІ оърчІахъ бусайссар XVII ттуршукулул дайдихъулий дагъусттаннал халкъуннал цала тархъаншиврул цІаний дуллай бивкІсса талатавурттая. Бусайссар мукунма къажар Надир-шагънашалсса зунттал халкъуннал талатавриясса балайрду цІанакІулгу яхъуну бушиву лакрал, яруссаннал ва даргиял халкъунначІа ва лакралгу, яруссанналгу лахъи балайрду хъинну кунничІан ку гъансса бушиву.

Балай лахъланнин бувчІин байссар оърчІан, ва ляхъан баврин савав хъушиву къажар Надир-шагъ цала аьралуннашал шамулчингу Дагъусттаннайн ххяххаву. Х.М. Халиловул чичлачимунийн бувну: «Гъарца чІумал мунайн къаршину буккайсса бивкІун бур зунттал халкъ 1739-ку шинал Закаталлайсса Джардал-Белоканнал жяматру гъаз хъуну, Надир-шагънал уссу Ибрагъим-хан ивкІуну ур. Уссихлу къисас ласунна тІий, му 1741-ку шинал Дагъусттаннал халкъуннайн къаршину увккун ур. Мунал оьттух къанихшиву хІат-хІисав дакъасса диркІун дур. Уттинин ливчІун бур мунал «шагъ-къирман» (шагънал ччар) дуллай ивкІсса куццуюсса бусала. Мюрщисса оърчІашал хъами, ттарацІун буккан бувну, дучрах ккуччу бувну бивкІун бур. Гъулудав, Ахттав 1742-ку шинал му

---

<sup>1</sup> Халилов Х.М. «Лакский песенный фольклор», Махачкала, 1959. С. 73.

лакрал зунттавун авчуну ур. Чулахъ Сурхайл анаварну бавтІсса аьралуннаща чІявусса шагьнал аьралуннайн данди бацІан къавхьуну бур. Цала арс – Муртазааьлихъ цала бурттигьалтрашал Аьндалаллал тихун насу, куну, Чулахъ Сурхайл Надир шагьнал аьраллу бацІан буллай ивкІун ур, арснан тихун гьансса тагьар сакин дуллай. Амма лагма рургьуну бухьукун, цанма канийн гьан багьну бур. Шагъ кІилчинмур кьини Муртазааьлил бурттигьалтрал хьирив авчуну ур.

ТтурчІиял зунттуйн душман ивукун, мунайн данди буккан хІадур хьуну диркІун дур лакрал, яруссаннал, даргиял ва цайминнал кьюкьри. Хьхьувай къажарнал дучри канаки буллалисса кІанайн кьютІну гьан хьуну, къаралгу къатІ буну, дучри лихъан буну бур. Хьхьувай, къакІулсса кІанттурдай хьирив агьан шагъ нигьа увсун ур.

КІюрххил цачІун хьусса Дагьусттаннал кьюкьри къажарнайн ххярххун дур. Душманнан цивппа чІявусса бушиву ккаккан баншиврул хьаннил арамтурал янна ларххун дур ва зунттал хьачІунттайх чарттал чІюйрду буну бур. Гай архния аьралуннал кьюкьраха лавхьхьуну бивкІун бур.

Муртазааьлил бурттигьалтрал Надир-шагьнал гьануми аьраллу лихълахъи буну бур. Ираннал аьраллу ццаххандарал хьуну лихълан бивкІун бур. Гай лихъан буну бур ДербентуллачІан бияннин»<sup>1</sup>.

Укунсса ихтилат буну махъ, балайлувусса оьрчІан букъавчІайсса мукьурттищалсса даву дайссар. Балайлул текст дуккайссар хьхьичІ учительнал яла дуккин байссар ххуйну буккайми оьрчІахъ. Балайлуву бур куннащал куннал буллалисса ихтилатругу. Ми кІанттурду рольлайх бавчІуну буккин бан бучІиссар. Масала, Сурхай-ханнал ва Надир-шагьнал, Сурхай-ханнал ва Муртазааьлил, Муртазааьлил ва Надир-шагьнал дянивсса ихтилатру. ОьрчІан бувчІумур суаллайну цІакъ байссар. Дарсирал ахирданий оьрчІан зунттал халкьуннал чил билаятирттал

---

<sup>1</sup> Халилов Х.М. Партіу Патіма. МахІачкъала, Дагьучпедгиз, 1972. С. 31.

чапхунчитураяшалсса талатавурттая ци кІулну бурив цІуххайссар. Шаппа хъуниминнахъ ми талатавурттая кІулмур цІуххин маслихІат байссар.

Хъиривмур дарс балайлул анализран ишла дайссар.

Балай ххалбигълагъини оърчІал я бурган бан аьркинссар мунил мурад лябуклакисса куццух. Балай байбихълай бур дунияллул заллу хъунна тІий, Надир-шагънал талатавурттайн дурсса хІадуршиннарайн рихшант дуллалисса кунма:

ИстІамлив гъан бувну, ттупру бан бувну,  
 Мисрилив гъан бувну, турду дан дурну,  
 БакІъялавай битай жазаирдащал  
 МицІру мусил бавкъу байрахъирттащал,  
 Найнугу авчури къажар Надир-шагъ,  
 Шагъкъирман данна тІий мюрши щархъаву  
 Канийн ласунна тІий Гъумук Сурхай-хан.

Ганияр гихунмайсса ишру анаварну баххана хъанай бур. Балайлуву Надир-шагънал лакрал аьрщарайн ияннинсса ххуллу ва лаккуйн ивну махъ ганал щархъай бувсса зулмурду чІалачІи бувну бур.

Гай авгъаннал аьрал щархъайх бавчуна,  
 Шагъ къирман дуруна мюрши щархъавух,  
 Цащалами аьрал ялун бавкъуну,  
 Канийнгу лавсуна Гъумук Сурхай-хан.

Балайлул дуклаки оърчІру цал шагънал аьралунначІан яла зунттал вирттаврал къюкълучІан буццлай бур.

Надир-шагъ чІявусса аьралуннащал, хъунмасса гужирдащал цаннил хъирив ца шагърурду, щархъурду ласлай авчукун, Сурхай гъанавиххи хъуну, шагънал канийн лавгун ур. Му чІумал мунал арс Муртазаабли Ссугърахъ дагъусттаннал вирттаврал къюкърри хІадур дурну, душманнайн иян хІадур хъуну ур. Муртазааблил къюкълуя балайлуву укун чичлай бур:

Цаппара хІал хъуну, манзил лавгукун,

Ца кьюкьа дурккуна та Ссугъращату.  
 Найнугу дарчуну му чIара кьюкьа,  
 Ялув ссавнияту паранну кунна.  
 Му кьюкьлул циняннал ярагъ ца бия,  
 Му кьюкьлул циняннал дучри ца бия,  
 Кьюкьлул бакIчинал чу оьрусса бия.

Ялавай чIалачIи дурну дур шагънал аьралуннал ва зунттал кьюкьлул  
 дянивсса талатаврил дайдахьу:

Ца ттупанг бивтуна Мияйна сунув,  
 Тур хIала даркьуна Мияйна кьурув,  
 Гъайта-гьура куна, ялун ххявххуна,  
 Яттил ттурзандалийн гьалбарцIру кунма,  
 Аьрал хIала бувхри, оьттул нех дуркри,  
 Му чIарасса кьюкьлул ка ялтту дуркри.

ЛичIинува чIалачIи бувну бур Муртазааьлилмур гьунар:

Вил бава дирчIивуй, Хан-Муртазааьлий,  
 Кьакьунттул газулийн кьарчигъай куна, –  
 Шихачул уххайва, тиха уккайва,  
 Тихачул уххайва, маша бутайва.

Муртазааьлил виричушиврул гьунардал махIрум увсса кьажар Надир  
 шагъ цIухлай ур Сурхай-ханнахь:

– Заннаху, заннаху, да чулахь Сурхай,  
 КIа чIарасса кьюкьа чассарив кIуллив?  
 Оьру чай бурттигьу вин цури кIуллив?  
 Сурхай-хан пахрулий жаваб дуллай ур:  
 – КIа чIарасса кьюкьа лакрал вирттаврал,  
 Оьру чай бурттигьу ттул Муртазали.

Надир-шагънал бюхттулсса кьимат бивщуну бур Муртазааьлил виричушиврун ва къучагъшиврун. Му аьй-бюкьу буллай ур Сурхай-ханнай, гукун ххаллилсса арс цала унува канийн увкIун тIий:

– Кару вил дагъаннав, да Чулахъ Сурхай,  
 Га арс вила уна ттул канийн увкIсса.  
 Дагъусттан, Гуржисттан вил хьурдай Сурхай,  
 Вил арс Муртазали ттулану хьурдай,  
 Вил арс Муртазали ттула уния  
 Макка, Мадиалив мина давияв...

Муртазааьлил ва Сурхай ханнал дянивсса ихтилатрал яргну чIалачIи дуллай дур га талатавриву Муртазааьлил дуллалисса виричушивурттал агъамшиву.

Лахъи балайлуву лакрал ва къажарнал аьралуннал дянивсса талатаву диркIсса куццуй чIалачIи дурну дур, амма цаппара кIанттаву Муртазааьлил гьунарду хьиннува хьуни бувну чIалачIи бувну бур:

ДачIу дугъай хьуний ацI-ацIа  
 Рирщуну авчури Муртазааьли.  
 Ххивнугу бавчури къажарнал аьрал,  
 ГъалбарцI хьирив багъсса чахъри укунма,  
 Барзу хьирив багъсса къакъунт укунма.

Муртазааьлил гьунарду хьиннува хьуни бувну бур къажарнал аьралуннал. Му хьхьичIунай най ур къажарнавун ццах бутлай, хьхьичIун дагъмур бат дуллай. Къажар лакрал аьралуннал бакIчиная цала шагънахъ тIий бур:

Царай утгусрийксса цал кару дури,  
 Цавай кIичIурдуксса цал яру бури,  
 Чал ччаннала цIарал цува ххал къашай,  
 Цал зуму ссихIирал чу жун ххал къашай,  
 Ца цала ивчIаннин, ацIа чал ивчIай,



РухІ ласун израил, биллагъ, цув ури.  
 Ина миннат бува Муртазааълихъ,  
 Хъинсса виричунал къамул байссарча:  
 Ххуллу була куну, буттал аьрщарайн,  
 ТІайла бува куну, та Хурасаннайн.

Дуклаки оьрчІал ябурган бан аьркинссар дачІи дуниял кІунттихъхъун ларсѣсса Ираннал шагъналгу, танал аьралунналгу ахир жула зунттаву хъушиву. Му жула зунттал халкъуннал цІанихсса лавгмуницІун бавхІусса хъуннасса историялул памятникну хъанахъишиву. Надир-шагъ дяъвилийгу ух хъуну, чІявумий аьраллугу къатІ хъуну, бан-битан бухлавгун, Муртазааълил хъхъичІ лергълихун агълай ур. Му миннат буллай ур цала миналин итаакъи тІий, гъан итаннугу ссайчІав мяш хъанай акъар: я мусий, я арцуй, я ясирнай. Амма Муртазааъли жаваб дуллай ур:

– Зу дуллусса мусий, муси шайссарив?  
 Муси дучІан данна турлил зуманив.  
 Зу дуллусса арцу арцу шайссарив?  
 Арцу дучІан данна ттупанграл бартнийн.  
 Зу буллусса ясир ясир шайссарив?  
 Ясир бучІан банна оьру чал хъхъичІун,  
 Зун ххуллу булунна буттал аьрщарайн  
 Хъазамрайн аьш ларсун дакІниціун битлай.  
 На зу тІайла банна та Хурасаннайн,  
 Махъа чухъри дугълай, бяних тур ришлай.

Къажарнал чапхунчитуращалсса дяъвилува чІалан бивкІун бур дагъусттаннал миллатру цашавриву гуж бушиву ва миннаща ччима къатІаллил душман ххит ан бюхъантІишиву.

Учительнал бувчІин байссар оьрчІан, ва лахъи балайлун цІа «Хан-Муртазааъли» дунугу, шиву ца виричунал гъунардая балай тІий

бакъашиву, ва бушиву цинявгу зунттал халкъуннал цала тархъаншиврул цІанийсса гъунардаясса балай.

Лахълахъисса балайлул мяъналух, гиву гьуртту хъанакъиминнал куннал куннащалсса аралух бурувгун чІалай бур, ва балайлувусса геройтурал ва иширттал куннийн ку къаршисса личІишиву душиву. БучІиссар ххал дигьин оърчІащал, зунттал къюкълул ва къажарнал аьралуннал, Муртазааьлил ва Надир-шагьнал дянивсса тапаватшиву цукунсса дуссаривгу:

### **Муртазааьли**

1. Цала ватандалул тархъаншиврул цІаний талай ур.
2. Цала вирттаврал къюкъа ххирасса бакІчи ур.
3. Муртазааьли цала гуж къажарнаяр лувсса бушиву чІалай бунувагу ццах бакъа ххувшаву ласуннин талай ур.
4. Балайлуву Муртазааьли къучагъсса ххаллилсса виричуну чІалачІи увну ур.

### **Надир-шагь**

1. Уссихлу къисас ласлай, цала цІа дуккан дуллай чил хІукуматирттай зулмурду буллай ур.
2. Цала аьралуннай рахІму-цІими бакъасса ми ясирну булунгу пикри бакъасса аьралуннал бакІчи.
3. Надир-шагь цала аьрал лияйхту, лергълихун агълай ур, цува сагъну личІанну, мусий, арцуй, ясирнай мяш хъанай акъар.
4. Надир-шагь обсса, обттух къанихсса ккаччи кунасса шагъну чІалачІи увну ур.

Балайлул байбихъулий Надир-шагьнал аьралуннал шагь къирманну дуллай, зунттал агъалинал оь экьибутІлай бур, дайлитІулий тІурча, зунттал вирттаврал къюкълул шагьнал аьралуннал обттул нех дуккан дуллай бур, байбихъулий Муртазааьли цала къюкъри сакин дан Сугърахъхъун ливхъун ивкІхъурча, балайлул ахирданий къажарнал аьрал «гъалбарцІ хъири

багъсса чахъри укунма, барзу хъирив багъкъакъунт укунма ливхъун най бур.

Дуклаки оърчІан бувчІин бан аъркинссар балай ляхъан бувсса халкъ, цала Ватан зулмулуца ххассал даврил цІаний талатисса Муртазааълил ва зунттал къюкълул чулий бушиву ва миннал хъуннасса ччаврищал, эпитетирттай мяш къавхъуну сакин дурну душиву Муртазааълил сипат. Халкъуннал му лащан уллай бур къарчигъайлуха, гъалбурцІиха, барзуха. Ва чІалачІи увну ур халкъуннал балайлуву ццах бакъасса, цала зунттал Ватан хъинну ххирасса виричуну.

Лакрал аърши душманнахъхъун ларгукун, му уссурвалсса миллатирттал вирттаврая къюкъагу сакин дурну, къажарнащал кІирисса талатаву дуллай ур.

Укунсса ххал бигъаву дурну махъ, оърчІашал дакІнин бичайссар ряххулчинмур классраву лавхъхъуну бивкІсса лахъи балайрду ва ми балайрдал вирттал Муртазааълищал цачІу бивхъуну ххал бигъайссар.

Мукунма Муртазааълил гъунар граждан дяъвилул ва Буттал кІанттул цІанийсса дяъвилул вирттаврал гъунардащал цачІу бивхъуну ххал бигъайссар.

МаслихІат байссар оърчІан, шаппа цала хъуниминнахъ цІувххуну литературалул тетрадирттай лахъи балайрду чичин.

Арулчинмур классрал литературалул хрестоматиялий бур оърчІал цайнува цала буккин ккаккан бувсса «Багъадур Аъли» тІисса лахъи балайгу. Балай ккаккан бувну бур цайнува цала буккин.

Балай цайнува цала буккин булуннин учительнан, учительнан аъркинссар оърчІан му бувчІин бан. Бусайссар, оърчІахъ балайлуву халкъуннал дащуй дихълай бушиву хъуними уссурваврал цала чІавама уссин дурсса хаиншиву, мунан дурксса луркІан. Хъуними уссурваврал лачин бугъан гъанну куну, Багъадур Аъли увцуну, уккан къашайсса муруллаву хІинчурай авхІуну увтун, гилува къаитлай бур. Ва къадарсса

къел уссурваврал дурну дур хъуслихсса къанихшиврул, буттая лирчІсса хъуслил Багъадур Аьлинсса бутІа цайхва бачІиншиврул.

ОьрчІан бувчІин бан аьркинссар лачин бугъан хъунисса арамталгу циван лагайсса бивкІссарив. Миннахъ бусайссар хъхъичІава арамтал урттил хІайвантрах, лелуххантрах авлий нанини, каний махъ бувсса лачингу бувцуну лавгун, мунил кумаграйну ав байсса бивкІшиву. Лачиндалул оьрчІругу мюрщину бунува кюрттарава бувгъуну, авлий буцланна тІий, каний махъ байсса бивкІшиву. Ва балайлувусса уссурвавралгу, му мурад багъана бувну, увтхъунссия чІивима уссу муруллун.

Балайлувусса уссурваврал дурсса къадарсса къелуйн къаршину оьрчІал дакІурдиву гай оькки чулий ккаклакисса асарду хІасул шайссар, тІайласса хъинсса виричу ххира шайссар. Бусайссар ва лахъи балай балладардавун багълай бушиву, цанчирча, бувсун бунутІий ца кулпатравусса инсантурая, гайннал дянивсса аралуя. Балайлул ахиргу къумасса дур: Багъадур Аьли ивкІлай ур.

Ва бувчІин баву дурну махъ, балай оьрчІахъхъун шаппа буккин булайссар.

### III. ХАЛКЪУННАЛ ЭПОСРАЦІУН БАВХІУССА ЛИРИЧЕСКИЙ БАЛАЙРДУ ЛАХЪХЪАВУ

Арулчинмур классрал литературалул хрестоматиялул дуклаки оърчІру кІул буллай бур халкъуннал эпосрацІун бавхІусса лирикалул балайрдашал. Ва тема лахъхъаврийн бучІаннин, учительнал ххал бигъайссар дуклаки оърчІан лакрал халкъуннал шаммардая, балайрдая цуксса хавар буриу, кІулминнахъ буккин байссар. ОърчІан цала бувккумунил мяъна цуксса кІулну дурив ххал дурну, захІмат хъанахъимур учительнал цала, классрашал архІал ххал дигъайссар. Ккаккан дурсса чІумуй цуманаща цими шамма ягу балай литературалул тетрадирттай чичин бювхъуриугу ххал бигъин бучІиссар.

Литературалул хрестоматиялийсса лирический балайрду ххал бигъаву дан ххуйну хъунтІиссар ялавай бивщусса кунмасса ихтилатрал кумаграйну:

Жула халкъуннал лавгсса оърму, миннал мурад, дард, оърмулухсса ччаву, оърмулувусса тІайладакъашивурттайнсса зид хъинну куртІну ва пасихІну лахъи балайрдаву кунма лакрал лирикалувугу чІалай бур. ЦІана балайрду буклакиминнан миннува баллай бур халкъуннал захІматсса оърмулул угъ-къакгу, чаннасса оърму ххирашивугу, ххуйсса оърмулул ххуллийсса талатавурттайн халкъ гъаз буллалисса леххаврил чІугу.

Балайрдава жунма чІалай бур оърмулувусса ххуймунихсса халкъуннал ччаву, муниясса цІа, мунишала архІал кІул хъанай буру зунттал халкъуннал къаридсса, кІусса оърмулушалгу.

Балайрду историялул лахъишиврий халкъуннал оърмулуву хъанахъисса дахханашивуртташал баххана хъанай най бур. Миннуву аьчухну чІалачІи бувну бур инсантурал личІи-личІисса асардугу, чаннасса оърмулийнсса умудгу, мукунна цІанасса буккун яргну чІалай дур миннал цала Ватандалухсса ччавугу.

Буклакинан бигъану бувчІлай бур лакрал улча ялапаршиннаран хъинну захІматсса, къянатсса кІану бивкІшиву, мунияту кулпатран дуланмагърал хъирив, шардалу къариртун мий архсса шагърурдайн личІи-личІисса санятирттай зий хъус лякъин хІарачат буллай бивкІшиву. Хъус ляхълай, шинну къатІув дуллай бивкІсса хІалтІухъантурал къурчІисса оърмулун барашин дуллай бур хрестоматиялий бивщусса балайлул вай ххуттардил:

Цурк буманан – ряхва барз,  
 Чув ивкІунан – ряхра шин,  
 Агъ байчара хІалтІухъан,  
 Вин – чІун дакъасса ссивир.

ДакІнин ххирасса оърчІру  
 КІира шинай цал ккаклай,  
 Ва гъурбатрал дуснакърай  
 Танинни бикІантІисса!

Балайрдал хІалтІухъантурал къурчІисса, захІматсса оърму бакъа, миннал му оърмулиясса рязи бакъашиву, мунинсса къарши букваву чІалачІи дурну дур. Миннан захІматну бур оърму бутан, цавай хІазрай, гайми хІасратрайсса дунияллий.

Агъ, ина оьттун мивуй,  
 Ва ци оь дуниялли!  
 Ку хІазирай миналий,  
 Ку хІасратрай гъурбатрай!

Агъ хІасрат цир, язугъ цир,  
 Лакрал жагъилтурайсса!  
 ДакІнил ххира дуснал хъхъичІ  
 Оърму бутан къашайсса.

ХІалтІухъаннал оърмуняр нацІусса бакъар мунал шаппа ливчІсса кулпатрал оърмугу. Мискинсса ужагъралссагу буллай шаппа личІлачІсса мунил оърму захІматсса бивкІшиву чІалай бур балайрдаватугу:

Аман на вай дардирдан  
Цу-цумунин ци бави? –  
Духмур ялату гъаннин  
ЦІумур ялун диллай дур.

Ссав дурцІусса цІуртти бур  
ЧаннацІуку бакъари,  
Ар дурцІусса уртту дур,  
Урттуй тІутІи дакъари.

Халкъуннал балайрдава ххуйну чІалай бур революция хъуннинсса дагъусттаннал хъаннил оърму лапва лашинсса, цукунчІавсса ихтияр дакъасса бивкІшиву. Балайрдаву бусласимур хъиннува бюххай миву ишла дурсса лашанбавурттайхчІин ва тІабиаьтрал къаршисса суратру цачІу дишаврийхчІин:

На ялунмай хъяй бура,  
Вивпай хъяхъа тІий бура.  
Ялтту шаллуну бура,  
Вих щаварину бура.

– Зунттаву бюхттул зунттуй,  
Цанна муксса пашмансса?  
КІюрххил ххяххай ххяххабаргъ  
ХъхъичІ вийн бакъарив щайсса?

КІюрххил ххяххай ххяххабаргъ  
ХъхъичІ ттуйн щаврил цивави,  
Арду тІутІаву дуний  
На зунчалу бикІара!

Лакрал балайрдаву хъамитайпа къумасса оърмулийн къарши буклай бур, цила ихтияр цила кІунттихъхъун ласун хІарачат буллай бур. ЧІявур лакрачІа хъаннил цала багъу-бизу, цала асарду чІалачІи буллалисса балайрдугу.

Багъу-бизулул, эшкъи-ччаврил, хІалтІухъантурал балайрду бакъассагу, лакрачІа хъинну машгъурди дуснакърал балайрду. Бусласимунийн бувну, миннуясса чІявумий 1877-ку шинал хъусса бунтирал чІумал ссибирлив гъан бувсса вирттаврал ляхъан бувну бур. Мукунминнуясса цану хъанай бур чІявуми лакран ххуйну кІулсса «ГъалбурцІил дакІру дусса» тІисса балай.

Ва балайгу лахъхъайссар арулчинмур классраву дуклакисса оърчІал.

Балай лахъланнин хъхъичІ ва сакин баврия кІулмур оърчІахъ бусайссар Х.М. Халиловлул бувчІин буллалимунийн бувну, ва балай сакин хъуну бур Баратовлул ва Ккурккуллал Зайдул ляхъан бувсса балайрдал ххуттардия. Балай хъинну машгъурну бивкІун бур XIX ттуршукулул ахирданий ва XX ттуршукулул дайдихъулий. Революционер, шаэр ва журналист Саид Габиевлул бусаврин бувну, ва балайлул макъан ца арманинал музыкантнал нотардай чирчуну диркІун дур. Ва га балай оъруснал цалчинмур революциялул гъантрай Петербурглив кабакирттаву учайсса бивкІун бур.

Ва укунсса ихтилатрал хъирив балай учительнал цала буккайссар пасихІну, оърчІан бюхханну. Буккин байссар 2-3 ххуйну буккайсса оърчІахъ. Яла балайлул хъирив лаяврин бучІайссар.

ЧІалачІисса куццуй, балайлувусса гъалгъа бур ссивир бувну нанисса лакрал вирттаврая. Амма ми ссал ялув, циван ссивир бувссарив най бунува бувчІлай бакъар.

Балайлул дайдихъу пашмансса дур, миву ссивирлив наниминнал дакІру ттурлу даркъусса къумасса барзунттахъа лащан дурну дур:



КІай бюхттулсса барзунттайх  
 Ттурлу даркьуну дури,  
 Вай лакрал мюрш виртгаврал  
 ДакІру кьуману дури.

Балай ялавай буклан бивкІукун оьрчІан бувчІинтІиссар виричу  
 ссивирлив кьадарсса кьеллул цІаний гьан уллай акъашиву, му цала  
 ххаллилсса пикрирдал цІаний, халкьуннал тархъаншиврул цІаний гьаз  
 хьуну ивкІун тІий най ушиву:

Зунтту зурзутІи бувну,  
 РатІру хьюлчайтІи дурну,  
 Тархъаншиврул ххуллийну  
 Жанну дулун най бури.

Виричу цала дакІнил хІал, ххажалат лащанбавурттайну чІалачІи  
 дуллай ур, мунал цала дакІ гьалбурцІил дакІниха, цува хьару гьаргьун,  
 леххан кьашавай ливчІсса илкинсса лелуххуха лащан уллай ур:

Гьава банну чайссия  
 Бюхттул барзунттал ялтту,  
 ХьарацІа хьару гьаргьун  
 Щюлли хьхьирийн бивчунну.

Ав буванну чайссия  
 Дултти зунттал бакІурдайх.  
 ХхяпрацІа михьру бувккун,  
 Ав буван кьашай бунну.

Ганияр гинмай балайлуву буслай бур виричунал чаннасса хияллугу,  
 ххаллилсса кьастругу ссивирнал «оь вацІраву», лахь зунчалу личІлай  
 душиву:

Мина данну чайссия  
 Шагьру ххуйний, ххал бувну,  
 Мина дуллан багьунни

Ссивирнал оь вацІраву.

Кюру банну чайссия

ОьрчІ къакъунттул хъазамрай.

Кюру буллан багъунни

Ссивирнал лахъ зунчалу.

Виричу хъиннува къума лаглай ур шаппасса нину-ппу, кулпат, гъанцири дакІнин багълай. Мунал дакІ хъит тІий дур зулму ялату гъан баврин, тархъаншиврийн:

Залимтурал зулмулун

Лаккуя бачин бувкун,

ОьрчІру, кулпат, гъанцири

Агъи тІинма ливчІунни.

Таниннинни уссурвал,

Зулмулуну личІайсса?

Тархъансса дунияллийн

Тару жува буккайсса?

Балайлул ахирданийсса виричунал оьрчІан, кулпатран бувсса аманат, цала лавсун най ивкІсса ххуллу хъама къабивтун, хъхъичІунмай бачин бара тІисса кунмасса бур:

Нажагъ ссивирлив ливчІун,

Жу зана къабикІарча,

Аманат, оьрчІрув, кулпат,

ДакІний къабуккаву.

Укунсса ххал бигъаву дурну махъ, оьрчІахъ бусайссар, укунсса ва ванихава лавхъхъусса балайрду цайми миллатирттал халкъунналгу бушиву. БучІиссар бусан оьрчІахъ оьруснал революционный балайрдая.

«ГъалбурцІил дакІру дусса» тІисса балай шаппай дакІних лахъхъин булайссар.

#### IV. НАЗМУЛИЙ ЧИВЧУССА ПРОИЗВЕДЕНИЯРТТУ ЛАХЪХЪАВУ

Шаэрнал цала назмурдаву чІалачІи буллалисса асардал ва сипатирттал хъунмасса кумаг байссар оърчІру тарбия баврин ва миннан оърму лахъхъаврин. Назмулий чивчусса произведениялул кумаграйну учительнаща бюхъайссар оърчІал аькълу кІулшилийн асар биян бан, ми журалул произведениярду къамул бан, ми журалул произведениярду къамул бан, лахъхъин тІурча, оърчІру чара бакъа хІадур бувну бикІан аьркинссар.

ОърчІан назмулий чивчусса произведениярттал гъанусса мяъна, щала цила аваданшиврущал ва ляличІишиврущал тІитІиншиврул, дурчІин даншиврул, учительнал дарсирай ишла дуллан аьркинссар дарс дишаврил личІи-личІисса къяйдарду.

Дагъусттаннал школарттай устгарну дарс дихълахъисса учительтурал даврил ккаккан дуллай бур назмурду лахъхъаву миннул хъирив лаяву ялавай ккаккан дурсса журалий дарча къулайну дикІантІишиву:

- а) хІадур буллалисса байбихъулул беседа баву;
- б) учительнал пасихІну, бюхханну буккаву, щала назму ягу мунил бутІри артистътурал ккалаккисса куццух магнитофондалувух вичІи дишаву;
- в) мукъурттищалсса даву;
- г) назмулий чивчусса произведение ххал бигъаву;
- д) ахирданийсса жям байсса беседа баву.

Назмулий чивчусса произведение лахъхъаврил къяйдарду личІи дуллалисса чІумал, учительнал хІисавравун ласун аьркинссар произведениялул жура, гиву ккаккан дуллалисса сипатирттал хасият, чивчусса чІун.

Агарда оърчІру хъхъичІва назмурду лахъхъаврийн хІадур бувну бивкІхъурча, миннан гай бигъану дурчІайссар. Назмурду дурчІаврин кумаг байссар учительнал бусайсса хъхъичІ мукъул. ХъхъичІ махъ учительнал

лахълансса назмулул хасиятрах, чивчусса чӀумух бурувгун сакин байссар. Масала, С. Габиевлул цала «Чагурт» тӀисса назмулуву чагуртну чил кӀанайн лавгсса чӀивисса оьрчӀал чулухунмайсса цала асар ккаккан буллай бур, гукун оьрчӀру аьзаврал бугъан буллалисса дуссукъатрайн нааьна дуллай, чӀа тӀий ур лакрал оьрчӀан бигъасса оьрму.

Лаккуй аваданминнал цала къазахътурава, хӀалтӀилух устартурал чагуртнава рухӀ ласласаву муксса хъунмасса бала бивкӀун бурхха, му темалия чивчусса произведениярттал лакрал литературалуву биялсса кӀану бугълай бур. Ва тема лакрал литературалуву муькӀалчинми шиннардийн дияннингу хъинну машгъурну диркӀун дур.

Укунсса журалул произведенияртту лахъланнин, га чивчусса чӀумуцӀун бавхӀусса, ганил авторнаясса ва га ссацӀун бавхӀуну циван чивчуссарив бусласисса ихтилат бан аьркинссар.

Буттал кӀанттул цӀанийсса дяьвилул дагъусттаннал литературалийн хъунмасса асар биян бувну бур. Чичултрал та чӀумал цала чӀявуми произведенияртту дяьвилун хас бувну чивчуну бур. Миннуятусса произведенияртту бухлай бур школалунсса лакрал литературалул программалувунгу. Мий назмурду, поэмарду лахълахъисса чӀумал оьрчӀан кӀул хъунтӀиссар чичултрал Буттал кӀанттухсса ччаву, дяьвилул чӀумал миннал чичрурдал, мукъул хъуннасса агъамшиву диркӀшиву.

Вай назмурду лахълахъисса чӀумал цинявгу халкъуннал немецнал чапхунчитураяр ххув хъуншиврул, ватан дуруччиншиврул бувсса захӀматрая, миннал ккаккан дурсса виричушивурттая бусан аьркинссар.

ДакӀнин бутан бучӀиссар ялавайми классирттаву лавхъхъусса, Буттал кӀанттул цӀанийсса дяьвилун хас бувну бивкӀсса хаварду ва назмурду.

Цума-унугу чичул цӀаницӀун бавхӀусса кӀанттурдайн, Буттал кӀанттул цӀаний жан харж дурминнан дацӀан дурсса гъайкаллачӀан экскурсиярду баварча ххуйну хъунтӀиссар.

ТѢабиѡтран хас дурну чирчусса назмурду лахьлахьисса чѢумал хьунмасса хайр буссар лагма-ялттусса кѢанттурдайн экскурсия баврил. ТѢабиѡтрал хьирив бацѢаврил ѡрчѢан цала буттал кѢанттул ххуйшиврушал кѢул хьун кугма байссар, ганихсса ччаву гужлан дайссар. Экскурсиялия зана бивкѢун махь ѡрчѢал бувсмур, тѢабиѡтран хас дурсса назмурду лахьхьиннинсса хьхьичѢмахьну хьун бюхьайссар. ЦѢайнма тѢабиѡтравунсса экскурсиялул биян бувсса асарду ѡрчѢаша бюхьайссар хьун дакъасса сочинениялийнугу чичин. Ми сочинениярду ххал дигьаву, чѢявуну, назмурду лахьланнинсса хьхьичѢ махьну ккалли шайссар.

ЛичѢинурасса бургаву дан аьркинссар мукьурттѢал ялувсса даврих. Му давугу назмурду дуккин байбишин хьхьичѢри дан аьркинсса. ЦѢусса махьру назму дуккиннин учительнал цала хьхьичѢ мукьувугу ишла бан бучѢиссар. Назму дуккаву дяличѢан дурну, цѢусса махьру бувчѢин булларча, га даву назму шаллуну вив итадакъаврихун дахчинтѢиссар. Мукьурттишалсса давугу дурну, назмулушалгу ѡрчѢру кѢул бувну махь, учитель учѢайссар назму дуккаврийн.

Назму дурчѢаврин ва га ххуй дизаврин хьуннасса агьамшиву дуссар учительнал цала букваврил.

«Учитель цува, ганал гьалгьалул жура, пасихѢсса махь, ганал хавар, назмурду дуккаву – гьарзад ѡрчѢан мудансса эбрат хьанахьиссар. Мунийн бувну учитель гьалгьѢ тѢун аьркинссар лахьну, бувчѢинну, асар хьунну»<sup>1</sup>. Укунсса давурттѢал ѡрчѢру назмурдал гьанусса мяьналушал, гиву чѢалачѢи буллалисса асардащѢал кѢул бантѢиссар.

Назмулий чивчусса произведенияртту лахьхьавриву яла захѢматмур шачѢануну хьанай бур – мунил анализ даву, хьирив лаяву. Назмурду пикри бувну дуккаврил чѢалачѢи дайссар мукьурттил мяьнардал аваданшивуртту. Назмулий чивчусса произведениярттал хьирив лаяву – му ганил темалул,

---

<sup>1</sup> М.А. Рыбникова. Очерки по методике литературного чтения. М., Учпедгиз, 1983. Стр. 146.

гъанусса мяъналул, сакиншиннарал, мурадрал, мазрал хъирив лаяву хъанай дур. Амма учительнаша анализ дуллалени гъарцагу вай бутІрал хъирив лаян хъанай бакъар. Мунийн бувну, ганал цала лахълахъисса назмулул хасиятрах урувгун, цуми бутІрай ацІантІиссарив, цуми кІанттурдах хасъсса ургаву дантІиссарив личІи бан аьркинссар. Художественный произведениялул хасият-табиатрах бурувгунни му лахъхъин баврил къяйдардугу лякъайсса. Гъарца произведениялул буквавугу, ххал бигъавугу дурну дикІан аьркинссар ганил журалул бурувгун.

Назмулий чивчусса произведениярттал хъирив лаллалисса чІумал, бургаву дан аьркинссар оьрчІал оьрмулухгу. Анализ дуллалени, хъунмурчІин бургаву дайссар произведениялул яргну, аьямну чІалачІими кІанттурдах. Чичул гъанусса пикри кІул бан бюхъайссар произведениялул сакиншиннарал ганил журалул, мазрал хъирив лаяврийну.

ЧІявуну назмулий чивчусса произведениярттал анализ дайссар беседалийну.

Учительнал бувсса беседалул произведениялул чулухунмайсса цала бургаву, га букваврийну цавува хІасул хъусса асарду бусан кІункІу буллай оьрчІру учительначІан ва кунначІан ку гъан байссар. Мунийн бувну, назмурдал анализ даву цайми къяйдардаиняр беседалийну даву лайкъ хъанай дур.

Беседа бан бучІиссар ччянива хІадур бувсса суаллу буллай. Мунил мурад, лахълахъисса назмулул гъанусса мяъна оьрчІан дурчІин даву хъанахъиссар. Ряххулчинмур классраву лакрал литературалул дарсирдай оьрчІал лахъхъайссар Н. Юсуповлул чивчусса «КІукъакІулсса солдатнаясса баллада», М.-З. Аминовлул «Гтул нину» тІисса Буттал кІанттул цІанийсса дяъвилун хас бувсса произведенияртту. Вай произведенияртту лахъхъин хъхъичІ бусайссар вайннуву дяъвилул тема гъаз дурну душиву. ЧІалачІи бувну бушиву Ватан дуручлай жанну дуллусса жула халкъуннал арсру дакІния къабуккантІишиву.

Буттал кІанттул цІанийсса дяввилияту оьрчІан ялавайми классирттавусса буккавил дарсирдаява кІулссар. Ми кІул хьуссар дагъусттаннаясса дяввилул вирттавращал, миннал бувсса гьунардащал, миннан хас бувну чивчусса балайрдащал, назмурдащал. КІай произведенияртту лахьлахьини тІурча, оьрчІал пикри бурган бан бучІиссар кІай чивчусса чІумух, назмулийну, поэмалийну шаэртуран учин ччимуних.

Назмурду лархьхьуну кьуртал дуллалисса мукьуву, оьрчІан кІулмур жям баву мурадрай, учительнал бувчІин бан аьркинссар вай назмурдаву авторнал аьч бувсса асардугу, дяввилий гьуртту хьуну, жанну дуллуминнал чулхуннайсса ччавугу ца шаэрнан дакъа, цинявгу инсантуран хасьсса душиву. Мукунма бучІиссар бусан оьрчІахь дакъаву цІакь даву мурадрай, жула халкьуннал ва хІукуматрал хьуниминнал дуллалисса давурттая.

ОьрчІан лавхьхьумур жям бувну махь, назмурду дуккин дайссар ххуйну буккайсса оьрчІахь, ягу вичІи дишайссар магнитофондалувух.

Утти мисалдаран ласунну С. Габиевлул «Чагурт» тІисса цамур темалун хасьсса назму.

ХьхьичІунсса лакрал чичу-революционер С. Габиевлушал оьрчІру кІул шайссар байбихьулул классирттавува. Учителнаща ганая оьрчІан кІулмур цала хьхьичІ мукьуву гьарта бан бюхьайссар. С. Габиевлул хьуниминнан кунна оьрчІангу цанналу хас дурсса чІярусса назмурдугу чирчуну дур. «Чагурт» тІисса назмулуву С. Габиевлул ккаккан буллай ур хьхьичІавасса оьрчІал кьурчІисса, язугьсса, ккаши-мякьсса оьрму, багьана бакьанма, зулкукар-усттарнал тамансса щунгу дайсса пана оьрму. Назму дуккиннин хьхьичІ учительнал бувчІин байссар оьрчІан захІмат бизан кунмасса махьру: кьайрду, пурш-батана, лурзимах ва м.ц.

Мунияр махь, мунал пасихІну назму дуккайссар, хьирив дуккайссар оьрчІал. ОьрчІая тІалав дан аьркинссар паракьатсса, гьарца чичрулул лишан хІисавравун ларсьсса букваву.

Хъуннасса агъамшиву дуссар оърчІал махъру ва мукъурттил дайлитІуртту аьямну бувчІинну дуккавил. Яла назмулул гъанусса мяъна дурчІин дуллалисса беседа байссар. Ва назму ккавкнал бусласисса хавар кунма сакин дурну душиву мяълум шайссар. ОърчІан бувчІайссар чичул чагуртнал чулухуннайсса ва гайннал оь хІачІлачІисса устартурал чулухуннайсса ургаву цукунсса дуссарив. Ахирданийсса шеърилул яргну чІалачІи буллай бур С. Габиевлул тархъаншиврухсса ччаву, циняв лакрал мискинсса халкъ бигълин буккавинсса кІункІу тІаву:

Агъ, ина бат шивуй, чагуртнал оърмуЙ!

Бат хъуну, лавгния зана къабивкІун,

Луххал дуссукъатрай къункъуллив ларкъун,

Бигълин буккан циняв лакрал мискинтал.

Назмулул гъанусса мяъна дурчІин дуллалисса беседалува, оърчІан захІматсса, цІанасса чІумуцІун къабавхІусса махъру ва калимартту дурчІин дан аьркинссар. Ми дурчІин дан аьркинссар оърчІан ххуй дизанну, гъанусса мяъна дурчІаврин кумаг хъунну.

ОърчІан бувчІумур, назмулул хъирив буллусса суаллал кумаграйну цІакъ бан аьркинссар.

Та чІумалсса щалагу Аьрасатнавусса оърчІал оърму хъунмурчІин цалавхъхъусса бушиву ккаккан баншиврул, цачІу дирхъуну ххал дан аьркинссар И.-Х. Къурбанаълиевлул чивчусса хаварданувасса Жабраиллул ва С. Габиевлул чагурт оърчІал сипатру. Ми кІиягу оърчІал сипатру хъхъичІ дацІан дан кумаг бантІиссар оьруснал художник В.Е. Маковскийл дурсса «Хъунабакъаву» тІисса суратращал оърчІру кІул баврийну. Ва суратрал чагуртнал тІавтІисса, ккашилсса оърму яргну хъхъичІ бацІан бан кумаг бантІиссар.

Дуклаки оърчІру назмурду дурчІаврин хІадур буллалини чІяруну ишла дайсса букъавчІайсса махъру бувчІин бувну, миннущалсса предложениярду сакин даву къагъашайссар. Ва даврил бачІва назмулул



мурад бувчІин кумаг баву дакъа гивусса геройнал сурат хияллаву сакин даврин, га хъхъичІ ацІан аврин кумаг къабайссар.

Лахълахъисса назмулул макъулулчІан гъансса гъавас оърчІаву хІасул баншиврул учительнал дурчІайссар га произведение бувчІин бан къулайми къяйдарду.

Ласунну Б. Рамазановлул чирчусса «Интнил марч» тІисса назму. Ва назму лахълан хъхъичІ оърчІахъ бусайссар Б. Рамазановлул оърмулул ххуллуя ва творчестволуя, дакІнин бутайссар ялавайми классирттаву лархъхъусса ганал творчестволуя дакІний ливчІмур. Агарда оърчІал га назму лахълансса чІумуйнин интниясса сочинение чирчуну диркІхъурча, гиву чІалачІи дурну диркІсса интнил лишанну дакІнин дичайссар, къачирчухъурча оърчІашал интнин хасъсса хасиятру ххал дигъайссар.

Бусайссар Б. Рамазановлул сюжет дакъасса лирикалуву ва назмулул агъамсса кІану бугълай бушиву, шиву аьч буллай бушиву гужсса асарду, хъунисса шугълурду, лагма-ялтту хІакъну дусса дуниял, буттал кІанттул тІабиаьт, гъарца къини хъанахъисса ишру. Бусайссар мукунма назмулуву чІалачІи бувну бушиву дунияллул гъарцагу ххуйшивурттах лап аьжаивну личІлулну уруглагаврийн шаэрнан цІусса журалий ххал хъусса оърму. Мунихлуну чІалай бушиву шаэрнан чІявусса лагма ялттумур хІисавгу хъанахъишиву – аьнакІул оърчІайсса парх бивкІсса къувлул аьнтІикІашивугу, дуссукъатлул ялусса кІулшул пуркІуврал къанкъгу, цІуну бувсса оърчІал яру тІитІайсса кунма, хъя тІисса интнил мурхъирдайсса къупругу, ватандалул архсса дазурдай бавцІусса боецтал – къаралчиталгу.

БувчІин байссар «Интнил марч» тІисса назмулуву метафорический гъануну ларсун душиву мурчал сипат, цурдагу муданма хъхъичІунмай хІарачат буллалаврил, хъинчулийсса луглагавурттал, лавайсса мурадрал цІаний дакІ гъалак дуклакаврил лишанну хъанахъисса. Укунсса

журалийсса ихтилат оърчІащал бувну махъ бучІайссар назму пасихІну оърчІахъ дуккаврийн.

Лирикалул произведение лахълахъссса дарсирай назму дуккаву дарсирал яла бюхттулмур даражану (кульминацияну) хъанай бур.

Амма чІявуну оърчІал назму дуккаву ххару, ритм, рифма хІисавравун къаларсун, назмурдал мазран хасъсса ляличІишивуртту хІисавравун къаларсунна дувай. Назмурду дуклакини чарабакъа бургаву дан аьркинссар шеърилул хха букваврих, мунил дайлитІулий буккун цанмавагу хавар бакъанма чансса чІумуйсса бавцІуну лякъайссар, му паузалул шеърилул ххару кунния ку личІи байссар.

Классравусса учительнал букваву му яла оърчІан бувчІайсса, миннан гъансса лирикалул произведение утта буккан баву хъанай дур. Учительнал пасихІну дурсса буквавил кІану я магнитофондалул плёнкалийн лавсъсса артистнал буквавил, я радиолувухсса дикторнал буквавил къабугъайссар.

Ляхълахъссса назму учительнал дуккан аьркинссар кІила, анализ даннин ва анализ дурну махъ, хъхъичІмур букваву дайссар учительнал, кІилчинмур му букваврин хъхъичІава хІадур увсса дуклаки оърчІал.

Дуклаки оърчІру пасихІну букваврих къайгъулий буругланшиврул вичІи дирхъуминнахъ цала дуснал букваврин къимат бишлаши байссар. Учительнал цала букваву дикІан аьркинссар пасихІсса, оърчІал дакІурдин асар биян буллалисса, амма мунил учительная артистная куннасса букваву тІалав къадуллалиссарча, филологиялул кІулшиву ларсъсса гъарцагу инсаннан лайкъсса пасихІсса буквавил бюхъу тІалав буллалиссар. ПасихІну букваву дакъа, литературалул дарс дишайсса учительнан программалул дуклаки оърчІая дакІних лахъхъин тІалав буллалисса лирикалул произведенияртту цанмагу кІулну бикІан аьркинссар.

Назму пасихІну дуккин лахъхъин баву – му пасихІну буквавил гъанур.

Назмурду пасихІну дуккин лахъхьин баву цуксса агъамсса масала бунугу – му лирикалул произведение лахъхъаврил шалва мурад бакъар. Назмурду лахълахъисса дарсирдай оърчІал дикция, буквавил даража гъаз баврин хас дурсса давуртту дайссар, амма вай гъарцагу давурттал яла агъанмур цуппа произведение лахъхъаву бушиву хъамабитан бан къабучІиссар.

1) Назмурду дакІних лахъхъаву

Назмурду дакІних лахъхъаву мударгу пасихІну буквавилшал дархІуну дикІайссар. ДакІних назму ягу произведениялул бутІа лахъхъаврил дуклаки оърчІал маз пасихІ шаврин, память итххяххаврин хъуннасса агъамшиву дуссар.

Дуклаки оърчІан программалул дакІних лахъхьин ккаккан бувсса цинявгу произведенияртту кІулну бикІан аьркинссар.

Назму лахъхьин бигъану бикІаншиврул оърчІал назмулуву гъалгъатІимур хъхьичІ бацІан бан, хияллаву мунил сурат хІасул дан кІулну бикІан аьркинссар. Назмурду дакІний личІаврин хъуннасса агъамшиву дуссар мунил эькинанисса, вив итабакьин, дакІний личІан бигъа буллалисса рифма дусса ххуттардил. Назму оърчІащал дакІних лахъхъаву учительнаща шаллу дан бюхъайссар личІи-личІину.

Масалардан ласунну укунсса дарс. Учитель увххун классравун дайдишайссар дарс, цурдагу шардай дуллусса дарс цІуххаврия дакъарча Аь. Оьмаршаевлул «ХІухІалал балай» цала учительнал дакІних классрахъ буквавилрия. Ттул пикрилий, ва балайлун цукунчІавсса бувчІин бавуртту аьркинну дакъар, агар учительнаща ва дакІних хъунмасса гъавасращал, ххуйсса макъулушал, шиву шаэрнал чІалачІи буллалисса захІматрахсса гъира чІалачІи бувну, буккин бюхъарча ва му кунмасса асар оърчІайнгу биян бан бюхъарча. Балай бувккун махъ ца минутрайсса учитель къаагъайссар. Яла маслихІат байссар оърчІан балай дакІних лахълан байбишаву.

Цаппара минутирттава оърчІал лахьлахьаву дяличІан дурну, учительнал цума оърчІ цукун назму дакІних лахьлай урив цІуххайссар. Му суалданун жаваб дулун оърчІан захІмат шайссар. Му оърчІан дакІних лахьхьайсса куц бувчІин бан яла сант думур чІунни.

ОърчІахь бусайссар учительнал цал хьинну пикри итабавкъуну дуккин аьркиншиву назму. Дурккун, шаэрнал цала назмулийну учин ччимур ххал бигьайссар. Ялагу буккин байссар хьхьичІсса мукьва хха, духьурча рифмарду ххал дигьайссар ва дакІний ританмур байссар. Буккин байссар кІилчингу, дакІний ливчІмур ххал байссар ва мурад цІуххайссар. Мурад оърчІал му чІумал луттирал мазрайну буслан бикІайссар. Цаппараннал мунийннин дакІних лахьхьайссар. Мукунма бучІиссар лахьхьин гайми куплетругу. Дарсирал ахирданийнин оърчІал шала назму лахьхьайссар. Миннахьхьун шардай цамур давуку къадулайссар.

Ва даву дуллай гьан дурсса дарс оьнна ларгсса ххай бакъару.

## **V. АРУЛЧИНМУР КЛАССРАВУ ОЪРЧІАЛ ДАКІНИХССА ВА ЧИЧРУЛИЙНУССА ГЪАЛГЪА МАГЪИР БАВУ**

Арулчинмур классраву оърчІал гъалгъа магъир баврил даврин ккаккан дурну дур 10 ссят. Ва ккаккан дурсса чІумуй дакъассагу, оърчІал маз магъир баврил ялувсса даву учительнал дуван аьркинссар гъарцагу мазрал бикІу, литературалул бикІу дарсирдай.

ОърчІал гъалгъа магъир баву лакрал литературалул дарсирдай дайсса давурттал агъанминнул цану хъанай дур.

Арулчинмур класс къртал бувсса оърчІан, программалул тІалавшиннарайн бувну, кІулну бикІан багълай бур художественный ва элмийсса текстру анаварну дуккин, художественный произведениярду пасихІну буккин (миннувух драматический произведениярдугу), эпический произведениялул ягу мунил бутІул мурад дакІних ягу чичрулийну бусан. Мунаща бюхълай бикІан аьркинссар лавхъхъусса произведениялийн бувну, чичрулий, ягу дакІних сочинение щаллу дан, буллусса суаллан щаллусса жаваб дулун, произведениялул геройтуран кымат бищун, дакІних мукърттийну лавхъхъумунил сурат дан. Ялагу мунан кІулну бикІан аьркинссар произведение чивчума, ганин цІа ва цІанил мяъна, лавхъхъусса произведениялул мурад, гиву гъртту хъанахъисса геройтал ва хъанахъисса ишру кунницІун ку бахІин, гивусса мазрал пасихІшиврул ярагъру ляхълан ва произведениялунсса гайннул агъамшиврия бусан.

Вай ва цаймигу бюхърду оърчІаву сакин хъуншиврул, учительнан аьркинссар гъарца мазрал ва литературалул дарсирдай гъалгъа магъир баврил ялун зун.

Учительнал хъхъичІ бавцІсса гъанусса масалану хъанахъиссар, пикри бувну, маз магъир бан ишла дайсса къяйдарду личІи даву.

Арулчинмур классраву оърчІал маз магъир баврил ялун дайсса давуртту ялавайми классирттаву мазрал ялун дуллай бивкІминнуйн чул

бивщунур дайсса. Мукунсса давурттуну хъанахъиссар учительнал пасихИсса буккаву ва бусаву, художественный произведениялул хъирив лайни дуклаки оърчІру ихтилатравух хІала буххан баву, личИи-личИсса журалул мурад бусавуртту, классрал къатІув бувккусса луттирду ххал бигъаву, ххал дурсса киносуратрая, телепередачалия бусаву.

Гъалгъа магъир баврин хас дурсса дарсирдай оърчІащал дайссар мазрал пасихИшиврул ялувсса ва мукъул ялувсса даву. Ми давуртту даван аьркинссар произведение лахъхъаврил гъарцагу шачІанттуй: байбихъулул дарсирай, произведениелушчал кІул хъанахъини, хъирив лаллалини, жям бай дарсирдай.

Школарттай чичрулийнусса ягу дакІнихсса маз магъир баншиврул яла ишла дайми къяйдардуну хъанай дур текст пасихІну дуккаву, бувккун, дакІний ливчІмур чичаву, бувккумунил мурад бусаву, цукунсса бунугу хавардания ягу текстрая ихтилат баву ва мунин къимат бищаву.

Текстрал ялувсса даву дайни яла чІяруну ишла даймур къяйдану хъанай дур оърчІащал текстрая ихтилат баву (беседа). Мунил оърчІал маз итххяххаврин, пикри буллали баврин агъамшиву дуссар.

Бувккумунил щаллусса мурад бусласини, мукъурттил хъирив бацІавугу дайссар, миннул пасихИшиврул ярагъругу ххал бигъайссар.

Литературалул дарсирай гъалгъа магъир баврил ялувсса даву мудангу дархІуну дикІайссар мазрал дарсирдайсса маз магъир баврил даврищал. Художественный текстрал маз ахттар баврил оърчІру кІул байссар ниттил мазрал ляличИшиврушчал, чичул мазрал хасиятращал. Чичул мазрал журалул хъирив лаяврил оърчІаву пасихІну гъалгъа бансса бюхъу сакин байссар. Маз магъир баврин хас дурсса давурттал оърчІан кунницІун ку бавхІуну гъалгъа бан, чичлан кумаг бантІиссар.

## 1. Цаннал ихтилатрал ялувсса даву.

Цаннал цала гьалгъа – му хъанай бур гьалгъа тIима цама ихтилатчи акъа цувалу гьалгъа тIий ухьурча, гьалгъатIий ягу чичлай.

Цаннал гьалгъа сакин хьуну бикIайссар куннил хьирив ку ца пикри бусласисса ца темалун хас дурсса предложениярдая.

Цаннал ихтилатрал агьамшиву дуссар цала гьалгъалийну учин ччимунил мурад чIалачIи бавриву, мурадгу бавхIуну бикIайссар цукунсса дунугу темалушал. Темалух бурувгунни мурад ва тIутIимунил гьанусса пикри бусайсса ва чичайсса.

Цара-ца темалия ихтилат бан бучIиссар личIи-личIину, мунил мяъналух бурувгун.

КунницIун-ку бавхIуну, бувчIинну гьалгъа бан лахьхьин баншиврул, дуклаки оьрчIаву сакин бан аьркинссар мунин аьркинсса журалул бюхьурду.

а) гьалгъа хас бувсса темалул мурад, мяъна бакIравун итадакьин;

б) темалул мурад чIалачIи бан кумаг бансса материал датIин ва му материал куннил хьирив ку тIайлану бусансса чичинсса план сакин дан;

в) чичлачини мазрал пасихIшиврул ярагъру, фразеологиялул оборотру ишла дансса бюхьу хьун бан.

Вай бюхьурду щаллу шайссар гьарца журалул къяйдарду оьрчIал пикри авадан бан, пасихIну ихтилат бан, лахьхьин байни ишла дарча.

Цукунсса бунугу суал ххал бигьлагьини, классраву уттарашиву хьуншиврул, дуклаки оьрчI ва учитель цаннан ца бувчIлай бикIан аьркинссар.

Цайнува цала ихтилат бан лахьхьин байни, куннашал куннал буллалисса гьалгъалул тагъар сакин даврил оьрчIру цала пикри бусан кIункIу байссар.

Масала, оьрчI буслан икIайссар бувккунсса луттирал геройнаясса цала пикри, цайнува цала бувккун, цанма ххуй бивзсса бутIул мурад.

## **2. Мурад бусаву ва мунил оърчІал маз магъир бавринсса агъамшиву.**

ОърчІан цайнува цивппа гъалгъа тІун лахъхъин буллалени, хъуннасса агъамшиву дуссар личІи-личІисса журалул мурад бусаврил.

Щиха бунугу лавхъхъуну мурад бусан хІарават баву – му маз магъир баврил хІурамур къяйдану ккалли дан къабучІиссар.

Бувккумур цІунил дакІнин бутаврил оърчІан кІулмур гъарта байссар, цавувагу чичлансса бюхъу сакин байссар.

Лавайми классирттаву текстрачІан гъансса, кутІа дурсса, цумур бунугу бутІа язи бувгъуну личІи бувсса бутІул мурад бусаву ишла даву хъинчулий ккаклай бур.

Вай цинярдагу журалул мурад бусаву даншиврул, цила багъайкунсса хІадуршин дикІан аъркинссар – текст цавура цала дуккин, лахъну дуккин, бувккумунил план сакин дан, захІматсса махъру ва калимартту дакІний дитансса хІарачат бан. Текстрал мурад бусаврил циняр жуарду ишла дайссар маз магъир баврин хас дурсса дарсирдайгу, литературалул произведение лахъхъаврил циняв шачІанттайгу.

Произведение лавхъхъуну, ганил анализрайн хІадур буллалисса дарсирай бучІиссар оърчІая тІалав дан личІи-личІисса бутІрал мурад бусаву.

Художественный произведение дахъва буклакини, лахълахъини, оърчІал учительнал каялувшиврийну мурад бусаву дайссар: бусанмунил план дайссар, текстраву хъунабакълакьисса, оърчІан захІмат бизан кунмасса махъру ва калимартту доскалий чичайссар. Мунил мурад куннил хъирив ку тІайлану бусан ва бусласимуниву чичул маз ябан кумаг байссар. Мурад бусаврил хъуннасса агъамшиву дуссар оърчІан текст дурчІлачІисса куц, мунил биян буллали асар, мунил чулухунмайсса миннал пикри кІул баврин.



Художественный произведение лавхъхъуну, ганил хъирив лаяву куртІну дуллалени, учительнал личІирасса ургаву дайссар текст чирчусса журалух – хавар бусаврил журалий дурив, текстраву чивчумунил сурат хъхъичІ дацІан дуллалисса куннасса бусаврил журалий дурив ягу цала пикри-аькъулулул къувкъумур бусласисса куннасса журалий дурив.

ОьрчІан мурад бусан яла захІмат шайссар шамилчинмур жура.

Укунсса текстрал мурад бусаннин ххуйну хІадур хъуну, текстрава гъанумур пикри личІи бан хІарачат байссар.

БучІиссар ва журалул текстрал мурад бусаврил план суаллал жавабирттал журалий сакин дангу.

Цала ссая бунугусса пикри аьч буллалисса текстрал мурад бусаву дуллалени, дуклаки оьрчІал хІарачат бан аьркинссар бувчІин чичу произведениялийну учин ччай ивкІмур, му бувчІиншиврул ганал цала произведениялийну учин ччай ивкІмур, му бувчІиншиврул ганал цала произведениялуву ишла бувсса мазрал пасихІшиврул ярагъру. Мукунма мурад бусаврил кумаг байссар дуклаки оьрчІан бувчІин геройнал дакІнил хІал.

Гъарца журалул мурад бусаврил, художественный произведение лахъхъаврил личІи-личІисса шачІунттай бикІайссар цила мурад. Произведение лавхъхъуну га куртІну ххал бигълагъини ишла дайссар личІи бувсса бутІрал мурад бусаву. Учительнал ччянива хІадур бувну, бусайссар геройнал хасиятран къимат башлашини цуми кІанттурдах ябурган бантІиссарив. Масала, 7 классраву «ХІухчу Рамазан» тІисса хавар лахълахъини учительнаща мурад бусан личІи бан бюхъайссар бутІри:

1. Лакрал щархъал ахІвал.
2. Та чІумуву ялапар хъанай бивкІминнал оьрмурду;
3. Цивппа бакІ букканшиврул инсантурал ляхълай бивкІсса шартІру;
4. ОьрчІал революция хъуннинсса оьрму;
5. Революция хъуну махъсса инсантурал оьрму.

Литературалул дарсирдай чІяруну ишла дайссар кутІа бувсса мурад бусаву, цанчирча хъунисса произведенияртту лахълахъини щаллусса мурад бусаврин хъуннасса чІун харж хъанай дунутІий. КутІану мурад бусаву – му хъанай дур яла агъанми кІанттурду личІи бувсса мурад бусаву. Укун мурад бусайни ххуйну кІулну бикІан аьркинссар текстрал мурад, бувчІлай бикІан аьркинссар ганил сакиншинна ва гъанусса мурад.

### **3. Чичрулийнуса гъалгъа магъир баврил къяйдарду.**

Чичрулул давуртту литература лахъхъаврил гъанусса бутІану хъанахъиссар. ОьрчІал маз итххяххан баврин чичрулул давурттал хъуннасса агъамшиву дуссар.

Дуккавил шинал мутталий учительнаща бюхъайссар программалул тІалав дуллалисса чичрулул давуртту дан четвертирттайх дарчІуну.

Арулчинмур классраву дуклакисса оьрчІаву ялавайми классирттаву сакин хъусса чичрулул вардишру цІакъ дайссар, му давугу чан-чанну тІий захІмат дуллай дачин дайссар. Му бакъассагу арулчинмур классраву оьрчІру кІул шайсса цІусса чичрурдал журардащалгу. Лавайми классирттавусса чичрулул давуртту оьрчІан захІматссар, агар байбихъулул школалий миннащал цила багъайкунсса давуртту дуллай къабивкІхъурча.

Аьдатрайн бувну, литературалул дарсирдай дайсса гъануми чичрулул давурттуну хъанай дур изложенияртту, сочиненияртту. Изложениярттал мурад хъанай бур дуклаки оьрчІал цала бувккумунил, ягу цанма бавмунил мурад щаллуну чичин лахъхъин баву. Миннул журардугу дур личІи-личІисса: оьрчІан хъхъичІара кІулсса текстрайн бувсса, кІул дакъасса текстрайн бувсса, хІадурнасса пландалийн бувсса.

Сочиненияртту чичайссар лавхъхъусса художественный произведениярттайн, оьрчІал цала тІабиаьтрал хъирив бацІаврин, суратирттайн бувну.

ОърчІал гьалгьа магьир баврин хьуннасса агьамшиву дуссар литературалул хрестоматиялул методикалул аппаратрал. Цайми тарбиялул масалартту шаллу баврищал архІал мунил оърчІал маз магьир баврингу хьуннасса агьамшиву дуссар.

ОърчІал гьалгьа магьир баврин хас дурсса давуртту ххал дигьлагьини учительнан дакІний бикІан аьркинссар хрестоматиярдаша циняр чичрулул давурттал жуларду ккаккан дан къабюхъайшиву, миккусса чичрулул давуртту произведениярттацІун дархІусса душиву, гайми чичрулул давуртту программалул тІалавшиннарайн бувну, цанна хІадур дан багьантІишиву.

Даврил къяйдалух ва масаларттах бурувгун изложенияртту дуссар кІира журалул – чичин лахъхьин буллалисса ва лавхъхьумур ххал бигьлагьисса, му даврил хасиятрах бурувгун дикІан бюхъайссар текстрачІан гьансса, кутІасса, личІи бувсса произведениялул ягу хаварданул бутІуйн бувсса, ялун ххи дурсса заданиярттащалсса, сочинениялул элементирттащалсса.

Лавхъхьумур ххал бигьлагьисса (контрольные) изложенияртту миннул журалух къабурувгун яларай ккаккан дурсса куннасса къяйдалиий дан бучІиссар.

Учительнал кутІану изложение даврил мурадраясса ихтилат байссар, дуккайссар текст. БувчІин байссар оърчІан захІмат хьун кунмасса махъру, ми доскалий чичайссар ва план дулайссар. Текст дуккайссар цал ялагу, мунияр махъ оърчІру изложение чичлай байбишайссар.

Контрольный изложение дуллалини, оърчІахъ, цахъва мурад бусан къабайссар.

Вайми лахъхьин бай изложенияртту даврил къяйдарду миннул хасиятрах бурувгун даххана шайссар. Масала, текстрачІан гьансса, щаллуну гьарзад чичайсса изложенияртту кутІасса изложениярттаяр оърчІан чичин бигьассар.

ТекстрачІан гъансса изложенияртту оърчІал чичайссар авторнал маз, ганал калимартту ишла дуллай. Изложениалунсса текст оърчІан кІулсса, гайннал лархъхъусса духъурча, му хъиннува хъинссар.

Учительнал изложение чичлан хъхъичІ бувсса ихтилатрал, буллусса суаллал оърчІан хаварданул гъанусса мурад, гивусса геройтурал хасиятру, чичул маз дакІнин бутан кумаг бантІиссар. Мура чІумал, учительнал оърчІашал цаппара захІматсса мукъурттил, калимарттал мяъна дакІнин дичайссар. Текст лархъхъусса духъукун, оърчІаша куннил хъирив ку тІайлану агъанми кІанттурду къакъабивтун изложение чичин бюхъайссар.

КутІасса изложенияртту чичаву оърчІан захІматссар.

Мукусса изложенияртту дайни, оърчІан кутІа дан бигъасса текст дурчІайссар. КутІа дур изложениалул мурад хъанахъиссар текстрал мурад кутІану бусаву, мугу авторнал гъанумур пикри, хавардануву буминнал хасиятру, ишру баххана къабувну.

Текстрал ца бутІул изложение дуллалисса чІумал, яни текстраву язи бувгъусса бутІул изложение дуллалини, шала материал къачичайссарча, ганива учительнал личІи дурсса темалия чичайссар, цурдагу ччарча щаллуну, ччарчагу кутІа дурну. Ва журалул чичрулул агъамшиву дуссар оърчІан кІулсса щаллусса произведениялувату ккаккан дурсса темалунсса материал личІи дан бюхъавур.

Изложениярттащал архІал арулчинмур классраву чичайссар сочинениярттугу. Хъиннура хъуни дакъасса сочиненияртту оърчІал чичлай бивкІссар ххюлчинмур ва ряххулчинмур классирттавугу. Сочинениярттаясса тІалавшинна классрава классравун хъун дайссар.

ОърчІал сочинениярдая гъанусса тІалавшиннану хъанахъиссар миннаща цала аькълулул къувкъумур, цала пикри куннил хъирив ку чичин бюхъаву.

Сочиненияртту темалух ва журалух бурувгун личИ-личИссар (оьрчІал цала оьрмулул опытрайн чул бивщуну чичайсса, суратрайн бувсса литературалул произведение гьануну лавсун чичайсса).

ОьрчІал цала опытрайн бувну чичайсса сочиненияртту миннал оьрмулух бурувгун даххана шайссар. Сочиненияртту чичайссар оьрчІан циняннан хасьсса иширттая, миннал аьмну дуллай бивкІсса давурттаяту. Масала, «Ссутнил лишанну», «Шяравун инт дуркІунни», «Ттул нину», «Ххувшаврил байран», «Ттун ххуй бизайсса пиша» ва м.ц.

Литературалул произведениялийн бувну сочинение чичлан байбихьлахьисса чІумал, булайссар суаллу. Ми суаллансса жавабирттайну сакин шайссар хьун бакьасса хавар, чан-чанну тІий сочинениярттал темарду шайссар ва миннал цала произведениялуя, мунил геройтурая, миннал занакьалашиннардая цала пикри буллалимур чичаву тІалав дайссар.

Суратрайн бувсса сочиненияртту дан бучИссар цинявгу классирттаву. Ми дувайссар лахьлахьисса произведениялул мурадрачІан гьансса темалийн бувсса суратирттайн бувну.

Ми журалул сочиненияртту учительнал оьрчІащал цал дакІних сакин дайссар яла чичайссар.

Школалий дувайсса личИ-личИсса чичрулул давурттаву агьанмурну хьанай дур сочинение. Сочинениярдал дур личИ-личИсса жуларду. Яла чІяруну школалий ишла дуллай бур литературалул произведениялийн бувсса ва оьрчІал цала оьрмулуву асар биян бувмунил гьанулийсса сочиненияртту. Вай давурттаву оьрчІал лахьлахьимуниясса пикри бувсун, цайнува цала цукунсса дунугу темалухсса цала бургаву чІалачИ дурну дикІан аьркинссар.

Цуксса хІайпнугу, чІявуми лакрал школарттай сочинениялул ялувсса даврих багьайсса я бурган буллая бакьар. Хьинну чанну дур оьрчІан асар хьумунил гьанулий чирчусса сочиненияртту, лахьлахьисса литературалул

произведениялийн бувсса сочиненияртту тІурча, га произведениялул мурад бусаврин кІура дарну дур.

Ххал бувсса школартгал арулчинми классирттаву чІяруну хьунадакьайсса, сочиненияртгал темарду хъанай дур шиннал чІуннан хас дурну чирчусса, лакку кІанттун, цала шяраваллан ва байрамирттан хас дурну чирчусса сочиненияртту.

Сочинение – му чичрулул даврил личІисса жура хъанай дур. Сочиненияртту чичаврил оьрчІал маз магьир шаврин, литературалул произведение куртІну бувчІаврин ва мунин багъайсса кьимат бищаврин агъамшиву дуссар.

ЛичІи-личІисса темардайн бувсса сочиненияртгал дуклаки оьрчІан цала учин ччимур куннил хьирив ку тІайлану, буклакиманан бувчІинну чичин лахъхьин бан аьркинссар. Амма чІявумур чІумал оьрчІан цанна сочинение чичаврил сававгума къадурчІлачІисса кІанттурдугу хьунабакълай бур. Цила багъайкунсса я му даврих бурган буллай бакъар дарс дихълахъимигу. ЧІявумий кІанттурдай му дарс дишинсса кІулшиву дакъар учительтурачІагу.

ОьрчІал сочинениярттаву яла чІяруну хьунадакьайсса диялдакъашивуну хъанай дур темалун хасъсса мурад къачичаву, произведениялуву хъанахъимунин лайкъсса кьимат бищун къабюхъаву. ЧІяруми сочинениярттаву ишру художественный произведениярттаву хъанахъисса чІумуцІун бавхІуну къабикІай.

Гьуртту хъанахъиминнал сипатиртгал кьимат бишлашини, инсан ялун урган цукунсса уссарив, ганал хасият, тІуллу чІалачІи дурну дур, ганал оьрмулул лагма-ялтту хъанахъимунинсса агъамшиву ккаккан къадурну.

Сочинение чичаврил гъану бизайссар художественный произведениелул анализ дуллалини, чичаврил бюхъу тІурча сакин шайссар ганил гъанусса мяъна кІул дуллалини.

Произведение ххал бигъаврил журалух бурувгун сакин шайссар сочинениярттал жуарду: гьуртту хъанакъиминнал хасиятирттал хъирив лаяву, къимат бищаву – геройнал сипат, гьуртту хъанакъими цачӀу бивхъуну, ххал бигъаву, геройтурал сипатру цачӀу дирхъуну, ххал дигъаву.

Сочинение хӀадур даврил цинявгу шачӀанттай: материал хӀадур дуллалени, чичлачени, чивчумур ххал бигълагъини каялувшиву дайссар учительнал.

Цумур дунугу темалийн бувну сочинение чичин оьрчӀру хӀадур буллалени, ганил гъанусса мурад бакӀравун итабакъин гайннан кумаг байссар, хъирив аьркин дансса материал хӀадур дайссар, сакин дайссар план, яла бучӀиссар пландалийн бувну дакӀних мурад бусан бан ва чичин бан.

ЧӀявуну, оьрчӀал сочинениярттавусса гъалатӀру итххяххан буллаи бур гайннан тема, цала ссаяту чичинтӀиссарив букъавчӀуну личӀаврин бувну, ганил гъанусса мяъна вив итакъадакъаврин бувну.

Сочинениярттал темардал мурадну бикӀан бюхъайссар чичул щалагу творчестволул хъирив лаяву, ганал цаппара произведениярттан къимат бищаву ягу ца произведениялун хас дурсса темалийн бувну сочинение чичаву.

Чичул творчестволух бурувгун сакин хъанай дур сочинениярттал темардугу миннул цӀардугу.

## VI. АРУЛЧИНМУР КЛАССРАВУ ДАЙССА ТЕОРИЯЛУЛ СУАЛЛАЛ ЯЛУВССА ДАВУ

Арулчинмур классраву, хьхьичИми классирттаву литературалул теория лахьхьаврил ялув дуллай бивкIсса даву хьхьичIуннай дачин дурну, куртI дайссар.

Программалул тIалавшиннарайн бувну, оьрчIан дулун багълай бур яла аьркинми дурчIалартту: лахьлахьисса произведениялуя, ганил агъанми бутIрая, миннул чичун учин ччимур бувчIин буллалисса кумагря, произведениялул чичул оьрмулушалсса ва га чивчусса чIумушалсса бахIаврия.

Литературалул теориялул яла агъанмур масалану хъанай бур сипатирттаину оьрму ккаккан баву. Сипатирттаину чичул оьрмулуву циняннан аьмну хьун бюхъайсса ишругу чIалачIи бувну, гайннухсса цала ургавугу чIалачIи дуллай ур.

Литературалул произведение лахьлахьини дуклаки оьрчIру кIул хъанай бур лахьлахьисса произведениялул мурадрашал, гъанусса мяьналушал, гиву гьуртту хъанакъиминнал сипатиртташал, произведениялул сакиншиннарашал мукунма мазрал пасихIшиврул ярагъуннишал ва литературалул произведениярттал журадашал.

Арулчинмур классрансса литературалул программалий дуллуну дур ва класс кьуртал буллалисса оьрчIан кIулну дикIан аьркинсса лагрулийсса кIулшивуртту. Вай кIулшивурттал кумаг бантIиссар оьрчIан цайнува цала бикIу, учительнашал архIал бикIу литературалул произведение бувчIин ва ганин кьимат бищун.

Литературалул теориялул, миннул журадаясса дурчIалартту оьрчIан кIул хьуссар ялавайми классирттавугу. Ми кIул хьуссар назмурдашал, хавардашал, магърашал, учалардашал, бусалардашал.



Арулчинмур классраву ялавайми классирттаву лавхъхьумур куртI бавришал, ттинин хьунакъабавкъсса литературалул теориялул масалартташалгу кIул хьунтIссар.

Литературалул произведениярду цачIун байссар, гайннул къяйдарду, гъавас, лагру, тема хIисав дурну. Гукун цачIун бувсса, муданна ца тIабиаьт дусса произведениярдал журадайн жанрарду учайссар. Гьарца жанралул дур цила тIабиаьт, цила жура. Гьарцагу дуклаки оьрчI бюхълай икIан аьркинссар личIи бан литературалул произведение цумур журалувун багълай буссарив. Чянира шиннайра литературалул произведенияртту чичаврил дур шанна жура – эпический, лирический, драматический.

ОьрчIал я бурган байссар литературалул произведениярттаву оьрму личIи-личIисса чичрулул журадай ккаккан баврих. Укун личIи-личIисса чичаву аьркин дуллай бур инсаннал оьрму личIи-личIисса журадай ккаккан баншиврул: бусса куццуй, цайми инсантурашал, иширтташал бавхIуну (эпос), цувалу пикрирдай, дардирдал (лирика), ахирданийгу давриву, занакъалашивруву, куннашал куннасса бястраву, энадраву (драма).

Эпический произведениярдаву оьрму гьартану ккаккан бувну бикIайссар, инсантурал оьрмулул суратру, тарихраву хъанахъисса, халкъуннал дянивсса ишру чIалачIи байссар.

Вай произведениярдаву чичул чIалачIи байссар ми иширттахсса цала ургаву, миннул чулухунмайсса асар.

Лирикалул произведениярдал аьч байссар асарду, пикрирду, хияллу, шугълурду. Вай назмурдал тIалав байссар вайннун жаваб дулайсса асардугу.

Эпический ва лирический произведениярдашал оьрчIру кIул шайссар дуккавил личIи-личIисса шачIунттай, лакрал ва оьруснал литературалул дарсирдай.

Ялавайми классирттаву миннал личИ байссар шеърирдай ва хаварданий чивчусса произведениярду.

Арулчинмур классраву оьрчІан бувчІин байссар инсантурал бувайсса гьалгьалул ва художественный прозалул дяниву личИшиву душиву. Учительнал му личИшиву бувчІин байни бусайссар художественный прозалулу чичул оьрму яргну чІалачІи бан, оьрмулуву хьунабакьайсса ишру мяълумну ккаккан бан мазрал пасихІшиврул ярагьру ишла байшиву. БувчІин байссар мукума мазрал пасихІшиврул ярагьру ишла баврийну проза поэзиялучІан гьан хьанай бушивруя, амма миннул дянивгу хьуннасса личИшиву душиврия. Шеърирдал хха архІа-архІалсса слогирттая сакин хьуну бикІайссар: миннуву чІявусса чІурдугу кунниха-ку лавхьхьусса бикІайссар. Шеърирдал кІукусса сакиншиннарайн ритм учайссар, ритмалул шеъри бючІан байссар. Художественный прозалулу тІурча цукунчІавсса ритм, рифма ишла къадайссар. Ми дакъахьурчагу прозалул мазгу бикІайссар аьщуйн щусса, бюххансса, пасихІсса.

Прозалул жуларду оьрчІан аьщуйн щуну кІул дан захІмат шайссар, миннул цанна хасьсса, аьщуйн щусса аьдатру дакъанутІий.

Мунияту учительнан хьуннасса, аякъа дан багьай эпический произведениярдал дянивсса личИшиву дурчІин дан. Мунияту оьрчІан бувчІин байссар эпический произведениярдал дайди хьу хавар бушиву, мунияту чичулт бувкІшиву очеркирттайн, повестирттайн ва романну чичаврин.

КІицІ бан багьлай бур цІанасса литература лахьлахьисса элмулул вай эпический, жанрардаясса дурчІала сантирайн дуртун, миннул жулардал дянив ца дазу риршун дакъашиву. Ми дурчІаларттал, гьарца жуларул произведениялун цинна хасьсса хасиятру кІулшаврил хьуннасса агьамшиву дуссар произведениялул хьирив лаяйни, мунил анализ дайни.

Учительнан тІурча къабучІиссар повесть, роман ххал бигьайни дайсса тІалавшиннарду ишла дан магьа, хавар лахьлахьини.

Арулчинмур классрал хрестоматия байбихълай бур эпический балайрдаята. Эпос хъанай бур фольклорданул (халкъуннал дакІнихсса творчестволул) жулардаясса ца. Мунил мяъналух, аъмсса хасиятрах, тематическалух, формалух бурувгун эпос бачІлай бур цаппара жулардайх: вирттаврахасса, тарихийсса, лирикалул ва эпосрал бутІа хІала бувхсса лахъи балайрду (балладарду). Миннувацца чІявумий балайрду лахълай бур школалий, ми цивпагу бавхІуну бур тарихраву, оърмулуву хъусса личІи-личІисса иширтташал ва кумаг буллай бур дуклаки оърчІан хъхъичІазаманнул оърмулул сурат хъхъичІ дацІан дан.

ХъхъичІазаманная жучІанма бивмунил бувчІин буллай бур ччянива жула зунттал халкъуннал дяниву хІала-гъурттушиву цашалла цалла дакъассагу, оъруснал, гуржиял ва цаймигу миллатирттал халкъуннащалгу диркІшиву. Амма мунияр махъ, мангълнал, туркнал, ираннал чапхунчитал дагъусттаннал халкъуннайн дяъвирдай ххяхлай, зулкуаршиврийну цанма ччимур цІакъ буллай, шикку ялапар хъанакъисса халкъуннаща тархъаншиву зехлай, миннал сакин дурмур зия дуллай, миннавусса гъарца, ххуймур бугъ дан хІарачат буллай ттуршрахъул шинну ларгун дур.

Я чил билаятирттал чапхунчитурацца, я кІанттул хан-багтуруаца, куртІсса мяъналул ва гужсса асардал видурцІусса дакІнихсса творчество лещан дан къабювхъуну бур. Ми халкъуннал ляхъан бувсса балайрдал барашин дуллай бур жула зунттал халкъуннал история хъунмасса бушиврул ва миннал цала дакІнихсса творчество ччянияцІара сакин дуллай бивкІшиврул.

Дагъусттаннал эпос арманинал «Сосуннал Давуд», къргъизнал «Манас» кунма лахъисса бакъари. Къргъизнал тарих ца «Манасрайну» биялну чІалачІи бувну бур. Цуппагу кІива-шанма хъунисса луттирду бувгъусса бур. Лакрал ва дагъусттаннал эпос тІурча, лахъисса

бакъахъурчагу, пикри-мяъналул ва къалипрал чулуха щаллуну бартлавгсса бур.

Лакрал литературалул программалийн бувну эпосрал балайрду лахълай бур ряххулчинмур, арулчинмур, аџулчинмур классирттаву. Лахъи балайрду лавхъхъукун оърчѠру миннул жулардащал ва хасиятирттащал кѠул байссар. Ххал бигъайссар оърчѠащал миннул жуларду цанния ца ссайну личѠи хъанай бури. Бурганну арулчинмур классраву лахъхъайсса «Хан-Муртазааъли» тѠисса лахъи балайлух. Шиву хъуннасса бургаву дурну дур виричунах, мунал талатаврих, гъунарданух, гужрах ва къириятрах. Муртазааълил сипатрайну халкъуннал яхѠгу, буттал кѠанттухсса ччавугу, душманнайнсса зидгу иширайну ккаккан бувну бур. Балайлул дайдихъулий тамансса кѠану бувгъуну бур тарихрал иширттал. Ххуйну хѠисав дарча, ми ишру ваца хъхъичѠ махъ кунма, Надир-шагънал циксса ттупру, ттупангру бивкѠссарив, цукунсса билаятру цайнма мютѠи бувссарив чѠалачѠи буллай бур: «Аърщарай шамаксса душманнал аърал битѠикъукъулт кунма ялун бавчуна». ЧѠалачѠисса куццуй, ва балайлул хъхъичѠмур бутѠа буслай бур цукун къуват бусса душманнащал Муртазааълин иллан багъссарив. Вай гъарца зад тарихраву хъуну бур. Амма балайлул хъунмур бутѠа Муртазааълил сипатрал, му иллалисса куццул, душманнал аърал бас бувну, къатѠ буллалавил, мунал буллалисса гъалгъалул бувгъуну бур. Укунсса задру ца инсаннайну ккаккан буллалисса эпос вирттаврахасса балайрдал журалувун багълай бур.

Ва балайлул сакиншинна ххал дигълагъини оърчѠал я бурган байссар шивусса пасихѠшиврул личѠи-личѠисса формардах. Шиву хъунадакълай дур хъуни бавуртту (махъ хъун бувну бусаву – гипербола «Цавай яру бури бярдуну кунмасса, царай утгусрийксса цал кару дури»), лашанбавуртту («ялув ссавниятуну паранну кунна»), метафора («обѠтул гъухъ», «гъалбурѠил кару»), эпитетру («кѠирисса някѠ чѠутѠул», «чѠарасса къюкъа», «някѠ ссавниясса» ва м.ц.). Вай пасихѠшиврул аьламатру дархѠуну

дур эпосрал мяъналушал, муниву учин ччимунишал. Ми цила-цила кІанттаун руртун балай сакин бавриву дур мунил хъунмурчІинсса ххуйшивугу.

Миву буллалисса гъалгъардал (диалограл) хъинну куртІ дурну дур Муртазааълил сипат, мунал талатаврил жура, чурххавусса къувват ва циняннан (душмантуран ва дустуран) эбратну чІалачІаву.

Муртазааълил буттащалмур гъалгъалуву хъиннува куртІ дурну дур мунал цукун махІаттал хъунсса виричушиву дуллалиссарив ва цукунсса хІал чурххайн бувккун буссарив.

Буттал кІанттул цІанийсса дяъвилуву Муртазааъли чІалачІи увну ур ца чулуха хъуннасса караматрал заллуну, кІилчинмур чулуха, шавурдугу дияйсса, цІунгу бикІайсса, угу уххайсса, цайми зияннугу шайсса инсантуравухсса инсанну. Амма душманнаяр ххув къавхъуну ярагъгу шяв бихълай акъар.

Арулчинмур классраву лахъи балайрдащал лахъхъайссар балладардугу. Балладарду хъанай бур эпосрал ца журану. Балладардаву тарихийсса кІанттурдая бусласаву чан хъуну, виричувшиврийсса ва лирикийсса иширттая гъарзану бувсуну бикІайссар.

Балладалуву ми кІивагу зад хІала бувххун бикІайхъурчагу, ми щаллу хъусса жанралул ца журалий ккаккан бувну бикІайссар. Инсаннал дурсса виричушиву, мунал пикрирду, дардру, эшкъи-ччаву иширайну чІалачІи дурну дикІайссар. Балладардаву чІявуну караматсса, дакІнин къабагъансса затирттая бувсун бикІайссар. Масалдаран ласурча «Гъалбарці Аълил» тІисса баллада, шиву хъуслилшиврий хъуними уссурваврал чІивима ивкІлай ур.

Бусайссар дуклаки оърчІахъ балладардаву цайва виричунай аъй дакъасса бивкІу (бивкІурду) шайшиву. Миву ккаккан дурну дикІайшиву хантурал, багтурал, аваданминнал куннащал куннал, ягу халкъуннава увксса виричунащал дуллалисса ччалаччавуртту, литІлатІавуртту, ххуйма

хъяврин увну, мунан зиян бавуртту, душнил ва оърчІал ара зия дурну, миннал бакІрачІан бувкІмур бусласавуртту. ЧІявумур чІумал, ххуй бакъасса инсантурал цана хас акъаманащал талатаву дайшиву къюлтІну, хъяврин увну. Бусайссар мукунмасса задру шайшиву уссурваврал дянивгума, ялув кІицІ лавгсса балладалуву кунма.

Цимивагу баллада ххал бивгъуну, оърчІан миннул хасият кІул хьукун, миннаща балладарду байми журалул эпический балайрдая личІи бан бигъану хъунтІссар. ЧІалачІисса куццуй, балладарду бюххансса, дакІнин асар хъунсса, вирттаван ккавкмур дакІнивун къувтІуну, бакІрава къабуклакисса бур. Мугу пасихІсса мазрай балай баву дакъасса, мунил сакиншиннарал ва темалул ляличІишиву дур.

Арулчинмур классраву оърчІру кІул шайссар эпический произведениярдал цамургу журалушчал – баснялушчал. Баснялул гъану хІайвантрал, жанавартрал миннувухва хІала инсаннал сипатру дурну, миннул мазрайну, рихшантрай, чулий мяъналий, сатиралул журалий увкусса махъру хъанай бур. Щил маз ишла барчагу, баснялуву дащуй дирхъуну дикІайссар инсантурал оьккимий хасиятру, дуллалисса даву, багъу-базу. Басня къртал шайссар насихІатрайну, мораль бусаврийну. Мивугу учин ччимунил гъанусса мяъна дуссар. Ца-ца чІумал мораль бикІан бюхъайссар баснялул бакІрайгу.

КІай ларай кІицІ ларгсса баснялул хасиятирттая дуклаки оърчІахъ бувсун махъ, бувчІумур цІакъ бан бусайссар жула лакрал баснярду чичултрая ва дакІнин бичайссар оьрус литературалул дарсирдай лахъхъайсса баснярду ва ми чивчуми.

Лакрал акъа дагъусттанналгу хъхъичІа-хъхъичІсса басня чичу хъанай ур Гузунхъал ХІасан. Арулчинмур классрал программалийн бувну оърчІал лахъхъайссар Гузунхъал ХІасаннул чивчусса «Юсуп-ханнал ажари» тІисса басня.

Оьрмулул кьура шин хьуну Гузунхьал ХIасаннул чивчуну бур яла гужмий произведениярдаву агьамсса кIану бувгьусса басня «Юсуп-ханнал ажари». Чичул му баснялул гьануну лавсун бур Кураллаву хьусса иш.

«Документирттал бусласаврин бувну, кураллал агьалинал цала оьрмулул кьурчIишиврия, ккашийх бувккун нанаврия, Юсуп-ханнал буллалисса зулмурдая, ласласисса хьунисса налогирттая округрал начальникнайн аьрзарду чивчуну бур. Ми ххал бигьин лавгун ивкIсса Лорис Меликов агьалинал тIимур тIайла буллай цаярва хьунаманайн чичлай ур: «Кураллал хан, генерал-майор Юсуп-баг шиная шинайн цала аьрши гьарта-гьарза дуллай, дагьиялийну ва арцуйну налогоу хьуни дуллай, миннул ахир кьачIаландиркIукун халкъ ссавурдания бувккун бур...»<sup>1</sup>. Ва оьрмулуву хьусса иширайн бувну Гузунхьал ХIасаннулгу басня чивчуну бур. Шаэрнал ажарттул образрайну халкъуннал тагьар цукунсса дуссарив яргну чIалачIи буллай ур.

Кураллал жяматру иттипакъ хьуну  
 Хьунмасса ажари машан лавсун бур,  
 Мунил кьув бивтуну, тIинтту риртгуну,  
 Му сагьну бунува кIачIа бувну бур.  
 Памушник щяивкIун ишру ххал байни,  
 Мунал усттурданий ажаригу хьур.

Цуксса усттарну Гузуновлул аьркинмур бувчIин буллай урив чIалай бур ялаваймур бутIуй. Ажари столданий хьуну махъ, халкъуннал:

Вакилтурал кунни, жул аьрза бакьар,  
 Вана ва ажари винма чIалай бур.

«Жул аьрза бакьар», – мьайжаннугу, аьрза бакьарив? Аьрза бур, цуппагу хьунмасса. Амма вакилтал нигьа бувсун бур цанма танмихI кьабан. Шаэрнал тIурча, цинма хасьсса баснялул формалий, тIайлану

---

<sup>1</sup> Кассиев Э.Ю., Ахмедов С.Х. Дагьусттаннал литература. Махачкала, Дагучпедгиз, 1992 г.

бувчІин бувну бур вакилтал циван къабивкІун буссарив, миннал гъарзад ажарттуйн циван бутлай буссарив. Ажари тІурча, бивзун, э-оь-гу куну, нигъагу къабувсун, халкъуннал тагъар цукунсса дуссарив тІайлану бувчІин буллай бур:

Ва бала мусиват ттуй бувсса кунма,  
 Кураллал биляят укун буссари.  
 Кураллал аьрщарай кІулли тІуркІу тІий,  
 Дуканмур, лахханмур дакъа буссари.

Баснялуву мунин савав Юсуп-хан ва мунал къуллугъчитал бушиву хъинну мяълунну ва шаллуну чІалачІи бувну бур.

Амма «ажарттул тІимур бан, Юсуп-хан укъан увну, цама начальник ивтессар тІий халкъуннан ялттува баян барчагу, къюлтІну хангу цала кІанай ивтун, мунал помощникнугу «начальник» ивтун ур. Аьрзачитурал оьван ми кІиягу бавкъуну, халкъуннай буллалисса зулмурду хъиннува гуж бувну бур.

Шаэрнан чІалай бур аьрзардаину цичІав къашайшиву. Амма халкъуннал тагъар, миннал пикрирду ахІвал ххуй бан буллалисса хІарачат тІайлану ккаккан баву хъунмасса задну ккалли бан бучІир. Шяир хъинну вихну ур цамур, цІусса оьрму бучІантІишиврий:

Апарин, ажарий, ина бувунни  
 Мискинтурал ялув хъунисса ишру.  
 БучІанссар замана, турду рищунссар,  
 Зулму яла лавгун, рахІат хъунссару.

Шаэрнал ккаккан буллай ур зулмулул личІи-личІисса чуллу. Цала захІматрай, дакІ тІайлану яхъанахъисса инсантал хъяврин буллалаву, хІилларду, макрурду буллалаву – му хъиннува захІматсса зулму хъанай бушиву. Гузуновлул цулкІлул, бурцІил, варианттул образирттайну ккаккан буллай ур макрурдаву заралсса «микробру» бикІайшиву. Масала, чІярусса



шиннардий цила билаятрай ххаллилсса урттуву, тІутІаву, багъирдаву  
буллуѓърай яхъанахъисса варианттухъ хІиллакар цулкІлул тІий бур:

Ва кІантту ттуллихха, ина циссара,

Вил ихтияр цири, изму щияри?

Микку варианттул ва цулкІлул дя-зума даншиврул судрайн булун  
хІукму бувну бур. Шариабтрал дивандалий (судрай) къадишиву дан  
цулкІлул бурцІин оввукун, загълунсса варианттуя му ниѓабусарчагу,  
хІухчил хъа биширча, гъарзад ххуйну хъунтІиссар куну, цулкІлул му рязи  
буллай бур. Судрал хІукму бувну бур варианттуй хІухчил хъа бишин. Цила  
мазран ва цинма бан нанисса бала щуркІал хъуну, варианттул хъап куну  
бувѓуну, тихунмай, шихунмай палцІ буллайгу бивкІун, бувххукун ратІув  
эќи бувтун гъан бувну бур.

«Варанттул дикІуя махІрум хъурчагу,

Душман ивкІу мурад цулкІлун булун бур»

– тІий ур шяир. Махъа-махъгу баснярдай бикІайсса куццуй, укунсса  
бувчІин баву (мораль) маслихІат буллай ур:

Пикри бара, дустал, ва хаварданий,

Байсса иширттаву тІайлану бикІан.

ХъхъичІва-хъхъичІ оърчІру кІул шайссар эпический произведениялул  
журану хъанай бур хавар. Хавардащал оърчІру кІул хъанай бур  
байбихъулул школалийгу, дянивми классирттавугу, лавайми  
классирттавугу.

Оърмулуву хъусса ца чІивисса иш лавсун, ганияту чивчусса, личІину  
хъун бакъасса произведениялийн хавар учайссар. Цила лагрулул хъун  
дакъашиврийнур мунил повестьраясса ва романдалуясса личІишивугу.

Хаварду бикІайссар гъанусса мяъна, мурад бусса, цукунсса бунугу  
инсаннал оърмулуву хъусса иширая, жанавартрал оърмулуя бусласисса,  
тІабиабтрал чІалачІиннарая бусласисса, щугълурду чІалачІи буллалисса.

Хаварду бикІайссар мукунма ххуйсса ягу оьккисса дайлитІу дусса, дайлитІурагу дакъасса. Ца-ца чІумал кІира-шанна чагъарданул чІапІуй, чичрулий, чІалачІи буну бикІайссар инсаннал щаллусса оьрму, ца-ца чІумалгу зувира-мукъЦалла чІапІуй, чІивисса лахІза.

Ца-ца хаварданул бусласимуниву чІалан бикІайссар буккун цанма хьхьичІавагу кІулну бивкІмур, цайминнуву тІурча, такІуй хьун къабюхъаймур, мяйжан бакъамур, так хияллаву хьхьичІ бацІан бан бюхъаймур.

Хьунабакъайссар мукунма чІявусса хавардал кьюкьлуву цава ца герой усса, ягу хьун бакъасса ца хаварданува чІявусса геройтал бусса кІанттурдугу.

Лакрал литературалул программалий, дянивми ва лавайми классирттаву лахьхьин ккаккан буну бур мадарасса хаварданул жанралий чивчусса произведенияртту.

Лакрал литературалул программалий дянивми ва лавайми классирттаву лахьхьин ккаккан буну бур мадарасса хаварданул жанралий чивчусса произведенияртту. Миннуясса цану хъанай бур А. Оьмаршаевлул чивчусса «ХІухчу Рамазан» тІисса хаваргу. Хавардащал оьрчІру ялавайми классирттавугу кІул хьуссар.

Классрал лавай хъанахъиссаксса оьрчІан жанрардая кІулмур гъарза-гъарта хъанан бикІайссар, миннал хавар тарих гъануну лавсун ягу оьрмулуву хьусса иш гъануну лавсун чивчусса буссарив личІи байссар.

Лакрал ва оьруснал литературалул дарсирдай хаварданул жанр лахьхъаврийну оьрчІан бувчІайссар мунил темарду оьрмулуву хъанахъисса иширттацІун дархІуну даххана шайшиву ва миннул инсаннал оьрмулул циняв чуллу чІалачІи байшиву.

Лавай кІицІ лавгсса куццуй хаварду бавхІуну бур оьрмулуву ва тарихраву хьусса иширттащал. Лавг заманнул кьинирду оьрчІал хьхьичІ

дацІан дуллай бур И.-Х. Къурбанаълиевлул «Жабраил», Аь. Оьмаршаевлул «ХІухчу Рамазан», Ю. Хаппалаевлул «Нину ва арс» тІисса хавардал.

Та заманнайсса оьрчІру ккашилну, лаххиялул лацинну бивкІун бур. КІу-кІусса давурттив дуллалаврил тайннан бакІ гъаз дансса мажал къабивкІун бур, тай элму-тарбия лахъхъаврия, школалия махІрумну бивкІун бур.

ОьрчІру ва тагъарданий бивтсса паччахІнал хІукуматрайн чичулт цала чичрурдаину къарши буклай ва оьрчІансса алши-талихІрал цІаний, цала революциялул ххуллийсса давриву ва талатавриву букъавсса къабитлай бивкІун бур. Гайннан хъинну ччай бивкІун бур оьрчІру ккашища, зулмулуца, ихтиярду дакъашивруща ххассал хъуну. Элмулул ва культуралул хъинбаларду тайннан ккавккун, тайнная халкъуннангу, буттал кІанттунгу хайр булун бюхъайсса инсантал хъун. ТутІимур тІайлашиврул, ккалаккинан бюххаврил чулуха лакрал литературалуву лайкъсса кІану бугълай бур Аь. Оьмаршаевлул «ХІухчу Рамазан» тІисса хаварданул. Хаварданул гъануну авторнал лавсун бур 1912-1915-ку шиннардий цанма букансса ччатІух-иних аваданминначІа ичІува зий бивкІсса мюрщисса оьрчІал оьрму.

Нитти-буттаща хъхъу-къини къакуну зий бунугу, оьрчІан янна-ус, дуки-хІачІия дулун бюхълай бивкІун бакъар. Мунияту оьрчІан багълай бивкІун бур цала оьрмулун къалавхъхъусса захІмат буллан, цала цивппа дулан хъун.

Ряххулчинмур классраву лавхъхъусса И.-Х. Къурбанаълиевлул «Жабраил» кунмасса, чан-къанну личІийсса темалийн бувсса хавар бур «ХІухчу Рамазан».

ЧІалачІисса куццуй ва хаварданул гъанусса геройталну хъанай бур мюрщисса оьрчІру, хъхъичІ бацІлай бур миннал оьрму ва миннан та чІумал ккаклай бивкІмур.

Арулчинмур классраву хавардашал назмурдашал бакъассагу оърчІру кІул хъанай бур Апанни Къапиевлул чивчусса «Шаэр» тІисса повестьрал бутІрашал. Ряххулчинмур классравува оърчІру кІул хъуну бивкІссар повестьраясса дурчІалалушчал, бухъурчагу арулчинмур классравугу дакІнийн дугайссар повестьран хасъсса личІишивуртту.

Литературалул теориялун хас дурсса давурттаву, учебникирттай чІалачІи буллай бур повесть – му хавардануяр хъунмасса, романдалуяр чІивисса произведение хъанахъишиву. Му мукунсса произведение хъанахъишиву оърчІан цал уттигу дакІнин бутан бучІиссар. Бусайссар оърчІахъ повестьраву хавардануву кунма хъусса ца хъунбакъасса иширая чивчуну къабикІайшиву, цимийвагу ца инсаннал оърмулуву хъусса иширттая чивчуну бикІайшиву, ми циняв ишругу, произведениялул гъанума геройнал лагма хъанан бикІайшиву. Повестьраву цимийвагу ишру бакъа, ца геройнал лагма гъанагъисса цимиягу геройгу икІайшиву. БувчІин байссар мукунма повестьраву оърму хаварданувунияр хІала бувххун (сложныйну) чІалачІи бувну бикІайшиву.

ЧІалачІисса куццуй, повесть учин бюхълай бур дянивсса лагру дусса эпический произведениялийн. Повестьрал лагру романдалуяр чІириссар. Цила аьдатрайн бувну, повесть чІяву бакъасса эпизодирттайну щаллу хъанахъиссар: ганиву гьуртту хъанахъисса инсантал хаварданувунияр чІявуссар, амма романдалувунияр чанссар.

«Шаэр» тІисса новеллардая сакин хъусса лу А. Къапиевлул произведениярттаву агъанмурну хъанай бур. Ганиву щаллу дурну дур шаэр Сулайманнул сипат, ккаккан бувну бур ганал оърму. Цала луттирал хъхъичІмукъуву Къапиев чичлай ур: «Луттираву цичІав личІисса ишру хъанай бакъассар. Авторнал цала хъхъичІ бартбигъин захІматсса масала бивхъуну буссар: шаэрнайхчІин ккаккан бан оърмулул проза, га нанисса куц ва гъарица къини хъанахъимунил дахханашиву. ЛичІи-личІиссаннуя къасттана арх уцлай ва мудан хъунабакълакымур бакъа ккаккан къабуллай (чичун мури яла жапамур), автор хІарачатрай ур шаэр цува ккаккан аврияр,

тарих лахъисса зунттал агъалинал рухІ ганиву дурчІин, революция хъуну махъсса багъу-бизулул гъанулий га ххал дигъин»<sup>1</sup>.

Чичул ва масала хъинну усттарну шаллу бувну бур. Луттираву жула хъхъичІ ацІлай ур хІакъсса зунттал чув, ккаккан дурну дур Совет хІукуматрал зунттал халкъуннал оърмулуву дурсса дахханашивуртту. Чичул шаэр Сулайман хъхъичІ ацІан уллай ур ккурттулуву, чурчарисса къяпагу бивхъуну, ганал яру бур хъунисса, някІсса, лажин дур мурхъирал къавкъсса чІапІуха лархъхъуну цІанну ттурусса, мунияту дахъва чял хъусса ганал чІири марххала кунма кІялану чІалай бур.

Сулайман ур шаэр ва хъудугъу. Ганал гъалгъа бур шаэрнал зумуну чІюлусса, циву оърмулул дарсру гъарзасса, акъьлу бусса, Сулайманнул ихтилатраву чІявуну ишла буллай ур лащанбавуртту, символлу, метафорарду. Вана учала кунна акъьлу бусса калима: «Бусласиманал дугъайссар». Шикку ихтилат хъунил давриха лащан бувну бур, ца ур хъу дугълай – гама ттихІлай. Лащанбаву: «Шаэр булбул куна сахаватлуну икІан аъркинссар»; метафора: «БакІрачІан бувкІцириннул гъиву дур ттул дакІниву лухІисса къюмайтІугІи кунна. Га щаралархъун, хъамаран дизлай дур. Ганил ялун на къус икІаннин гива нанисса къункъал ттул оьтту щаращи буллай бур».

Шаэр ур обществолул жяматрал къуллугъчи. Цала къуллугъ багъайкун биттур булланшиврул шаэрнан аъркинни тархъаншиву.

Шаэрнал сипат яргну чІаланшиврул, Къапиевлул гъарза-гъартану ишла дурну дур ганал дуллай ивкІмур. Цаппара новелларду ганал чирчуну дур цала, чичул цІанияту, цайми ганала цІания автобиография кунма, цаппараннуву ккаккан увну ур ХІабиб тІисса Сулайманнул дус. Буккун къакІулли, ганал сиппат цукунсса дуссарив, га ци даврий уссарив, ганал ци кулпат буссарив. Га ур авторнал кІану бугълайсса инсан. ХІазран бакъархха шаэртурал назмурдаву Апаннинайн ХІабиб тІисса!

---

<sup>1</sup> Капиев Эффенди. Избранное: в 2 томах. Т. 1. Махачкала, 1971. 9 с.

А. Къапиевлул новеллардая сакин хъусса повестьраву ца геройнал лагма гъанагъисса цимиягу геройгу ур, мукулма оърмугу хаварданувуняр хІала бувххун чІалачІи бувну бур.

Мунияту, оърчІащал ххал диргъуну вай повестьрал хасиятругу «Шаэр» тІисса произведениялул анализ дайссар.

Арулчинмур классраву дуклаки оърчІру кІул шайссар романдалушал. Миннал лахъхъайссар М. Хуршиловлул чивчусса «Сулакь барар» тІисса роман.

ХъхъичІва-хъхъичІ бувчІин бан аъркинссар дуклаки оърчІан роман цила лагрулийну циняв прозалий чивчусса произведениярдаяр хъунмасса бикІайшиву. Ца-ца чІумалгу му повестьраяр лагрулул хъунмасса бакъанувагу романну ккалли буллан бикІай, мунил оърму гъартану ккаккан бувну буну тІий.

Оърмулул ва чІумул гъартасса сурат щаллу дуллалисса ишругу аьчухну, гъарца чулухату лавсун ккаккан буллалисса хъуннасса лагру дусса эпический произведениялийн роман учайссар.

Бусайссар романну бикІайшиву прозалий чивчусса ва бикІан бюхъайшиву назмурдайссагу (масала, А.С. Пушкиннул «Евгений Онегин» – оърус мазрайсса). Повестирттаву къадикІайсса, романнаву архІала дачин дурну дикІайссар кІира-шанна, мунияргу ххишаласса сюжетру. БикІан бюхъайссар сюжетрал ца ххуллу, яни лябуклай нанисса иширттал ца яржа. Амма тамансса романнаву сюжетрал цимивагу ххуллу хъунабакълай бур, ххишалдаран гай ххуллурдаватусса гъарцанничІа завязка, кульминационныйсса пункт ва развязка дикІан бюхъайссар.

Сюжетрал ххуллурду бикІан бюхъайссар гъанусса ва кІилчинмур даражалулсса. Сюжетрал гъанусса ххуллурдуну хъанахъиссар гъурттушиву дуллалисса яла хъуниминнал къадардануцІун бавхІуну хъанахъисса цаппара ишру.

Сюжетрал ххуллурду тамансса бушаврил каши дуллай дур оърму гьартану чІалачІи бан, хьинну чІявусса инсантал ккаккан бан. Ганил чичухьхьун каши дуллай дур ца-цасса геройтал гьарца чулухату сурат дурну ккаккан бангу.

М. Хуршиловлул чивчусса «Сулакь барар» тІисса романдалул ккаккан буллай бур 1905-кусса шиналсса революция хьуну махь Дагъусттаннал захІматкашнал дуллай бивкІсса талатаврил сурат.

Романдалуву чичу буслай ур Салатаву тІисса зунттал шяраву революциялул хьхьичІсса шиннардий хьанахьисса иширттая. Романдалуву усттарну ккаккан бувну бур шяравусса хьуслил ва кьинилул заллухьру ва мискинтал. Шяраваллил старшина Узаир ур оьсса, инсаннай кьия дангу, гай кьюкьин бангу махьунай кьашайсса адимина. Узаирдул чул бищай кІануну хьанай ур малла Аьрипгу, гайннал махь бавцІуну бур паччахІнал хІукуматрал бивтсса чиновникталгу.

Романдалуву ккаккан бувну бур залимтурал зулмурду бухІан кьахьанай, гайннайн кьаршину буклан бивкІсса мискинталгу: ХІусман, Байгьуш ПатІима, Мисиду ва цаймигу. Узаиргу, ганал ппу Аьраш-найпгу бусса шяраву ацІан дакІнил кьамул кьабуллай, ятинну ливчІсса жагьил Оьмар хІалтІилий най ур. М. Хуршиловлул биялсса захІмат бувну бур Оьмардул революциялувунсса ххуллу аьчухну чІалачІи бан.

Зузалтрал оърму «Сулакь барар» тІисса романдалуву чІалачІи бувну бур зузалт хьудугьултрал ва Аьрасатнал циняв мюрш миллатирттал талатаврил бакІчитал бушиву. Так зузалтрал дянив Оьмардуя хьунни цила икІайкунсса, унгу-унгусса революционер.

«Сулакь барар» тІисса романдалуву М. Хуршиловлуца бювхьуну бур Дагъусттаннал зунттал агьали чантІ тІутІаврил мархри чІалачІи бан.

Произведениялувусса ишру куртІсса бур: ганиву чІярусса эпизодру, чІявусса гьуртту хьанахьими бур. ЛичІи-личІисса журалий общественный

группарду гьуртту хъанай бур. Шиву ккаккан буллай бур революционертурал кьукьлуву Оьмардул дуллалисса кьянкьасса талатаву.

«Сулакь барар» тисса роман лахъхъаврийну дуклаки оьрчІан кІул хьунтІиссар жула халкьуннал лавгсса оьрму, га заманнайсса багьу-бизу, аьдатру, куннал куннащалсса арарду, зунттал халкьуннал ас, намус, чувшиву, яхІ, кьирият, иш багьний чІарав бацІаву, ххарину хъамаличу кьамул аву чичун ххуйну кІулшиву. Мунищала архІал заманалун хасьсса лашинсса, кьадарсса тІуллу дусса, хьуслил ва хьуншиврул цІаний ччимур лавмартшиву дан махьунмай кьашайсса хантурал, багтурал, ттуршама кьатрал заллухьруннал халкь лиллай, гайннал дянив ссивцІурду бичлай, сси бунай ссан дизлай бачин бувну бивкІсса оьрму чичул бюхъайссаксса хьирив лавну лавхъхьуну бивкІшиву.



## VII. ЛАКРАЛ ЛИТЕРАТУРАЛУН ХАС ДУРНУ, КЛАССРАЛ ВА ШКОЛАЛУЛ КЪАТІУВ ДАЙССА ДАВУРТТУ

Школалай классрал къатІувсса даврин хъуннасса агъамшиву дуллай бур. Мунил масаларттуну хъанай бур: оърчІру цила багъайкун тарбия баву, оьннасса чІун личІи-личІисса, миннан ххуй дизайсса, хайр бусса давуртту дуллай тІайла дуккан кумаг баву.

Классраву, лакрал литературалул дарсирай, оърчІан лахъхьин буллай бур произведениялуву бусласимур бувчІинну, чичул магъиршиву хІисавравун ларсун лахъхьин.

Вара даву хъиннура куртІ дуллай дачин дан багълай бур классрал къатІувсса буккавил дарсирдайгу.

Луттирал оърчІан кумаг байссар оьрмулувусса ишру бувчІин, ччайгу бикІайссар хъиннува чІявусса кІул бан. Классрал къатІувсса буккаву хъанахъиссар оърчІал пикри щаллу бансса, чара бакъа дан аьркинсса даву.

Махъсса шиннардий захІмат хъуну бур оърчІашал классрал къатІувсса буккавил даву дачин дан. Цанчирча, чІявусса оърчІру кІункІутІи хъуну бур техникалучІан, аьщуйн щуну лахъхъайсса элмурдачІан, спортрачІан. Литература тІурча, гайннал кІилчинмур пландалийн рутлай бур. Мазрал ва литературалул дарс дишайсса учительтал укунсса тагъарданул буржлув буллай бур классравугу, дарсру къуртал хъуну махъгу кІа иш янила буккан къабитан.

КІулсса куццуй, школалул дуккавил ва тарбия дулаврил даву дарс дишаврийну къуртал хъанай дакъар, архІалла дачин дан багълай бур классрал ва школалул къатІувсса даву. ХІатта ххуйну даву дирхъусса школалай, опыт бусса учительтурачІа, яла ххуйми методирттай оърчІашал классравусса даву дуллалисса кІанттурдайгума хъунабакълай бур художественный литературалия, чанну хавар бусса, литературный маз къакІулсса оърчІру. Ванин сававну классрал къатІувсса литературалул

даврих, кружокру зузаврих, литературно-творческий дарсру оърчІахь дишаврин, литературно-художественный вечерду, экскурсиярду ва м.ц. давуртту дуллалаврих школардаву багъайсса ургъил къабуллалавур.

Учительтуран кІулну бикІан аьркинссар дарсирдаяр махъсса чІун оърчІал цуксса цанна мюнпатну гъан дуллаи буссарив.

Литература дишайсса учитель буржлувссар кІул бан оърчІан цукунсса луттирду буклан ххирассарив, цукунсса бувккуссарив луттирду, ми ча ласайссарив, цуми журналлу буккайссарив, букваврин нюжмардий цуксса чІун харж дайссарив.

Вай цимурца кІул барча, дуклаки оърчІачІансса ххуллу лякъин, миннашалсса дахІаву цІакъ дан, оърчІая цукунсса тІалавшиннарду дан дурив ххал дан бигъа хьунтІиссар.

Школалул къатІалу лахъхьиншиврул, литературалул учительнал чІявуми оърчІал луттирду ласайсса библиотекалушал дахІаву дан аьркинссар. Мунил мурад оърчІал цукунсса луттирду буклай бурив ххал бавур.

### **1. Классрал къатІувсса букваву.**

Школалул къатІувсса даву – му хъхьичІра-хъхьичІ, классрал къатІувсса букваву сакин давур.

Цинявгу классирттал программалий ккаккан дурну дур классрал къатІув буккинсса произведениярдал сияхІ. Му сияхІ мяйжан дайссар литература дишайсса учительнал, школалул библиотекалувусса луттирду ва оърчІан кІулмур хІисавравун лавсун. Классрал къатІувсса букваврил дуссар кІира жура:

а) чарабакъа дуккин аьркинсса, дарсирай лархъхьумуницІун дархІусса материал цайнура цала дуккинсса;

б) цанма ххуй бизайми, ягу учительнал буккин маслихІат бувми луттирду цала мажал хьусса чІумал букваву.

Учитель чарабакъа оърчІал классрал къатІувсса буккавил ялув ацІан аьркинссар. Ганал бюхъайссаксса кумаг бан аьркинссар классрал къатІув буккин ккаккан бувсса луттирдал библиотека щаллу бан. Библиотекалул зузала кІул увну икІан аьркинссар 8 классрал оърчІан классрал къатІув буккин аьркинсса луттирдащал. Мунал луттирду баххана баван аьркинссар нюжмардий, кІира нюжмардий цал. Агарда библиотекалуву оърчІан буккин ккаккан бувсса луттирду чанну бухъурча, бучІиссар дарсирдая махъ классраву бавцІуну лахъну буккаван. ОърчІая, цала бувккусса произведениялул, ганил авторнал цІа, фамилия ва произведениялул чулухунмайсса цала пикри чичаву тІалав дайссар.

Буккавил ялув каялувшиву даврил яла къулаймур жура хъанахъиссар классрал къатІувсса буккавил дарсру. Ми дарсирдал мурадну хъанахъиссар гъарца оърчІал классрал къатІувсса буккавил ялув каялувшиву даву, миннал буккавил хъирив бацІаву.

Классрал къатІувсса буккавил дарсру цІакъну дархІуну дикІан аьркинссар литературалул дарсирдащал ва цаймигу луттирдащалсса даврил жулардащал.

Классрал къатІувсса буккавил дарсирдай дайдирахъусса даву къуртал хъун бюхъайссар буккултрал конференциярдай, литературалул вечердай ягу ми дарсирдай бюхъайссар жям дан конференциярдай, литературалул вечердай дурсса давуртту. Мукусса давурттуну хъун бюхъайссар цала улча лахъхъаврил ялувсса давурттугу (оърчІал бюхъулух бурувгун).

Литературалул программалул, шинал мутталий гъарцагу классраву мйра дарс классрал къатІувсса буккавил ишла дан ккаккан дурну дур.

Классрал къатІувсса буккавил план даннин хъхъичІ, хъинну хъирив лавну, буккинсса луттирду личІи бувну бикІан аьркинссар.

Мивусса произведенияртту бикІан аьркинссар идеялул ва художествалул чулуха лавайсса, ххуй бизансса, оърчІан бигъану

бувчИнсса. Ми произведениярттал оърчІал кІулшиву ларай дайссар, буккаврил усттаршиву магър дайссар, хияллаву сурат даву итххяххан дайссар, пикри буллали айссар.

Классрал кьатІувсса буккаврил дарсру дишаврил кьядардал агьамшиву чІирисса дакъар. Вай дарсирдай цирда литературалул дарсирдайняр чІяруну ишла дайссар хьирив бацІавуртту, ххал бигъавуртту, хІала бакъайссар тІуркІуллул бутІри, личІи-личІисса журалул сценкартту, конкурсру (бяс-ччаллий буккавуртту).

Классрал кьатІувсса буккаврил дарсирдал план дайссар ми дарсирдан хьхьичІ бавцІусса масаларттайн чул бивщуну, миннул литературалул дарсирдащалсса дахІаврих бурувгун. Буккаврил дарсирдал план дан аьркинссар учительнал цанма кьулайсса куццуй. Мунаша бюхъайссар хьхьичІра-хьхьичІисса байбихьулул дарс классрал кьатІувсса буккаврий каялувшиву даврил цалчинмур шачІануну ккалли дан.

Ми дарсирдай оърчІан буккаврих гьира бутан аьркинссар. Букъавккуманаща луттирдал геройтураясса ихтилатравух хІала уххан кьабюхъантІиссар, му давривух хІала уххан ччарча буклан багъантІиссар. Классрал кьатІувсса буккаврил дарс дишаврил яла кьулаймур жура хъанахъиссар – конкурс, бяс-ччал.

Мяйлчинмур классраву 2-3 дарс харж дан бучІиссар дакІнихсса творчествалун, бюхъавай чІявусса шаммарду дакІних лахьхьин маслихІат барча ххуйну хьунтІиссар.

Классрал кьатІувсса буккаврил дарсру хас дурну дикІан бюхъайссар лакрал ва дагъусттаннал халкъуннал дакІнихсса творчествалун ва лакрал ва дагъусттаннал чичултрал произведениярттащал кІул шаврин.

Дарсирайн хІадур дурсса материалданух урувгун учительнал хІадур байссар цала бансса ихтилат.

Хъинну ххуйну хъунтIиссар дарсирай кIицI лагансса луттирдал выставка дарча. Учительнал хъунмасса бияла буссар гьарца оьрчI цашава бюхъайсса хIарачат буну, гъира буну, дарсирайн хIадур аврин.

Махъсса классрал къатIувсса буккавил дарсру, шала шинал мутталай бунккумунил ккал даврин хас дарча бучIиссар. Ххуйну хъунтIиссар, агар ва дарсирайгу хъхъичIра-хъхъичIсса классрал къатIувсса буккавил дарсирай куна библиотекаръ гьуртту хьурча. Му учIан аьркинссар оьрчIал бунккусса луттирду чивчусса карточкардугу ларсун. Мунал оьрчIахъ бусайссар буккавил агъамшиврияту ва ларгсса шинал чIявусса луттирду бунккусса оьрчIаяту.

Аьмну шала классрал буккавил къимат бишлашини, библиотекарнал ва давривух хIала буххан байссар цаппара бунккултгу. Цуххайссар миннахъ цумур бунугу луттираясса цала пикри дакIний ливчIсса геройтурал, цанма яла гужсса асар биян бусса иширттая (ихтилат банми хъхъичIва хIадур бан бучIиссар).

Дарсирал ахирданий учительнал оьрчIру кIул байссар гъинтнил мутталай дуккинсса литературалушал. Литературалул сияхI дикIан аьркинссар хъун дакъасса, бучIин бан аьркинссар сияхIрайсса луттирду бакъассагу, оьрчIан буккин аьркиншиву цанма ххуй бизайсса цаймигу луттирду.

Гъинттул буккинсса луттирдал маслихIат буллалини, учительнал ми луттирду оьрчIан ккаккан байссар, миннуя гьарцаннуя бусайссар, баян байссар дучIантIисса дуккавил шиналсса цалчинмур дарс гъинттул бунккумунин хас дантIишиву.

БучIиссар оьрчIан бунккултрал дневникру бачин баву маслихIат бангу. Ми дневникру бачин бансса куц оьрчIан шинал мутталай лахъхъин буну бикIан аьркинссар.

Дневник баншиврул тетрадь кIива бутIуйх бачIайссар. Мунил цалчинмур бутIуй чичайссар циняв бунккусса луттирду: цал автор, яла

луттирал ца, лу итабавкъусса шин, художникнан ца. Килчинмур бутга оьрчгал цанма ххуй бивзсса луттирал чулухунмайсса цала пикри чичаврин харж байссар.

Чичаврил жуарду дикгайссар личи-личисса. Му бюхъайссар бикган шаллусса луттирал кьимат бищаву, (гьуртту хъанакъиминнаясса хавар, текстрава цанма дакниий ливчмур парча, цумур бунугу цанма хьинну асар биян бувсса сурат). Мукун личи-личисса давурттая оьрчгру къахъунтиссар. Му дневникрал хьирив лаяврийну учительнаца цала оьрчгал кгулшивугу, буквавил даражагу хисавравун лавсун классрал къатгвсса буквавил дарсру дишаврил цаймигу къяйдарду лякьин бюхъантиссар.

## **2. Мьялчинмур классраву къатгвсса буквавил дарсру дишаврил къяйда ва миннул мурад.**

Мьялчинмур классрансса лакрал литературалул программалийн бувну дуклаки оьрчгру кгул хьун тий бур халкъуннал дакнихсса творчестволул произведениярдащал, дагъусттаннал халкъуннал хьхьичазаманнайсса, революция хьуну мукъахсса, дявигулул шиннардиисса ва цанасса чумалсса оьрмулушал ва багъу-бизулушал. Укунсса журалул произведенияртту классраву, лакрал литературалул дарсирдай бакъа, классрал къатгвсса буквавил дарсирдайгу лахъхьин ккаккан бувну бур программалий.

Классрал къатгвсса буквавил дарсру чяруну дишайссар (беседалул) оьрчгашалсса ихтилатрал журалий. Ми дарсирдай дуклаки оьрчгаву тарбия бан аьркинссар инсаншиву, адав мяьрипат.

Классрал къатгвсса буквавил дарсирдай оьрчган пикри буллан лахъхъайссар, инсантурал дянивсса арарду, лагма-ялтту хъанакъимур бувчган бикгайссар.

Лакрал литературалул ва мукунма оьруснал литературалул дарсирдай лахъхъайсса произведениярттал темарду кунничган ку гъансса

духьукун, ва иш хІисавравун лавсун, лакрал ва оьрус литературалул дарсру куннишал ку дархІуну диширча ххуйну хьунтІиссар. Учительнал ва оьрчІал дянивсса ихтилатрал зумуну сакин дурсса дарсирдал оьрчІал маз итххяххаврин, пасихІ шаврин агьамшиву дуссар. Вай ляличІишивуртту хІисавравун ларсун аьркинссар дарсирдал план сакин дан.

Учительнал ва дуклаки оьрчІал дянивсса ихтилатрал журалий дарс дишиншиврул лахьлахьисса произведениялушал оьрчІру дарсирайнинва кІул хьуну бикІан аьркинссар, дарсирай тІурча, ихтилат суаллал ва жавабирттал кумаграйну бачинтІиссар.

Ихтилатрал кумаграйну дарс дишайни ишла дайсса журадуну хьанахьиссар произведениялул хьирив лаяву, диспутру, семинарду, конференциярду, бюхълай бухьурча, чичултращалсса хьунабакьавуртту.

Дарсирал сакиншинна лахьлахьисса произведениялул лагрулия ва дарсирал мурадрая хьар шайссар.

Ихтилатрал журалий дирхьусса дарсирал хьхьичІ бикІан аьркинссар хьирив лаян аьркинсса масала. Му масала хас байссар ца хьунмасса, мяьналул чулуха хІала бувхсса произведениялун, ягу кІива-шанма ца темалун хас бувсса произведенияртган.

Журалух бурувгун классрал къатІувсса буккаврин хас дурсса дарсру дикІайссар:

- а) байбихьулул дарс;
- б) хьунмасса художественный произведение цайнува цала буккин ва бувчІин бан хІадур буллалисса дарс;
- в) бувккумур куртІ буллай миннул хьирив лаллалисса дарс;
- г) бувккумур, лавхьхьумур жям буллалисса дарс.

Ца произведение лахьхьаврин вайксса ссятру харж дан бюхълай бакьар. Беседалул журалий дирхьусса дарсирдал мурадгу цайнува цала бувккусса произведениялувусса адаврал, инсаншиврул масаларттах, личІинувасса ягу бурган бувну, гай иширттах гьарцаннал цала ургаву

сакин дан бюхъаву дур. Му мурадрал тГурча чІяруну, кІира журалийсса дарс дишаву тІалав дуллай дур – ихтилатрал журалий ва диспутрал журалий.

### **3. Классрал къатІувсса букваву ва мунил классравусса буккаврищалсса дахІаву.**

Цанасса чІумуву школарттал ишла дуллалисса лакрал литературалул программалий дуллуно дур шанна журалул сияхІ: классраву, классрал къатІув ва цайнува цала буккинсса произведениярттал.

Программалий хьхьичІра-хьхьичІ ккаккан дурну, дуллуно дуссар чарабакъа лахьхьин аьркинсса произведениярттал сияхІ, гайннул хьирив оьрчІал цала буккинсса, кІайва чичултрал произведенияртту, яла гьарца классрал программалул ахирданий классрал къатІув оьрчІал буккинсса произведениярдал сияхІ.

Программа ххал дигълан бивкІукун, чІалай бур дуклаки оьрчІан биялсса луттирду буккин аьркиншиву. Буклакаврия оьрчІан хайр бикІаншиврул учительнан вай шаннагу сияхІрайсса произведенияртту аькьлу буну куннищал ку бахІин аьркинссар.

Цукунни дахІаву дан аьркинсса классраву лахьхьинсса ва классрал къатІув буккинсса произведениярттал дянив?

Классрал къатІув буккинсса произведенияртту личІи буллалини учительнал хІарачат бан аьркинссар личІин бан мяъналул ва мурадрал чулуха классраву лахьхьайминнучІан гъансса, мунил кумаг байссар программалул материалдануя кІулмур куртІ бан.

Классраву ва классрал къатІув лахьхьинсса произведениярттаву бур цава ца авторнал чивчусса произведенияртту. Ми чІявумур чІумал хас бувну бур ца чІумун, ца темалун. Масала, мьйлчинур классравугу, классрал къатІувугу лахьхьин ккаккан бувну бур А. Омаровлул, Гузунхьал ХІасаннул, ТтурчІиял, Маммадайл, М. Чариновлул, А. Алиевлул произведенияртту. Миннал произведенияртту классраву лахьхьин ккаккан



бувми ва классрал къатІув лахъхъин ккаккан бувми, мяъналул ва мурадрал чулуха кунничан ку гъансса бур. Му бакъассагу, классраву цума унугу авторнал биографиялушал ва ганал дурмунишал учительнаша оърчІру биялну кІул бан хъанай бакъар чІун диялсса дакъашиврийн бувну, классрал къатІувсса буккавил дарсирай тІурча, учительнаша бюхъантІиссар авторная бикІу, произведениялия бикІу лавхъхъумур гъарта бувну, куртІ бан.

#### **4. Классрал къатІувсса буккавил дарсирдал сакиншинна ва микку даву дачин даврил къяйдарду.**

Классрал къатІувсса буккавил дарсирай учительнал даву дачин дайссар щала классравусса оърчІашал. Цияв оърчІашал зузини чІалан дикІайссар учительнан дарс дишинсса куцгу, га сакин дансса къяйдагу. ЧІяруну дарс дишайссар яларай чІалачІи дурсса куццуй:

- 1) ХъхъичІмахъ;
- 2) ОърчІал бувккумунихсса бургаву ххал дигъин кунмасса суаллу;
- 3) Лахълахъисса произведениялийн бувсса ихтилат;
- 4) Лавхъхъумур учительнал оърчІашал жям баву.

БувчІайсса зад бур, ялув чІалачІисса схемалия учитель произведениялул хасиятрах, журалух урувгун, тинай, шинай хъунгу бучІишиву. Агарда дарсирай ххал бигълай бухъурча оърчІан хъхъичІавагу ххуйну кІулсса чичу, му чІумал хъхъичІмахъ личІину аьркин къашайссар, дарс сакин даву учительнаша даххана дан бюхъайссар оърчІан кІулмур ва миннал гъира хІисавравун лавсун, амма чІяруми дарсру цирда ларай чІалачІи дурсса журалийри дишайсса.

БацІанну дарсирал гъарца шачІанттууй. ХъхъичІмахъ чІявумур чІумал учительнахъри бикІайсса, мунил кумаг байссар лахълахъисса произведениялул мяъна куртІну дурчІин. Цила мурадрах бурувгун, чІявумур чІумал, му чичул оърмулия ва мунал дурмунихсса ихтилатри бикІайсса. Ихтилат хІадур байни, учительнал личІи байссар оърчІан

лахълансса произведениялул гъанусса мяъна дурчІин дан кунмасса кІанттурду. Чичул оърмулуя бусласисса ихтилат бикІан аъркинссар оърчІал оърмулух бурувгун, гайннаща цахъва бусласимур бувчІин бюхъан кунмасса. Ца-ца чІумал гъану бикІайссар оърчІахъ чичул оърмулувасса, хІакъину хъусса, дуклаки оърчІан ххуй бизансса кунмасса кІанттурдугу бусаварча.

ЧІявуми лакрал бикІу, цайми миллатирттал чичултрал биографияртту бикІу, литературалул хрестоматиярдай, миннал цала чивчусса, луттирачІансса хъхъичІмукъуву буллуну буссар.

Биографиялул бутІа, ягу щала произведение лахъланнин хъхъичІ учительнал буккирча ягу бусарча, мунил оърчІру произведение вив итабакъаврин хІадур байссар. Цаппара произведениярдачІан буллусса хъхъичІмукъул оърчІан произведение буккин ва вив итабакъин кумаг байссар, мукума хъхъичІмахъ букваву произведение лахъланнинсса хъхъичІмукъун ккалли бан бучІиссар. ЧІявумур чІумал, хъхъичІмукъуву, учительнал бусайссар га произведение чивчусса чІумуя, чІумун хасъсса личІи-личІисса ахІвалданул инсантурал хасиятирттая, произведениялуву хъанахъисса иширттая.

ХъхъичІмукъуву учительнаща бюхъайссар бувчІин бан оърчІан къакІулсса, произведениялул текст дуклакини захІмат бизан кунмасса махъругу.

ХъхъичІмукъул хъирив учительнал ххал бигъайссар оърчІал хъхъичІва бувккуну бивкІсса, цІана дарсирай ххал бигълагъисса произведениялухсса оърчІал бургаву. Му ххал бигъиншиврул учительнал оърчІахъхъун га произведениялуясса суаллу булайссар, суаллу хъинну пикри бувну сакин байссар, оърчІал кІулшиврул даражалух бурувгун.

Дарсирал гъанумур кІану бугъайссар бувккусса луттирайн бувну бувсса ихтилатрал, ихтилат оърчІан ххуй бизанну гъайссанр агарда суаллу

тҫайлану, произведениялул гҫанусса мяҫна дурчІин данну, гҫуртту хҫанахҫиминнан лайкҫсса кҫимат бищунну бивхҫуну бухҫурча.

Дарсирай я бурган бан аьркинссар оьрчІал оьрмулук ва миннал художественный литература дуккавил даражалук.

Дарсирал махҫва махҫмур бутІуву учительнал оьрчІашал лавхҫхҫумур жям байссар. Цала ихтилатраву учительнал оьрчІан дакІнин бичайссар произведениялул бувчІин захІматми кІанттурду, ми цІунилгу бувчІин байссар. Шиккува учительнал кҫимат бищайссар оьрчІал суаллан дуллусса жавабирттан, аьркинну бухҫурча гай тҫайла дацІангу дайссар. Цала ихтилатраву учительнал цал ялагу кІицІ лагайссар лахҫлахҫисса произведениялул, бувккусса луттирал ххуйми кІанттурду, аьркинну духҫурча чІалачІи дайссар диялдакҫашивуртту.

Классрал кҫатІувсса буккавил дарсирдай ишла дайсса личІи-личІисса лахҫхҫин баврил кҫяйдардаву агҫамсса кІану бугҫайссар пасихІну буккавил, личІи-личІисса мурад бусаврил жулардал, дакІних суаллан жаваб дулаврил, дакІнихсса сочинениярттал ва докладирттал. Вай хҫанай дур дакІнихсса даврил жуларду.

ДакІнихсса дакҫассагу, классрал кҫатІувсса буккавил дарсирдай бувккусса произведениялийн бувну чичрулул давурттугу дайссар.

Чичрулул давурттуну хҫанай дур бувккумунил план чичаву, личІи бувну цитатарду чичаву, чичрулий суаллан жавабру дулаву, изложенияртту даву, бувккумунил кутІасса мурад чичаву.

Классрал кҫатІувсса буккавил дарсирай яла чІяруну ишла дайсса даврил жура ялагу хҫанай дур пасихІну, бюхханну буккаву.

Классрал кҫатІув буккайсса произведениярду оьрчІал чҫянива бувккун бивкІун бухҫукун, гайннан текст щала дакІнийгу кҫадикІайссар, мунияту учительнал чҫянива хІадур бан аьркинссар бюхханну букинсса бутІри, ми бутІри цивпагу бучІиссар тарихращал бавхІусса ягу цума унугу геройнал хасиятран кҫимат бишлайсса бухҫурча.

ЧЯвуну, дуклакиминнан ххуй къабивзсса произведенияртту учительнал пасихІсса буккаврил, гайннул чулухунмайсса асар чІунийну ккаккан баврил, ххира байссар. Агарда буккуща цала буклакимунил мурад, мяъна чІунийну дурчІин дан бюхълай бухъурча, му буккаву бачІва яруннийну буккавунияр цукссагу хъинссар.

Произведениялул хъирив лаяврил дайдихъулий текст ккалаккини, оърчІая тІалав дайссар пикри бувсса буккаву. ПасихІну, бюхханну буккайни тІурча, му пикри баву хъиннура тІалав дан аьркинссар, цанчирча, пасихІсса буккаврин хІадур байни, произведениялул гъанусса мяънагу, сакиншиннагу, мазгу ххал бивгъуну буну тІий. Бюхханну, пасихІну буккаврил бюхъу бусса чІумал, оърчІру буклакимунил пикри буллан бикІайссар, бувккумур гайннан бигъану бувчІайссар ва га произведение асар шайссар. Мунишала архІал дуклакиминнал мазгу итххяххайссар. Текстрал хъирив лаллалини, пасихІну буклакини, оърчІан лакку мазраву ишла дайсса калимарду дакІий личІайссар, маз авадан шайссар, миннал гъалгъа мяъна дусса ва пасихІсса бикІайссар.

ЧЯвумий дуклаки оърчІал буккаву дикІай ца чІунийнусса, бизарсса, я мурад, я гъанусса мяъна дурчІаврин цичІав кумаг къабуллалисса. Му бакъассагу буклай бикІай къухънану, махъру баччан буллай, букъавчІинну.

ОърчІан мудан дакІний бикІан аьркинссар цала буккаву мудангу тІайласса, бувчІинсса, пасихІсса дикІан аьркиншиву.

Цири оърчІан кІулну бикІан аьркинсса пасихІну буккаврил усттаршивруя?

ПасихІну буккаврил яла агъанмур бутІану хъанахъиссар оърчІаща чІунил кумаграйну личІи-личІисса пикрирдал ва асардал жуларду ккаккан бан бюхъаву.

ОърчІан пасихІну буккин лахъхъин баншиврул хъун бакъасса произведение ягу мунил бутІа ласун аьркинссар. Гъанусса мяъна дурчІиншиврул текст оърчІахъ цавува цала дуккин байссар, яла ххал

бигъайссар га буккинсса чІунил жура. Буклакима, чІунил журалийну, произведениялувусса пашмансса асардугу, дакІнихтунусса хъяхъавугу, шадсса макъугу ккаккан дан бюхълай икІан аьркинссар. Тари дурну хъинсса классрал къатІувсса буккавил дарсирай пасихІсса буккаву, произведениялул хъирив лаяннин ягу хъирив лавну махъ.

Произведение дахъва лахълай байбивхъусса чІумал, оьрчІаша кІанийн дагъсса буккаву дан къашайссар. ПасихІсса буккаву, произведение ххал бигълагъисса чІумал, ягу ххал бивгъуну махъ дарча къулайну хъунтІиссар.

Дуклаки оьрчІан кІулну дикІан аьркинссар призведениялул аьмсса мяъна, сипатру, сакиншинна, буккавил анаваршиврул даража.

Дуккавил шинал ахирданийнин, оьрчІал буккавил даража лавай хъуну, маз пасихІ хъуну бикІан аьркинссар.

Миннан му чІумал бувчІуну бикІан аьркинссар пикри бувсса, аьркинсса куцуй, гъарца чичрулул лишаннай бацІлай дурсса бюхттулсса (лахъсса) буккаву, пасихІсса буккаву хъанай душиву.

ПасихІну буккин лахъхъин баврил ялувсса даву дуллан аьркинссар хъхъичІра хІадур дурсса пландалийн бувну. Асар хъунну буккинсса хаварду ва назмурду учительнал ччянира личІи дурну, хІадур дайссар, гай цирдагу оьрчІан асар биян бансса, маз магъир бансса дикІан аьркинссар.

Классрал къатІувсса буккавил дарсирай литературалул произведение ххал бигъайни, цимилагу кІура баян багъай ганил мурадчІан. Ва чІумаллив ишла дан багъай гъануми лакрал литературалул дарсирдай ишла дайсса, личІи-личІисса журулул мурад бусавуртту.

Дянивми классирттаву ишла дай текстрачІан гъансса, кутІа дурсса, цумур бунугу язи бувгъуну, личІи бувсса бутІул мурад бусавуртту. Вай цинярдагу журулул мурад бусавуртту даншиврул, цила багъайкунсса хІадуршин дикІан аьркинссар – текст цавура цала дуккин, лахъну дуккин, бувккумунил план сакин дан, захІматсса махъру ва калимартту дакІний

дитансса хІарачат бан. Текстрал мурад бусаврил циняр жуарду ишла дайссар цирда литературалул дарсирдайгу, классрал къатІувсса буккаврил дарсирдайгу, классрал къатІувсса буккаврил дарсирдайгу произведение лахъхъаврил циняв шачІунттай.

### **5. Классрал къатІувсса буккаврий каялувшиву даву.**

ОърчІру тарбия бан ишла дайсса личІи-личІисса давурттал кумаграйну, ми цайнува цала пикри бувсса буккаврихун багъну, цайнува цала ххуйсса лу личІи бувну, цила багъайкун ганил мурадгу бувчІуну, произведениелулу хъанахъимунил миннан асар биян бувну бухъурча – му тІайлабацІулун ккалли бан бучІиссар.

Махъсса шиннардий, жула халкъуннал маэшат ссуссукуь хъуну, оърму бутан захІмат хъуну бухъурчагу, газетру, луттирду, журналлу букъачІайсса кулпатру чанну бур, чІявуминначІа шаппа бур цала библиотекартту, бур библиотекартту шяраваллил кІанттурдай, райцентрдай, оърчІру дуклакисса школарттай. Амма оърчІал цайнува цала буккаврил даража тІурча, хъинну лагъсса бур. ОърчІал цайнура цала дурккумур ххал дуллалисса чІумал, чІалай бур, миннал буккаврихсса гъира багъайсса даражалийн биян бувашиву, бувккумунил мурад ва мяънагу миннан багъайсса куццуй дурчІлай дакъашиву. Ва иш, тагъар хъунадакълай дур чІявуми лакрал районнай яхъанахъисса дуклаки оърчІачІа, мунияту цин лавхъхъусса асар биян буллай бур миннал тарбиялийн.

ОърчІру цайнура цала художественный литература дуклансса даражалийн бичин дайсса давуртту лакрал чІявуми школарттай хІурану дур ва му оърмулул тІалавшин дуллалисса тагъарданин диян архру. ЧІявуми дуклаки оърчІан цанна кІулу дакъар дуклан аьркинмур, буклай бур бири-биривсса луттирду.

Мяйлчинмур классрал дуклаки оърчІал буккавил хъирив лаявил чІалачІи буллаи бур миннал лакрал литературалух къулагъас дакъашиву, буккаинигу шеърлий чивчусса ва драмалул произведениярттах бакІ дугълай бакъашиву. Буккавил даража, буккавил чулухунмайсса бургаву личІи-личІисса школарттай ва личІи-личІисса классирттаву ца лавхъхъусса бакъар.

ЧІявумур чІумал оърчІал ми бюхъурду литературалул дарс дишайсса учительнал даврия хъар хъанай дур. Цала даврил хІал кІулсса, литературалул дарсру дишайсса, учительтурал маслихІат буллаи бур оърчІан цайнува цивппа гъира бутансса цаппара къяйдарду.

ОърчІан буккавилхсса гъира бутаншиврул факультативный занятиярттай учительнал маслихІат байссар, буккин лахълахъисса авторнал цаймигу оърчІан ххуй бизан кунмасса произведенияртту. Масала, Ттурчиял Маммадайл «Баргъ бивунни сундаров», Ккурккуллал Щаза «Зайдилов МахІаммадлугъаса зума», С. Гъабиев «ХІатталлив», Гъ Саэдов «Зунттаву къунттал дянив» назмурдашал оърчІру кІул буллаллини, оърчІан чичул творчестволуя кІулмур гъарта баву мурадрай маслихІат байссар буккин вайннала цайми произведениярттугу. Бусайссар чичулт вай назмурдаву шаэртурал Лакку кІанттхсса ччаву, кІанил тарихрахсса, миллатрахсса ччаву, кІикку инсантурал дуллалимунил чулухунмайсса хІурмат чІалачІи буллаи ушиву.

ОърчІан буккавилхсса гъира бутаврил дур цамургу жура – дарсирдашал ва микку дайсса давуртташал дахІаву дакъассагу учительнал цала бувккумур оърчІан ххуй бизанну бусаву. ОърчІахъ, цанма бувккуну ххуй бивзсса луттирдая ва миннул биян бувсса асардануя учительнаща бюхъайссар бусан дарсирай, переменалий, оърчІашал экскурсиялий лавгсса кІанай. ОърчІан луттирдах гъира бутангу, цала бувккумур оърчІан ххуй бизанну бусангу, учитель цал цува ххуйсса бувкуну икІан аьркинссар

– ва хъанахъиссар литература дишайсса учительнаясса хъхъичІра-хъхъичІсса тІалавшинна.

Классрал къатІувсса буккаврий каялувшиву даву мурадрай, учительнан аьркинссар оьрчІан букин маслихІат буллалисса луттирдал сияхІ классраву, чІалачІисса кІанай лахъан. БучІиссар лахъан «Цусса луттирду» тІисса плакатгу, муний чичайссар луттиран цІа, мунил кутІасса мурад, му цуппагу учительнаща бюхъайссар ккаккан бан классрал хъхъичІ.

Литература дишайсса учительнал кумагчину икІан аьркинссар библиотекаръ. Му сакин дуллаи икІан аьркинссар чІун-чІумуй цІуну бувксса луттирдал выставка.

Хъунмасса мюнпат буссар дуклаки оьрчІал дянива луттирду букин ххирасса оьрчІру личІи буну, миннал кумаграйну буккайминнал аьдад хъун дарча. Букин ххираминнал группалул дуллансса даврин ца агъанмур журану бучІиссар ккалли дан миннал цала бувккусса луттирдая кутІасса мурад чивчуну, классрал чІирай лахъаву, мунил оьрчІру буккаврийн кІункІу бантІиссар.

Литературалул дарс дишайсса учительнан, оьрчІал буккавил даража гъаз баву мурадрай дачІи шинал мутгалий кІила-шамила миннан кІулмур ххал бигъайсса классрал къатІувсса буккавил дарс дайссар.

Гъарца дуклаки оьрчІал кутІану цала бувккумуния, цанма ххуй бивзмуния бусайссар. Учительнал бусайссар цанма агъамну чІалачІисса призведениярдал. Ахирданий учитель ацІайссар оьрчІан уттигу кІул хъун аьркинсса агъамсса луттирдай.

## **6. Библиотекалуд даву ва библиографиялиясса кІулшиву ласун кумаг бансса давуртту.**

ЦІанакулсса оьрму баххана хъуну бунугу, чІявуми инсантурал луттирахсса къулагъас чан хъуну дунугу, инсаннал оьрмулуду луттирал бугъайсса кІану хъинну агъамсса бушиву – му шак бакъасса зат хъанай бур. Мунияту учительтурал, аьлимтурал, чичултрал, критиктурал,



библиотекартурал я бурган бан аьркинссар оьрчІру тарбия бавриву луттирал бугьлагьисса кІанттух ва миннул биялалух. Хъуннасса агьамшиву дуссар оьрчІан луттирашчал зана-къала хъун лахьхьин баврих, луттирал справочный аппарат ишла бан лахьхьин баврих гьарца кьини оьрчІру луттирачІан кІункІу тІунсса хасият хъун даврих, луттирдашчал бакъа газет-журналлашчал зун лахьхьин баврих.

Гьарцагу школа кьуртал буллалисса оьрчІан кІулну бикІан аьркинссар луттирал сакиншинна ялтутува бурувгун мунил мурад кІул бан, цайнува цала библиотекалуву цанма аьркинсса лу лякьин.

Ва даву оьрчІашчал лахьхьаврий каялувшиву дан аьркинссар литературалул дарс дишайсса учительнал, школалийсса, шьравусса библиотекарттай зузиминнал.

ОьрчІан луттирдая, ми сакин баврия, тарихрая, га итабакьин хІадур бавриясса кІулшиву ялавайми классирттавар дуллай байбишайсса.

Мялчинмур классравусса оьрчІашчал ялавайми классраву лавхьхьумур куртІ байссар, миннан библиографиялуясса кІулшиву дулайссар, справочный аппарат ишла бан лахьхьин байссар, ва мукунма лахьхьин байссар библиографиялул сияхІру ишла дурну, цанна аьркинсса литература лякьин.

Лавайми классирттаву дуклакисса оьрчІашца цанна аьркин дансса литература мюрщиминнансса ва хъуниминнансса библиотекарттаву лякьин бюхълай икІан аьркинссар.

## **7. Литературалул кружок.**

Школалийсса литературалул кружокраву чІявуну гьуртту шайссар лавайми классирттаву дуклакисса оьрчІру.

Литературалул кружокравусса даврил оьрчІал гьира цукунсса произведениярттах бурив кІул бан кумаг байссар, мазрал чулухуннайсса кІулши шаврин, оьрчІавусса гьунарду итххяххан баврин мадарасса кумаг байссар.

Кружокраву цачІун байссар ца классравусса, ягу ганищала архІалсса классиртгавусса оьрчІру. Кружокрал даврил чул бишлашиссар оьрчІал бюхъулийн, гьунардануйн, гьирарайн. Цайнура цала дуллалисса даврил жура личІий дурну, цува рязину кружокрал давривух гьуртту шаврил, оьрчІал давривух гьансса гьира гьаз байссар.

Кружокрал даврил гьанусса мурад – оьрчІан цайнура цала даву бакІрайн ласун кумаг баву ва миннавусса гьунарду ялун личин баву хьанахьиссар.

Каялувшиву дуллалиминнал кружокрал гьарца членнахьхьун ганал бюхъулуха лархьхьусса даву дулаван аьркинссар. Так му чІумалли оьрчІал гьунар ялун личин бан кумаг хьунтІисса.

Кружокрал план най бунува дачІи шинайсса хІадур дайссар, гьуртту хьанахьими зуруй кІила-шамила батІинсса куццуй.

Махъра-махъсса батІаву оьрчІан лавхьхьумур жям баврин хас дайссар. Кружокрал члентал бавтІминнал хьхьичІун буккан бюхъайссанр хьун бакъасса пьесалушал, концертращал, цайми личІи-личІисса даврил жуардащал.

Литературалул кружокраву гьуртту хьанахьими библиотекарнал, литературалул дарс дишайсса учительнал хьхьичІунсса кумагчиталну хьанахьиссар. Миннал оьрчІру лакку мазрай чивчусса луттирдащал кІул байссар, классрал къатІувсса буккаву сакин даврин кумаг байссар.

Буккултрал кружокрал агьамсса давуну хьанахьиссар, программалувун букъавхсса произведенияртту буккаву ва миннул хьирив лаяву. Ми произведенияртту оьрчІал буккайссар занятиярдай ягу шаппа.

Занятиярттай байсса литературный тІуркІурдал (викторинарттал, литературалул лото, цумур-дунугу темалун хас бувсса учалартту, бусалартту батІаврил) тІабиаьтрал, лагма-ялттумунил, инсантурал оьрмулул хьирив бацІаву дурну, чивчусса хавардал оьрчІру, чантІ учин бувну, итххяххан байссар.

Ва кружокрал давуну ялагу хъанахъиссар литературалун хас дурсса вечерду ва утренникру даву, ми вечердай, утренникирттай выставкарду даву, чИрал газетру итабакъаву, альбомру хИадур баву.

Къулайну хъунтИссар агар хъхъичИсса дарсру хас дарча «Ттун ххуй бизайсса луттирду» «Ттун ххирасса лакрал чичу» ва м.ц. темардан.

Кружокрал давривун духлахиссар республикалийсса чичултращалсса хъунабакъавуртту сакин давугу. ЧЯруну кружокрал заседаниярттал ххал дигъайссар гьуртту хъанахъиминнал чИрал газетрайн чирчусса макъалартту, цала ляхъан дурсса назмурду, хаварду. Ххуйми материаллу чИрал газетрай, ягу кружокрал альбомрай рищайссар.

## **8. Литературалул кружокрай цала улча ва мунил лавгмур лахъхъаву.**

Классрал къатIув дайсса даврил журадарду агъамсса кIану бугълай бур улча лахъхъаврил. Тарбия баву ва за лахъхъин баву оърмулучIан гъан бансса куццух луглай, учительнан цIунил ва цIунил зана бикIлан багъай цивппа яхъанахъисса кIанттул тарихрачIан, оърмулучIан, тIабиаьтрачIан. Мунияту учительнан экскурсиярттал ва цаймигу улча лахъхъаврин хас дурсса материаллал кумаграйну оърчIан литературалуя кIулмур гьарта буллан багъай.

Лакрал литературалуцIун бавхIуну цала кIану лахъхъаву му хъанай дур классрал къатIув дайсса давурттал яла захIматмур.

Мивун духлай дур фольклорданул произведениярдацIун бавхIусса историялул памятникирттащал оърчIру кIул баву ва цала кIанттул чичултрал оърмулушал ва дурмунишал дарсирдайнияр гьарза-гьартану оърчIру кIул баву.

Укунсса кIулшивуртту дулаву мурадрай учительнал кружокраву гьуртту хъанахъисса оърчIру за кIулсса инсантуращал хъунабакъин бувну, архивирттаву яхъусса документирттащал, газетирттащал, журналлащал кIул бувну, фольклордануву ва чичул произведениярдаву чIалачIи бувсса

ишру хьусса кІанттурдайн походрайн, экскурсиярдайн буцирча ххуйну хьунтІиссар.

Цала кІанттуя, ганил лавгмуния, микку ляхъусса чичултрая, гайннал дурмуния, хьхьичІава цала улклуй хьанай бивкІсса иширттая кІулмур гьарта бан ччисса оьрчІру литературалул кружокравун буххайссар.

Лакрал цаппара школарттайгу дур цала историялуцІун, фольклордануцІун, чичултрал дурмуницІун дархІусса материаллу.

Вайннул кумаграйну, лакрал литература дихьлахьисса учительтурал оьрчІан кІулмур гьарта буллай бур, миннан личІи-личІисса чІуннардий хьанай бивкІсса иширттал хьирив лаянсса гьира бутлай бур.

Кружокрал члентуран, литературалул хрестоматиялий чивчумурнир ххишаласса материал учительнал цала дулайссар, ягу дуккинсса кІану ккаккан байссар.

Цала кІанттул лавгмуния, тарихрая, халкъуннал дакІнихсса творчестволуя кІулмур авадан баврищал архІал оьрчІан произведениярдаву чІалачІи бувмунин, тарихраву хьанай бивкІмунин кьимат бишлан лахьхьайссар.

Фольклорданул произведениярттаву, магьраву, лахьи балайрдаву, учаларттаву, бусаларттаву чІалачІи увну ур хІакьсса инсан-зузала, буттал кІану душманная буручлачисса виричу, цала халкъ ва ватан ххирасса инсан укунсса хасиятрал лишанначІан кІункІу тІий икІан багьлай ур оьрмулул ххулла байбихьлахьисса инсан.

Вай произведениярттангу багьайсса кьимат бивщуну, шивусса вирттаврал ххуйми хасиятру дуклаки оьрчІаву тарбия давриву цин лавхьхьусса кІану бугьлай бур литературалул краеведениялул кружокрал.

Улча лахьхьаврицІун дархІусса давурттаву агьамсса кІану бугьлай бур лув кІицІ лаглагисса даврил жулардал:

а) Цала райондалул оьрмулул личІи-личІисса чуллаясса, чичрулул давуртту дайни ишла дан куннасса материал оьрчІал цайнура цала датІаву;

- б) Лакрал чичултращалсса хьунабакъавуртту;
- в) Чичул оърмулуцун, ягу даврицун бавхусса кланайн экскурсия баву;
- г) Чичултрал цала ватандалун хас бувну чивчусса произведенияртту лахъхъаву.

Вай укунсса давурттавух оърчIру шавкьирай хIала буххайссар, миннул гайннан цала Буттал кланугу, миллатгу ххира хьун бан кумаг байссар.

### 9. Литературалул кабинет.

Гьарца предметран цинма хасъсса кабинетраву дарсру дишаву школалул оърмулувун цIакьну бувххуну бур. Школарттай цин лавхъхъусса, кабинетирттаву дарсру дишаврил опыт сакин хьуну бур. ЧIявуми школарттай литературалул ва мазрал дарсру дишай ца кабинетраву.

Кабинет – му хъанай бур дарс дишайсса класс-лаборатория ва учительнансса лаборатория, мунал цала чIалачIи пособия, методикалул пособия, классрал къатIувсса оърчIащал цащаралусса даву, стенгазета итабакъаву – гьарзад дайссар ва кабинетраву.

Литературалул кабинетрал чIирттай лахъайссар лакрал писательтурал портретру, миннал мазрая тIий бивкIмур. Гьарцагу классраву буссар кабинет оформить бан кумаг бувансса оърчIру. Миннал кумаграйну хIадур байссар чIалачIи пособия цукунсса дунугу темардан хас дурсса выставкарду.

Литературалул дарсирай яла ишла баймур ярагъ бур лу.

Кабинетравусса хьун бакъасса библиотека сакин байссар оърчIал дарсирай ва классрал къатIувсса давурттай ишла байсса луттирдая. Вай луттирдай бикIайссар программалий лахъхьин ккаккан бувсса произведенияртту. Кабинетраву бикIан аьркинссар методикалул журналлу:

«Литература в школе», оьрчІансса журнал «ЧПавалачин», литературно-художественный журнал «Цубарз», журнал «Зунттал хъами» ва мукунна лакку мазрай итадаркъсса критический литература.

Кабинетраву бикІан аьркинссар лакку мазрайсса орфографиялул словарь, лакку мазрал ва оьрус мазрал словарь ва мукунна кабинетраву бикІан аьркинссар писательтурал союзрал справочник, писательтурал оьрмулуя ва дурмуния чивчусса луттирду.

### «БАРХЪАЛЛАЛ КЪАЙДАР»

Халкъуннал ляхъан бувсса ва лахъи балай оърчІан лахъхъин буллаллийни, учительнал бусан аьркинссар хъхъичІва-хъхъичІ кІа балайлувусса ишру хъанахъисса заманаля, лакрал шамхалтурая ва хантурая.

Гъухъаллал шяравалу Гъумучиял шяраваллицІун ларчІсса, цайнува цурдалусса, цила каялувшивурду дуллалисса бакІчитал бивкІсса, цила мюхчаншиву дуруччин бувсса къала бусса, цила хъу-лухччив, цила хІатгаллив дусса шяравалу диркІшиву бувчІин байссар. Бусайссар ми шяраваллал дяниву цащала цала талатавуртту шайсса диркІшиву, куннал къаларду куннал ласаврил цІанийсса талатавурттугу, хъунисса цайми журалул рагъавурттугу шайсса диркІшиву.

Гъумучиял шамхалтурал, хантурал цайнма мютІийну битлай бивкІссар ханлугърайсса циняр шяраваллал жяматру, миннащала архІал Гъухъаллал жяматгу. Ми рагъавуртту сававну Гъухъаллал шяравалу цимилагу лекъа-пІякъу дурну дур, кІира-шанна кІанайн дизан дурну дур. Мунихлуну Гъухъаллал жяматрал Гъумучиял хантал душманну бивкІун бур 16-17 ттуршукурдай.

Гъазигъумучиял шамхаллугърай личІи-личІисса шамхалтал каялувшиву дуллай бивкІун бур XVII ттуршукулул дайдихъулий. Шамхаллугърая личІи хъуну дур шамхалхъал тухумравусса Магъид (Мехти) бакІчисса Гъухъаллал ханлугъ ва арнил кІанай – Таркиял ва Эндиринал (Султан-МахІмуд) ханлугъру. Вайннал дяниву дайдирухъуну дур куннайн кув къаршисса талатавуртту. Ва чІумуву хъусса иширттаятусса бухъунссар «Гъухъаллал Къайдар» тІисса лахъи балайгу.

Халкъуннал мурадирттахлу талатисса, гайннал цІаний цала жан виричушиву дурну, харж дурсса Къайдар ва балайлуву хъинну бюхттул увну ур.

ТарихрацІун бавхІусса ихтилат бувну махъ, учительнал оърчІру дус бан аьркинссар балайлул гъанусса мяъналушал. Лахъи Сурхайл аьралуннашал талатисса Къайдардул цацІавасса урчІва ккулла ва урчІра чІатІаракІ щялу къадурну, душмантурайн щун дуллай ур. Ва хъунмасса гъунар бусса талатала ур.

КІилчин оърчІахъ бусан аьркинссар Къайдар цала бурж марцІну, дакІнихтуну биттур байсса халкъуннал патриот ушиву. Га хъуслих, мусих душмантураща машан ласун къашайсса виричу ушиву. Мунияр ххишалагу, Къайдар цува дащуй бихълай, къюкьин буллай ур душманнал канин лавгсса Мамашбаг ва ХІайдарбаг. Вай хаинтал оърчІангу къаччан баншиврул Буттал кІанттул цІанийсса дяъвилиятусса, хаинтуран инсантурал дяниву кІану къабикІан аьркиншиву бусласисса мисаллугу буцин аьркинссар.

Балайлуву Къайдар чІалачІи увну ур цайва гуж буссаксса ялагу талан хІадурсса къучагъну. Га Гъухъаллал душварахъ, хъаннихъ, арантуннахъ миннат буллай ур цанма уттигу битлансса ккулла-янсав булара тІий. Ганан ивчІан ччай ур цала къалалул лагма дургъусса, пперха тІисса ярагъуннивун ахълавгсса Сурхайл нукар – цала душман.

Балайлул ахирданийгу, Къайдар чІалачІи увну ур душманталгума махІаттал хъунсса журалийсса виричуну, ссаятучІав нигъ-ццах бакъасса игитну. Га къалалия ххявххун лаикІан ччай ур, амма ца ххуй дакъасса щарссанил маз бувну, га душмантурахъхъун гъавгъсса ччаннашал, сагъну уна ириллай ур.

Амма ганал ва захІматсса чІумувугу цала инсаншиву бюхттулну ядуллай ур, мунишала архІал душмантал къюкьин бансса оьвчавугу дуллай ур:

«Утти ва ттул качар чурх

Зу шавхъун букияра,

Ттувур рухІ дуссаксса



Къала цІакъну ябував!»

Лахъи балайлуву аьщуйн щуну ккаккан дурну дур та заманнайсса оьрмулул, багъу-бизулул, маэшатрал суратругу, ярагъуннил цІардугу (янсав-чила, ккулла-чІатІаракІ, къирин-мажар), чІюй-къалагу.

Къайдар мискинсса инсантурава увксса, гайннал пикрирду, мурадру буручлачисса инсан ушиву назмулул ахирданий бувсун бур. Ганал шарсса, чІивисса арс, сусул рургъусса чІирисса хъу, къяча бур. Вайннал Къайдардул шала хъус-къини. Хъирив бувчІин байссар цІусса махъру, калимартту.

Хъиривмур дарсирай учительнал оьрчІру дус бан аьркинссар лахъи балайлул композициялушал, сюжетрашал, ганил мазрал яргшиврушал, ганиву ишла бувсса мазрал пасихІшиврул ярагъуннишал ва бувчІин бан аьркинссар оьрчІан бувчІин захІматсса махъру.

Лахъи балай сакин хъуну бур аьдатравун багъсса суал-жавабирттая, кІиннал куннашал куннал буллалисса (диалограл) ва цаннал буллалисса (монолограл) ихтилатирттал журалий. Мунил балайлул биян буллалисса асарду хъиннува гуж буллай бур. Аьдатравун дагъсса тикрал бавуртталгу (Къайдар! – кури, оьвкури...», «Къалалувусса цури?...») балай буккин ва бувчІин, дакІний личІан ва дакІних бусан кумаг буллай бур.

Лахъи балай сакин бувну бур жула халкъуннал аьдатравун дагъсса сюжетрал къяйдалий (завязка – дайдихъу) Къайдар къала ябан тІайла уккаву ва ялами ишру. Кульминация (ишру заваллайн бияву) – КъайдардучІа ккулла-чІатІаракІру духлагаву, чІюйлуцІух цІу лачІаву. Развязка (ахир) – Къайдар душманнахъхъун ирияву. Ганал бивкІулул ляличІишиву – цала буржру марцІну биттур бавриясса ххаришиву.

Балай чІюлу буллай бур (Къясуксса, закканаксса Къайдар, Къара Магъди тІисса, чІавкІлил чІатІаракІ, чІутІул ккулла, янсаврал чила, алмасрал ярагъ) тІисса эпитетирттал, метафорардал ва цала балай дузал буллалисса бувчІинсса яргсса мазрал.

Балайлуву бур оърчІан бувчІин захІматсса тамансса махъругу: илчи, чІатІаракІ, чила, чІюй, сус, куча. Балайлул бувчІин буллалисса мукъурттищал архІал, кІай махъругу оърчІахъ цала тетрадирттай чичин бан бучІиссар.

Мукунна оърчІащал дан аьркинссар произведениялул хъиривсса методический апаратирттаву ккаккан дурсса циняр давуртту. Дарс къуртал дан аьркинссар Къайдардун кунна жула халкъуннангу цивппа бувсса кІану ххирану, цала дуллалимур тІайлану дуллан аьркиншиву бусласисса ихтилатрайну, балайлул ца парча дакІних лахъхъин булун бучІиссар.

## ГЪАРУН САЭДОВ

(1894–1919)

### «Леххаву»

Мяйлчинмур классраву дуклаки оърчІру цалчин кІул хъанай бур Гъ. Саэдовлул оърмулушал ва дурмунишал.

«Гъарун Саэдовлул оърму муданма личІантІиссар жагъилминнан эбратну. КІяла къазахънал ЦІахъардал къуманиву аьщун ивзусса чІумал, га хъинну жагъилсса инсан ивкІун ур. Цала жагъилсса оърмулий ганал дурмур, чирчумур лаласурча, чІалай бур Гъарун, махъ бакъа, пагъму лавайсса инсан ивкІшиву. Га ур жагъилну унува хІукуматрал хъунисса къуллугъирттай итан лайкъ хъусса революционер, чичу, публицист, шаэр, драматург. Агъалинан Гъарун бусравсса ивкІшиву чІалай бур лакрал чІявуми шаэртурал ганая назмурду чичаврийну»<sup>1</sup>.

Гъарун Саэдовлул чивчусса «Леххаву» тІисса назму лахълан хъхъичІ учительнал оърчІру кІул байссар ганал биографиялушал.

Гъарун Саэдов увссар 1891-ку шинал, 8 майрай, Ваччиял шяраву Гъази-Гъумучиял округрай дилмажну ва школалул учительну зий ивкІсса Саэдлул кулпатраву.

Гъаруннул ппу ивкІссар, цала чІумух бурувгун дурккусса, арсру дуккин бан хІарачат буллалисса инсан. Мунияту ганал цала арсру (Бадави, Гъарун, Сайпу, Дивир) дуккин бувссар. Къурандалий ивтун, буккин чичин лавхъхъуну махъ, 1902-1904-ку шиннардий Гъарун Гъумуксса школалый дуклай ивкІссар. Яла га буттал уххан увссар Щурагъсса реальный училищалувун. Гиву Гъарун ва МухІуттин Чаринов цІакъсса дустал хъуссар. 1915-ку шинал га увхссар Москвавуллал коммерциялул институтрал технический отделениялувун. Институтраву дуклай унува,

---

<sup>1</sup> С.Х. Ахмедов. Лакрал литературалул тарих. МахІачкъала. ИЯЛИ РАН. 2006, с. 14.

Гъарун дус хъуссар революция дан чялиш хъусса студентътурашал (Уллубий Буйнакский, Султан-Саэд Казбеков ва цаймигу).

Февраль революция хъуну махъ, Гъарун Саэдов увкIссар Дагъусттаннайн. Щурагъ Гъаруннул ва ганал дустурал сакин дурссар «Дагъусттаннал просветительно-агитационное бюро» тIсса жагъилтурал организация. Гъарун Саэдов увчIуссар га бюрорал председателънал заместительну. Бюрорал хIукмулийн бувну, Гъаруннул байбивхъуссар «Илчи» тIсса лакку газет итабакълан. Газетрал хъхъичIми номерду буккан бувссар ганал цала, ливчIми – Курди Закуевлул. Гъаруннул цаймигу лакрал жагъилтал зузи бувссар гезатраха. Ибрагъим-Халил Къурбанаълиев чичлай ур: «Гъарун дакIнил чани хъинну гъартасса ия. ПаччахIлугъирттал давуртту, гайннал политикартту, жула къатлувусса давуртту кунна, кIула, личIи-личIисса партиярду, гайннал мурадру, гайннал лавсун нанисса ххуллурду, бавккумур, тIайламур хъинни хъирив лавну кIула. Агъалийнан хайр бумур зарал бумур аьчухну ккаккан бан гъунар бусса ия. ТIайла дакъашивурттая сивсуну чивчуну, агъалийнан чIалачIи буван гъунар бусса ия. ТIайладакъашивурттая сивсуну чивчуну, агъалийнан чIалачIи бувну, бавккуми баявур бан усттар ия»<sup>1</sup>. «Гъарун инсаннайн хъинну гужну асар биян байсса инсан ия»<sup>2</sup>, – тIий чичлай ур гава Ибрагъим-Халил. «Илчи» газетрайхчIин Гъ. Саэдов бувчIин буллай ивкIссар дунияллий хъанахъимур, халкъуннал хъхъичI бавцIсса масалартту.

Революция хъуну махъ Гъ. Саэдовлул хъунмасса захIмат бувссар Дагъусттаннай Совет хIукумат дихълай. Га увчIуну ивкIссар Военно-революционный комитетрал председателънал заместительну, ганайн тапшур бувну бивкIссар дяъвилул иширтталсса байсса отдел. Ганал ва МахIач Дахадаевлул хIарачатрайну сакин бувссар дяъвилийн хIадурсса ятIул аьрал.

<sup>1</sup> ЦIубарз, 1992, № 1. 68-69 л.

<sup>2</sup> Там же.

1918-ку шинал июндалий, ревкомру букъан бувну, гайннун кІанай советру бувчІлан бивкІукун, Гь. Саэдов увчІуссар Щурагьсса советрал исполкомравун. Исполкомрал га гьан увссар Аьшттарханнай Совет хІукуматрал хьуниминнахь кумаг бува чин. КІилчингу га гьан увссар Царицыннай кумаграл хьирив. Га Царицыннай унува, сентябрь зуруй, Дагьусттаннай хьунисса ишру хьуссар. Полковник Бичераховлул аьралуннал Совет хІукумат лиян дурну диркІссар. Ганалва хьирив зунттавун бувкІссар туркнал аьралгу.

Шавай зана хьукун, Гьаруннун багьссар Лаккуй кьютІну зун. Гьази-Гьумучиял округрай ганал коммунистурал ячейкарду дурссар, партиялул комитет бувссар, цува бакІчисса. 1919-кусса шинал мартрай ганаша бювхьуссар Гьумук Совет хІукумат дишин. Щурагь Зунттал хІукумат тІисса буржуазиянал хІукуматрал Уллубий Буйнакский ва ганал гьалмахтал бувгьусса чІумал, Гьарун Саэдов бакІчину лакрал аьрал бавчуссар гай мурахас бан. ГайннацІун дарги, кьумукь цацІун хьуну, Лавациял шяраву штаб бацІан бувссар. Га восстание гьагьан дан зунттал хІукуматраша хьанай кьабивкІссар. Мунияту Деникиннул гьан бувссар кІяла кьазахьнал аьрал, зунттал миллатру цайнма мютІи бан.

Ярагьуннил балгусса аьралуннал хьхьичІ партизантураша бацІан кьавхьуссар. Гайннал хьуниминнал маслихІат бувссар, шаппа-шаппай лавгун, халкьуннахь хьумур бусан. Му ниятрай Гьумукух хьуну нанисса Гьарун Щаврдал кьурув увгьуссар кІяла кьазахь барча бан нанисса паччахІнал хІаписартурал. Гайннал Гьарун уллуссар кІяламиннахьхьун. КІяла кьазахьнал хІаписартурал Гьаруннухь, большевиктурая личІи хьурча, сагьнугу итанну, хьуннасса чингу дулунну увкукун, Гьаруннул кьянкьасса жаваб дуллуссар: «Большевикра на ниттил увнийгу, уттигу, ивкІуну махьгу».

КІяламиннал Гьарун аьщун ивзссар Цахьардал кьуманиву 1919-ку шинал 15 августрай. Укун кьуртал хьуну бур Гьаруннул яргьсса оьрму.

Мяйлчинмур классраву лахьхьайсса «Леххаву» тIисса назму чирчуну дур революция хьуннинна.

Шаэрнал биографиялушал оьрчIру кIулгу бувну, назмугу дурккуну махь бусайссар оьрчIахь ва назмулийну шаэр зунттал жагьилтурайн дуккаврийн, тархъаншиврийн оьвтIий ивкIшиву. Га шеьрилуву шаэрнан, буттал билаят аьзиз хьуну чIалай, жагьилтурахь ганин кумаг бара тIий, оьвтIий ур. Га ур «тяхьасса чаннасса кьини чIа чайминнахь», «ххаллилсса хияллу дакIниву буминнахь», «чантI учияра», «лавай бизияра», аьзизсса миллатран хьинбала бара, уттиратти аьрци цIулаган дара тIий.

Назму хьун дакъасса духьукун, бучIиссар классраву цаппара ххуйну буккайсса оьрчIахь дуккин бан яла оьрчIащал ххал бигьин мазрал пасихIшиврул ярагьру. Ххал бигьайссар оьрчIащал шеьрилуву ишла бувсса шавкъ рутансса махьру-сипатру: «ххаллилсса хияллу», «тяхьасса, чаннасса кьини». Шаэр элму лашан дуллай ур багьраха, аьвамшиву – лухIисса цIаннаха. Миллатрая гьалгьа тIутIини, га ишла буллай ур «аьзизсса» тIисса эпитет. Жагьилтурал хьхьичI шаэр бихьлай ур лавайсса масала: дуккаврийхчIин дуниял цIулаган дан.

ОьрчIан кIул хьумур жям баву мурадрай бучIиссар булун суаллу:

1. «Леххаву» тIисса махь шаэрнал ци мягналий ишла бувну бур?
  2. Шаэр щийн леххаву тIий ур? Миннахь дасттарду дахIияра тIутIаврил мурад ци бур?
  3. «Уттиратти лухччи цIулаган дара», – тIисса махьру зун цукун бувчIлай бур?
  4. Назму ци чIумал чирчусса дур?
  5. БучIирив назму цIанасса оьрмулийнгу «Леххавуну» ишла дан?
  6. «ЛухIисса цIанну» шаэрнан ци чIалай диркIиссар?
- Шаппай балай дакIних лахьхьин булайссар.

## САЭД ГАБИЕВ

(1882–1963)

### «КъачІуннивкъай», «Аьйб мадари»

Шаэр, чичу, публицист, хьунасса революционер ва та чІумалсса лавайсса къуллугъчи Саэд Ибрагъимович Габиев увссар Аьрасатнаву. Ганал ппу Гъумучатусса Ибрагъим 1877-ку шиналсса восстаниялувух гьуртту хьуну тІий паччахІнал хІукуматрал гьан увссар Псковский губерниялийсса Опочка тІисса шагърулийн цала кулпатрашал. 1882-ку шинал 28 майрай гикку увссар Саэд. Га увну цаппара хІал хьукун, циняв ссивир бувми Опочкалия шаппай бавчуну бур. 1883-ку шинал гай бивну Лаккуйн.

Саэд дуклан ивкІун ур Гъумуксса оьрус школалий, га школалул цалчинмур класс къуртал бувкун, 1893-кусса шинал, га дуклан гьан увну ур Щурагъсса реальный училищалувун. Амма гиккугу личІину аглан хьун къаивтун, буттал га, увцуну, 1894-кусса шинал уххан увну ур Ставрополлай гимназиялувун. Га гимназия тІивтІуну бивкІссар Кавказуллал оьрчІан паччахІнал хІукуматран аьркинсса къуллугъчитал хІадур буллан. Амма Ставрополлай гимназиялува бувккун бур тамансса революционертал (Саэд Габиев, Уллубий Буйнакский, Жалалуттин Къоркъмасов ва цаймигу). Саэдлул гимназия къуртал бувну бур 1903-ку шинал.

1904-1911-ку шиннардий Саэд дуклай ур Петербурглийсса университетраву (физико-математический факультетрал естественно-тарихийсса отделениялуву). Аьрасатнал цалчинсса буржуазно-демократийсса революциялул чІумал Саэд Габиев, ярагъ канихьну, гьуртту хьуну ур Путиловский заводрал зузалтрал дурсса баррикадарттай хьусса къызгъинсса талатавриву. Революциялул чІумалгу, га дух хьуну Саид къюлтІну Петербурглия ярагъ, революциялин оьвтІисса литература тІайла дуклай ивкІун ур КІапкІайлин, Грозныйлин, цайми шагърурдайн. Ганал

дачин дурну дур халкъ чантI чин баврил даву: личIи-личIисса шагьрурдай га ккалай ивкIссар лекциярду, 1912-1914-ку шиннардий итабакьлан ивкIссар Петербурглий «Зара Дагестана» ва «Мусульманская газета» тIисса газетру. «Заря Дагестана» итабакьайсса бивкIссар оьрус мазрай, амма ганиву рищайсса диркIссар Дагьусттаннал мазурдийсса макьалардугу. Гай макьалардаву Саэд Габиев халкъуннахь буслай ивкIссар дунияллий ва Аьрасатнаву хьанахьисса иширттая, оьвтIий ивкIссар буттал кIану цIулаган бан чялиш хьияра, цIусса школарду тIитIара, чантI тIутIияра, дуклаки тIий.

Гай газетирттайсса чIярусса макьаларду (оьрус ва лакку мазрайсса), шеьрирду, «Халкъуннавун» тIисса повесть, «АхIмакъ» тIисса аллегория чивчуну бур цала Саэд Габиевлул. «Заря Дагестана» тIисса газетравусса статьярду мукун къутIайсса бивкIссархха, хIатта га Дагьусттаннал губернатор Вольскийл судрахьхьун уллуну ивкIссар. МахIач Дахадаеввлул залогран арцу дуллуну, дуснакьяра мурахас увссар.

1917-ку шинал февраль революция хьувкун, Саэд Габиев увкIссар Дагьусттаннайн, апрель зуруй га увчIуссар Гьази-Гьумучиял округрал комиссарну. Граждан дяьвилул чIумал га цIакьну талай ивкIссар Совет ХIукуматрахлу.

1918-ку шинал га увчIуну ур Военно-революционный комитетрал членну, Щурагьиял советрал председателюну, Военно-революционный трибуналданул председателюну.

1920-1921-ку шиннардий Совет ХIукуматрайн кьаршину ХIуциннал Нажмуттиннул восстание гьаз дурсса чIумал, С. Габиев ивкIун ур Дагьусттаннал ревкомрал председателюну. 1920-ку шинал 13 ноябрданий ганал датIин дурну дур Дагьусттаннал халкъуннал чрезвычайный съезд. Габиевлул къамул увну ур га съездрайн Дагьусттаннал автономия баян бан увкIсса, хьунасса бакIчи И.В. Сталин.



Ж. Къоркъмасовлушал ва Аь. Тахо-Годишал га гъан аьркинну бивкІссар Москавлий Дагъусттаннал конституциялулсса бан. Амма дяъви къызгъинсса, Совет хІукуматран нигъачІсса чІун дуну, ганаща къабювхъуссар гъан. Ганан кІанай гъан увссар М.-М. Хизроев.

1920-ку шинал С. Габиев увчІун ур III интернационалданул Баргъбуккавал билаятирттай пропагандалул ва революциялул иширтталсса байсса советрал членну. Дагъусттаннай совнарком хъувкун, га ивтун ур хъхъичІа-хъхъичІсса просвещениялул наркомну. Га даврий 1921-1923-ку шиннардий С. Габиевлул хъуннасса даву дурну дур, цІусса школарду, техникумру тІитІлай, учительтал хІадур буллай. 1923-1926-ку шиннардий га зий ивкІун ур финансирдал наркомну.

1927-ку шинал Коммунист партиялул хІукмулийн бувну С.И. Габиев гъан увссар. Ттуплислий зун ЗСФСР тІисса Грузия, Армения ва Азирбижан цивун бухлахисса хІукуматрай га хъунисса давурттай зий 10 шин дурссар. Муния мукъахгу Габиев ялапар хъанай ивкІссар Ттуплислийва, пенсиялийнгу увккуну. Га ивкІуссар 1963-кусса шинал Ттуплислий, цала аманатрайн бувну, увччуссар Гъумук.

Саэд Габиевлул творчество дур лакку мазрайссагу, оьрус мазрайссагу. Га чичлан айивхъуну ур гимназиялуву дуклай унува. Ганал жагъилнийва чивчусса «Лак. Гайннал лавгмур ва багъу-бизу» тІисса художественно-этнографический ва тарихийсса очеркраву ххуйну бувсуну бур лакрал тарихрая, багъу-бизулия. Ганиву С. Габиев буслай ур лакрал щамххалтурая, хантурая, тарихраву гайннал дурсса давурттая.

Ганияр махъгу С. Габиевлул чирчуну дур чІярусса элмийсса давуртту, итабавкъуну бур назмурдал жужру. «Заря Дагестана» тІисса газетравусса цала макъалардаву С. Габиев ур халкъ чантІ чинмур буслай, паччахІнал хІукуматрал низам дащуй дихълай, захІматкаш революциялул ххуллийн буцинмур буллай. Масалдаран, 1912-ку шинал оьрус мазрай ва лакку мазрай чирчусса «30 май» тІисса макъалалуву С. Габиев ур: «...жагъ

супитурал жагъ ялувсса хІакимтурал приказирттал цичІав чІалан къадитлай, цІусса ттизаманнул оърмуллул ссихІ буххан къабитлай бур жула зунттавун», – тІий.

«ЧІунни, валлагъ, чІунни жуласса жува буллан, акъарив, жула къацІлив къюлтІ учара тІий дишин цучІав къаучІайссар. Дуниялгу, чІунгу жухра ялугъи дакъассар, найри дусса, лахълахъи, дуклаки, мадрасартту бан кумаг бара чув булларчагу. Му зу барча, дунияллий барчаллагъгу, ахиратлуву чиригу чан къахъунтІиссар. Цалассанияр жяматралмур иширалсса бан аъркинсса гъарица бурхънисса чувнал», – тІий чичлай ур С. Габиев.

ОърчІру чичул биографиялушал кІул бувну махъ, бусайссар гайннахъ ванал творчестволуву агъамсса кІану бугълай бушиву революциялул темалул. Ва тема душиву ванал прозалуву ва поэзиялуву. Бусайссар мукунма С. Габиев хияллай ивкІшиву буттал улча тархъан бувну, цІусса циняв рязисса, халкъ чантІ кусса низам дишин. Га оьвтІий ивкІун ур паччахІнал низам мархлуцІакул даххана даврин, тархъаншивруйн. Мукунминуясса хъанай бур оърчІал мяйлчинмур классраву лахъхъайсса «КъачІуннивкъай» тІисса назму.

Ва назмулул гъанусса мяъналуясса кІулшивугу оърчІан дуллуну, учительнал цалагу бувккуну, оърчІахъгу буккин бувну махъ, бучІайссар назмулул анализрайн.

Цалчинми ххуттардивува шаэр оьвтІий ур мискинсса зунттал агъулдануйн, зулкукартурайн къаршину къянкъану бацІияра тІий. Шаэрнал пикрилий угъ-къак тІий, бан-бит бакъа оърму къабутлай, халкъуннан аъркинну бур «къуману ливчІ миллатрангу» леххавурттугу дуртун, ца инсан кунма гъаз хъуну, зулму ялату экъиличин, «жандармтурал ххурххуппа» ххит дан. Га дащуй бихълай ур агъалинай зулму буллалисса чиновниктал, машацитал ва хІаписартал.

Шаэрнан халкъ щинзирданий бавхIусса кунма чIалай бур. Мунияту га леххаврий ур «...ятIул ттугъгу бувну», чулданин буккан чIунни тIий. Агарда хIисав дарча ва назму, чIалай бур шаэрнан бувчIлай бивкIсса революция гъан хъанахъишиву. Назмулуву дакъар личIисса чIюлушиннарду (эпитетру, метафорарду), амма ишла бувсса лашанбавурттал (ттукри, ащак, ххурххуппа, ккаччал ссинжир) хъинну гужсса асар буллай бур цила иттав къутIинну учаврил.

Хъирив лаяву дурну махъ, бучIиссар оърчIахъ буккин бан ва бувчIумур жям баву мурадрай суаллу булун:

1. Назму цумур хIукумат дусса чIумал чирчуну дур?
2. ПаччахIнал заманнай хъанай бивкIсса ци иширттал къума уллай ур шаэр?
3. Назмулуву чичлачисса лавхъхъусса цукунсса ишру хъунабакълай бур цIанасса жула оърмулуву?

Назму шардай дулайссар пасихIну дуккин лахъхъин.

Хъиривмур дарс харж дайссар «Аьйб мадари» тIисса назму лахъхъаврин. Балайлуштал оърчIру кIул баннин бусайссар ва назмулуву шаэрнал цала буттал кIанттухсса ччаву чIалачIи дуллай ушиву, цува къадарданул архсса кIанттаун увтун унугу, дакI ва аькълу цала буттал кIанттучIара душиву буслай ивкIшиву.

Яла учительнал назму дуккайссар пасихIну, дюхханну. Хъирив дуккин байссар оърчIахъ. Яла бучIайссар назму ххал дигъаврийн. Назмулул дайдихъулийва чичун цала буттал кIану цуксса ххирассарив чIалай бур. Му ур «ччисса буттал кIанттурдив», «щюлли барзунттив» тIий, мукун ччай бунугу му къадарданул увтун ур «дакIнин хас бакъасса ухссавил чулийн, амма дакI ва аькълу даинма гъанну, зуя аьтIий бикIай дяхтта ва хъхъунив». Шаэр цала буттал кIану дакIния буклай акъар мунияту «кIюрххил лавай ивзун, чани ххал хъувкун, хъхъичIра-хъхъичI зул сурат ттун чIалан дикIай» тIий чичлай ур. Мунан цува цала ватан

къадиртун, цамур кІанай ялапар хъанай унутІий тахсиркарну чІалай чичлай  
ур:

Ялтту бучІу ттуя, аьзизсса миллат,  
Зуха дансса даву къадунна лирчІри,  
Душмантал сававрай гъурватрайн агъну,  
Жан дакъа зун дулун цичІар къалирчІри.

Назму ххал диргъуну махъ, бучІиссар оьрчІахъ назму дуккингуну  
дурну, кІулмур жям баву мурадрай булун суаллу:

1. Ва назму ци чІумал чирчухъунссар?
2. «ДакІнин хас бакъасса ухсавнил чулий» циван яхъанай ивкІссар  
шаэр?
3. Буттал кІанттухсса мякъ цумур куплетрайну чІалачІи бувну бур  
шаэрнал? ва м.ц.

Шардай назму «Аьйб мадари» пасихІну, дюхханну дуккин дулун.

**КУРДИ ЗАКУЕВ****(1888–1968)****«Бюхттулнинмай»**

Курди Закуев (АхІмад Каради) увссар 1888-ку шинал Гъумук аьраб мазрай дурккусса аьлимчу МахІаммад-хІажинал кулпатраву. МахІаммад-хІажинал цала арснан аьраб мазгу, цайми элмурдугу лахъхьин дурну дур. Чаххучу Саэд Габиевлул ганан оьрус алфавитрай буккин-чичингу лахъхьин бувну бур. Гъумучиял школалуву ва Бархъарав МаллайЧа дуклайгу ивкІун, АхІмад Каради (Курди) увкІун ур Щурагъун, Аьли КъаяевлучІа дуклан. Щурагъату га лавгун ур Аьшттарханнайн. Гикку ганал 1913-ку шинал къуртал бувну бур бусурманнал мадраса. Мунийгу гъашиву къадурну га лавгун ур Къазаннайн, яла Уфалийн. Гай шагърурдай хъхьичІазаманнай бусурманнал лавайсса даражалул мадрасартту бивкІссар. Гайннуву лахъхьайсса бивкІссар мазру, тарих, философия, психология, педагогика ва цаймигу личІи-личІисса элмурду.

Курди Закуевлун хавар бивкІссар революциялул иширттаягу. Ганал буккайсса бивкІссар Петербурглий Саэд Габиевлул итабакъайсса «Заря Дагестана» тІисса газет. 1913-1914-ку шиннардий га цувагу айивхъуну ур статьярдун чичлай. Гай бивщун бивкІун бур татар мазрай Ризаутдин ФахІредин тІисса просветительнал «Шура» (Совет) тІисса газетрай.

1917-ку шинал, февраль революция хъуну махъ, Курди Закуев увкІун ур Дагъусттаннайн. Щурагъ му дус хъуну ур Гъарун Саэдовлушал ва Ибрагъим-Халил Къурбанаьлиевлушал. Курди гъуртту хъуну ур «Дагъусттаннал просветительно-агитационное бюрорал» давриву Гъарун Саэдовлушал архІал итабакълай ивкІун ур «Илчи» газет. Махъ ганая хъуну ур редактор. М.-М. Мавраевлул «Илчи» лавкъукун, К. Закуев ва И.-Х. Къурбанаьлиев буккан буллан бивкІун бур «ЧаннацІуку» тІисса газет (1917-1918-ку шиннардий). Га газетрай бивкІссар К. Закуевлул чивчусса

«Чалаби ва Султан», «МахIаммадал ва Къаракишинал ихтилат» тIисса хаварду.

Турк Щурагъун бувкIсса чIумал га лавгссар буттал шяравун, Гъумук ганал «Пакъир-пукъаранал ккуран» тIиртIуссар.

1918-ку шинал июнь зуруй Гъумукун Узун-ХIажинал гъарачитал бувкIун, милли-комитетрал ишру бавчуссар. К. Закуевлул къатраву цIухла бивхъуссар. Курди цувагу угъан ччай бивкIссар. Амма Курди зунттаву хъуну Закаталлайн лавгссар. Бархъарав ганан кумаг бувссар Маллайл, цала къатраву лаивтун.

Закаталлай ганан хъунаавкъссар Турциянава шавай нанисса ссурахъу Закаръя (Заку). Заку ивкIссар заргал. Дяъвилул чIумал га туркнал аьралуннаву ингилисначал талай ивкIссар. Ганан туркнал хIаписарнал чингу дуллуну диркIссар. Закул ссурахъухъ: «Ина му политикагу къаритича, Стамбуллайн лавгун, дуклан ухху», – куссар. Ганал чагъарду чивчуссар цанма кIулсса туркнал хIаписартурахъ Курдин кумаг бара тIий.

Курдигу Батумрайн лавгун, Закул дуснал Иззат-бейнал кумаграйну Стамбуллайн лавгссар, «Сирия» тIисса жамилийгу щяивкIун. Стамбуллай га най унува къамул увссар учительтал хIадур байсса «Дар ул-муаьллин» тIисса колледжравун. Ца шинаву га увхссар Стамбуллал университетравун, ганил тарихийну–литературийсса факультетравун Стамбуллай дуклай унува Курди зий ивкIун ур литературалул давурттахагу. Ганал оьрус мазрая турк мазрайн таржума буллан ивкIун ур Лев Толстойл хаварду, «ХIажи-Мурад» тIисса повесть, М.Ю. Лермонтовлул «Мцыри» тIисса поэма. Миннул ганан чан-къансса арцу дайсса диркIун дур. Гиккува 1919-ку шинал чивчун бур Курди Закуевлул «Хъявринсса ччаву» тIисса повестьгу.

1921-ку шинал сентябрь зуруй Курди Закуев увкIун ур махъунай лавайсса даражалул дипломгу лавсун. Ганийгу чивчуну бивкIун бур турк мазрай: «Ва цалчинмур даражалул диплом буллуссар Дагъусттаннайсса

Гъази-Гъумучиял шяравасса АхІмад Каради ХІажи-МахІаммад огълы Закуевлун ванал хъинну ххуйну Оттоманнал университет къртал баврихлу».

УвкІун Бакуйн Курди зун ивкІссар педтехникумраву. Ца шинава – Азирбижаннал университетраву. Азирбижаннал элмурдал академия сакин бувкун (1944), философиялул институтраву К. Закуевлул чирчуссар «Из истории философских и психологических учений IX-XI вв. на Ближнем Востоке» тІисса докторшиврул диссертация. 1947-ку шинай ганая хъуссар философиялул элмурдал доктор, 1949-ку шинай – профессор. Курди Закуев увчІуссар Азирбижаннал элмурдал академиялул член-корреспондентну. Ганал чирчуссар оьрус мазрай ва азирбижан мазрай тамансса монографияртту, статьярдун. Ганал чІяруми давуртту хас дурну дур тарихран, философиялун, педагогикалун ва психологиялун.

Курди Закуев ивкІуссар 1968-ку шинал, увччуссар бусравсса инсантал буччайсса хІатталлив Бакуй.

Чичул биографиялушал кІул бувну махъ, бучІайссар «Бюхттулнинмай» тІисса назму лахъхъаврин.

Курди Закуев назмурду чичлан айивхъуну ур революция хъуннинма. Бусайссар оьрчІахъ курди Закуев га назмулия тІий ивкІмуния: «1914-ку шинал гъинттул Гъумук Гъарун Саэдов бакІчину вечер дурссия. Вечерданий кІа шинал Гъаруннул чивчусса «Къалайчитал» тІисса пьеса сценалий бивхъуссия, шеърирду, назмурду дурккуссия, балайрду увкуссия. КІа вечерданул организатортурая цагу наяв. Вечерданий дуккин «Бюхттулнинмай» тІисса назму чирчуссия»<sup>1</sup>.

Га назмулуву шаэр шикаятрай ур:

Цайминнал ватаннай гъи дайдирахъунни,

Жула зунттавусса ва ци замгъарди?

Жува бакъацири чаннайн бувккунни,

<sup>1</sup> Закухъал Курди. Жямсса чичрурду. МахІачкъала, 1974.

Ххюнхху тий шанайнма жува бунува.<sup>1</sup>

Бусайссар шаэр овтгий ивкшиву лакрайн чант куну бизияра, оьрчру дуккин буллалияра, мактабру титлати, элмурду лахьлахьи тий. Назмулийну шаэр лакрал агьалинайн дуккаврийн, чаннайн букваврийн овтгий ур.

Назму учительнал цалагу дурккун, оьрчлахьгу дуккин буну махь бучиссар назму ххал дигьин, гивусса мазрал пасихшиврул ярагьру лякьин.

Бурганну назмулул цалчинмур куплетрах:  
 Кьумашиву цирвав вай жула зунттал,  
 Хьхьичун дирчусса куц махрунну бакру?!  
 Шикаят циривав Кьуйсу аьтарттул,  
 Хьхьу-кьини кьакуну гур-гур тутисса.

Ва куплетраву рух дакьасса зунттурду, нех шаэрнал рух дусса кунна чалачи дурну дур: «зунттурду кьуману, бакру хьхьичун дирчун», «Кьуйсу аьтара шикаят буллай». Дакнин бутайссар оьрчашал рух дакьасса, маз кьакулсса затру, рух дусса затруну ккаккан даврийн, гай сагьсса кунна кьуццу тий чалачи даврийн олицетворение учайсса бушиву. Олицетворение вайннал 6-мур классраву лархьхьуну диркиссар. Шикку шаэрнал цала назму олицетворенилийну дурну, чюлу дурну дур.

Ягу:

Цайминнал ватаннай гьи дайдирхьунни,  
 Жула зунттавусса ва ци замгьарди?  
 Жува бакьацири чаннайн бувккунни,  
 Ххюнхху тий шанайнма жува бунува.

Ва куплетраву ца затрал ягу иширал, тагьарданул лишанну цачу дирхьуну, цаннийхчин цамур дурчин дуллай ур шаэр. Масала, «цайминнал ватаннай гьи дайдирхьунни, жула зунттавусса ва ци

---

<sup>1</sup> Закухьал Курди. Жямсса чичрурду. Махлчкьала, 1974.



замгъарди?» – шаэр вай ххуттардийну чІалачІи буллаи ур та чІумалсса жула зунттал халкъуннал дуккаврия, элмулуя, ххуйсса оьрмулуя цичІав хавар бакъа «ххюнхху тІий шанайнма» бушиву. Шикку шаэрнал метафора ишла дурну дур. Метафоралул затру ягу хъанахъисса иш-тагъар гайннуха лашин дусса цайми затирттайхчІин, хъанахъисса иширттайхчІин ккаккан дайссар. Яла лякъинну оьрчІащал цаймигу метафорарду ишла дурсса кІанттурду:

Тти чІунни жувагу чантІ куну бизан,  
Жуйрасса къункьуллив ппив дурну дичин.

Дунъял чанна дайсса, элмулул баргъ-барз,  
Жухвагу бурувгун, пиш тІун бивкІунни.  
ЦІан дарчунни ххиллай бургъил чанная,  
Пикри буллаи, хІучІ тІий бацІан циванни.

Жунмагу бияхъур ччай инсантал хъун,  
ЦІупар тІий, къув-аьс тІий, чялиш хъананну.  
Хъит куну, ша ласлай, хъхъичІунмай хъунну,  
Ххулла оьккир куну, вас-ццах къатІунну.

Яла ххал бигъайссар оьрчІащал кІай метафорарттайну шаэр ци учин ччай ивкІссарив.

Суаллану оьрчІан кІулмур жям бувну махъ, шардай бучІиссар назму пасихІну, дюхханну дуккин дулун ва назмулувусса мазрал пасихІшиврул ярагъру лякъин ва гай бувчІин бан лахъхъин.

## АПАННИ КЪАПИЕВ

(1909–1944)

### «Интуристнашалсса ихтилат» («Шаэр» тIисса повестьравасса бутIа)

Машгъурсса Дагъусттаннал чичу, таржумачи ва критик Апанни Къапиев увссар 1909-ку шинал Гъумук арцул усттар Мансурдул кулпатраву. Мансур лагайсса ивкIссар хIалтIилий Ухссавнил Кавказнавун. Вайми хIалтIухъантурал цала кулпат шаппа къабитайни, Мансурдулмур кулпат ганащал цащала куч хъанай бивкIун бур. Буттащал кIани-кIанттайх увксса Апаннинал хъинну ххуйну лавхъхъуссар оьрус, къумукъ, турк мазру. Дуклангу га увхссар оьрус школалийн.

1928-ку шинал Щурагъсса дянивсса даражалул школагу къуртал бувну, Апанни лавгссар къумукънал Ахъсай тIисса хъуннасса шяравун оьрус мазрал дарсру дихълан. Ца шинава га гичча лавгссар махъунай Щурагъун, цаппара хIаллайсса зий ивкIссар рабфакрай. Рабфак – рабочий факультет учайсса бивкIссар зузалтран ва хъузалтран институтравун буххан бигъа баншиврул тIивтIусса школардайн. Апанни Къапиев зий ивкIун ур къумукъ мазрайсса газетрайгума.

1929-ку шинал А. Къапиев увхссар Ленинградский машиностроительный институтравун, амма къашавай хъуну, ганан институт къабитан багъссар. МахIачкъалалий га зий ивкIссар ххуллурдал техникумраву, газет-журналлал редакциярдай, луттирду итабакъайсса идаралий.

1931-ку шинал А. Къапиев увчIуссар Дагъусттаннал чичултрал ассоциациялул (ДАПП-рал) жаваб дулайсса секретарьну. Гания махъ Къапиевлул хъуннасса даву дурссар Дагъусттаннал чичулт цацIун бан, гайннал произведенияртту оьрус мазрайн таржума бан, 1934-ку шинал Дагъусттаннал чичултрал союз сакин дурукун, га увчIуссар ганил жаваб дулайсса секретарьну. Гай шиннардий ганал итабавкъссар оьрус мазрай

«Дагъусттаннал шаэртал» (1932) тІисса назмурдал жуж, «Дагъусттан» тІисса антология (1934), «Штурм» тІисса журнал (1933).

Амма Къапиевлул душмантал чІяву хьуну, 1935-ку шинал ганан Пятигорскалийн изан багъссар. Гикку га комсомолданул итабакъайсса газетрай зий ивкІссар. Мува чІумал га таржума буллай ивкІссар Ухссавнил Кавказуллал балайрду, Батирайл, МахІмудлул, С. Стальскийл, ХІ. Цадассал, А. Гъапуровлул назмурду. Зунттал агъалинал пикри-хияллу, аьдатру, хасиятру, мазру, мазрал къяйдарду ххуйну кІулсса, шаэрнал пагьму лавайсса Къапиевлуца оьрус мазрайн цила багъайкун таржума бан зунттал чичултрал произведенияртту. Ганал гай бивщуссар лавай кІицІ лавгсса луттирдаву ва гайннуяр махъ итабавкъсса цайминнуву: «Поэты Советского Дагестана» 1936, «Песни горцев» 1939, «Резьба по камню» (1940).

Буттал кІанттул цІанийсса дяьвилул шиннардий Апанни Къапиев лавгссар цува хушрай фронтрайн «Дагестанская правда» газетрал корреспондент хІисаврай. Фронтрай га зий ивкІссар оьруснал чичу Семён Бабаевскийщал «За Родину!» тІисса газетрай. Ганал гикку чирчуссар очеркру. Ганал «Фронтрал очеркру» бивщуссар 1944-ку шинал.

А. Къапиев ивкІуссар Пятигорскалий 1944-кусса шинал лякълуй операция бувну махъ. ЧІявусса ганал хияллу ливчІуссар щаллу къавхьунува.

Цала произведенияртту А. Къапиевлул чичайсса бивкІссар оьрус мазрай. Так ца «Дайдихьу» тІисса насрулийсса назму дур ганал лакку мазрай чирчуну (рирщуссар 1932-ку шинал «Инкьилабрал шаттирду» тІисса жужраву). Ганал «Хадий» тІисса къумукъ мазрай чивчусса хавар бивщуну бур къумукънал антологиялуву 30-ку шиннардийва.

А. къапиевлул агъаммур произведенияну хъанай бур «Шаэр» («Поэт») тІисса новеллардая сакин бувсса лу. Ганиву щаллу дурну дур шаэр Сулайманнул сипат, ккаккан бувну бур ганал оьрму. Цала луттирдай

хъхъичІмукъуву Къапиев чичлай ур: «Луттираву цичІав личІисса ишру хъанай бакъассар. Авторнал цала хъхъичІ бартбигъин захІматсса масала бивхъуну буссар: шаэрнайхчІин ккаккан бан оърмулул проза, га нанисса куц ва гъарца къини хъанахъимунил дахханашиву. ЛяличІиссаннуя къасттана арх уцлай ва мудан хъунабакълакъимур бакъа ккаккан къабуллай (чичун мури яла жапамур), автор хІарачатрай ур шаэр цува ккаккан аврияр, тарих лахъисса зунттал агъалинал рухІ ганаву дурчІин, революция хъуну махъсса багъу-бизулул гъанулий га ххал дигъин»<sup>1</sup>.

Чичул ва масъала усттарну щаллу бувну бур. Луттираву жула хъхъичІ ацІлай ур хІакъсса зунттал чув, ккаккан дурну дур Совет хІукуматрал зунттал халкъуннал оърмулуву дурсса дахханашивуртту.

Сулайманнул сипат щаллу дурну дур луттирал байбихъулийва. Га ур ккурттулуву, чурчарисса къяпагу бивхъуну, Сулайманнул яру бур хъунисса, някІсса, лажин дур мурхъирдал къавкъсса чІапІуха лархъхъуну цІанну ттурусса, мунияту дахъва чял хъусса ганал чІири марххала кунма кІялану чІалай бур. Шаэрнал каруннихъ дур кутІасса, кІура дарсса кІюйгу дусса аьсав.

Сулайман ур шаэр ва хъудугъу. Луттираву му магъирну ккаккан бувну бур. «Поэзиялуясса ихтилат» тІисса новеллалуву Сулайманнул ихтилат бур шаэрнал зумуну чІюлусса, циву оърмулул дарсеру гъарзасса, аькълу бусса. Сулайман цала ихтилатраву чІявуну ишла буллай ур лашанбавуртту, символлу, метафорарду. Вана учала кунна аькълу бусса калима: «Бусласиманал дугъайссар, вичІидирхъуманал ттихІайссар». Шикку ихтилат хъуниха зузавриха лашан бувну бур, ца ур хъу дугълай, гама – ттихІлай. Лашан баву: «Шаэр булбул куна сахаватлуну икІан аьркинссар»; метафора: «БакІрачІан бувкІцириннул гъиву дур ттул дакІниву лухІисса къюмайтІутІи кунна. Га щаралархъун хъамаран дизлай

---

<sup>1</sup> Капиев Эффенди. Избранное: В 2 томах. Т. 1. Махачкала, 1971. 9 с.

дур. Ганил ялун на къус икІаннина гива нанисса къункьал ттул обьтту щаращи буллай бур».

Амма Сулайман мудана чІюлу мукъурттийну гьалгъа тІий акъар. «КІяласса шагъру» тІисса новеллалуву Сулайман ккаккан увну ур цахъра дагъани дула куну, га кІичІираву зана дурсса жагъилнайн къаччан бивкІун. Ганал махъругу, ссихІ къадуклакавугу, ва ца ниттийн ххавхсса чІиви обрчІал куннасса дур. Амма ихтилатраву шиккугу ца-ца мяъна куртІсса махъругу личай. Жагъилсса шаэрнащалсса гьалгъалуву ганал цаппара дарсру дирхъунни. Шаэрнал пагъму, тІий ур Сулайман, цийва цуппар ялун личайсса («Неххал цинмасса ххуллу цилар ласайсса»), ганан чил махъру тикрал буллан къабучІиссар. Ганал льякъин аьркинссар цалами. Шаэр икІан аьркинссар гъарзад кІулсса гъарца инсаннал хІакъираву пикри бан бюхъайсса.

Шаэрнал обрмулия, ганачІансса тІалавшиннардая бур «Обрмулул чани» тІисса новелла. Обрмулул чани – му бур ХІабиблун макІра ккавказса кІива бургъил (ххяххабургъил ва лагабургъил) чани.

КІива баргъ – ми бур символлу. Ца баргъ – ххяххабаргъ, му бур цІусса чІумул жагъилшиву, лагабаргъ бур шаэрнал хъунав шаву.

Москавлий Сулайман ивну ур цала обрмулул бакІуйн. Ганахасса аякъагу, ганан буллайсса хІурматгу лавайри. Сулайман Москавлий ккаккан улланнингу чичу ур шаэршиврул тема куртІ дуллай. Сулайманнул калимардава бувчІлай бур шаэрнан аьркиншиву пагъму, магъиршиву, амма ми гъарзадраяр хъхъичІ ганал назмурду дакІниву загъир хъуну дикІан багълай бур.

Шаэр ур обществалул, жяматрал къуллугъчи. Цала къуллугъ багъайкун биттур булланшиврул шаэрнан аьркинни тархъаншиву.

Шаэрнал сипат яргну чІаланшиврул, А. Къапиевлул гъарта-гъарзану ишла дурну дур авторнал сипат. Цаппара новелларду ганал чирчуну дур цала, чичул, цІанияту. «Одиссея» тІимур новелла дур Сулайманнул цІания

чирчуну, ганал автобиография кунма. Цаппара новеллардаву ккаккан увну ур ХАбиб тИсса Сулайманнул дус. Буккун кьакІулли, ганал сиппат цукунсса дуссарив, га ци даврий уссарив, ганал ци кулпат буссарив. Га ур авторнал кІану бугъайссар инсан. «Поэзиялуясса ихтилат», «КІяласса шагъру», «Оърмулул чани» тИсса новелларду чирчуну дур ХАбиблуду цІанияту, ганал иттах ур чичу Сулайманнух уруглай.

«Шаэр» тИсса лу сакин бувну бур новеллардая. Новеллардугу чивчуну бур личІи-личІисса кьайдардай. Ласурча «Оърмулул чани», гиву ишла бувну бур чІявусса мазрал пасихІшиврул ярагъру: Москавуллахасса санна, Сулайманнуясса хаварду, ХАбиблуду таптардал чІапІив, макъаларду, диалогру.

«Шаэр» тИсса луттираву чІявур символлу: багъ, чарван, кьундалул авлахъ, Багъдад. Гайннуву чичу ур оърмулул суратру шашлай шаэрнал ххуллу яргну чІалачІи буллай. Багъ бур шаэрнал буттал улчагу, ганал поэзиягу. Багъдад бур Совет хІукуматрал тІивтІусса буллугърал лишан. Чарван – шаэрнал оърмулул ххуллул лишан. Кьундалул авлахъ хъхъичІазаманнул кьанатсса оърмулул лишан.

А. Къапиевлуду усттарну ишла дурну дур «мукъра» тИсса аьдадгу: мукъва далил, мукъра дарс, кьатлул мукъва мурцІу, дунияллул мукъва чул, мукъра чІун (инт, гъи, ссут, кІи). Чичул ци дунугу ца ябацІансса зат ларсун, ганийхчІин чІявусса мяьнарду, ишру аьлтту буллай ур. Масала, «Поэзиялуясса ихтилат» тИсса новеллалуву чичул ккаккан бувну бур бургъил мукъмурцІу. Сулайман игъалагайсса кьатлуву га мукъмурцІулуду гьарзад даххана дуллай дур. Ганилла чІалачІи дуллай дур нанисса чІунгу.

А. Къапиевлуду ишла дуллай ур цала чичрурдаву репликарду ва ремаркарду (бувчІинбавуртту).

«Шаэр» тИсса лу чивчуну бур Сулайман Стальскийл оърму гьанулун лавсун. Амма А. Къапиевлуду луттиравусса Сулайман ва С. Стальский цава ца инсанни учин кьабучІир. Къапиевлуду цала виричунал сипат щаллу

дурну дур цаймигу аьшукьтал, шаэртал ххал бивгьуну, миннан аьмсса хасиятру чІалачІи дурну.

Арулчинмур классраву оьрчІащал лахьлай бур «Шаэр» тІисса луттиравасса «Интуристнащалсса ихтилат» ва «Къуват» тІисса парчри.

А. Къапиевлул биографиялушал оьрчІру кІул хьуну махь, «Интуристнащалсса ихтилат» тІисса бутІа лахьлан хьхьичІсса мукьуву бусайссар ва бутІуву гьалгьа бушиву Дагъусттаннал халкъуннал шаэр С. Стальскийту. Ва оьрчІан хьхьичІ ацІан ан бигьану бикІаншиврул бучІиссар учительнан ляркъуну оьрчІал хьхьичІ лахьан С. Стальскийл портрет. С. Стальскийл портретру дурну диркІссар А.И. Августовичлул, М.-А. Джемаллул, Аскар-Сарыджал. Аскар Сарыджал 1937-ку шинал дурну дур С. Стальскийл портрет. Портрет дан художникнан дакІнин багьну бур С. Стальскийщал Кисловодскалий хьунаавкъун махь. Шаэр ва портретрай щаллу увну уссар цала халкъуннал янналуву. Ххуйну хьунссия «Интуристнащалсса ихтилат» тІисса бутІа лахьлахьини Аскар Сарыджал дурмур портрет ишла дарча.

Бусайссар оьрчІах, С. Стальский машгьурсса шаэр хьуну ухьурчагу, мунал цала оьрму ва лаххия даххана къадуршиву, яхьанай ивкІшиву цува увсса шяраву ва ялун урувгун цала шяравуминная ссалчІав личІисса къаивкІшиву.

Бусайссар мукунма кІа портретрай куна хьхьичІ ацІлацІи увну ушиву «Интуристнащалсса ихтилат» тІисса бутІуву чІалачІи увсса халкъуннал шаэр: «Ттун цІанакул кунма чІалай бур га чІумалсса Сулейманнул къалип. КичІру бувккун, аьч бувсса къужлул ккурттулул дарвачгу, ччаннай лархсса, шарда щаршсса ппалул жулардугу, ширванну дурсса никирайн хьхьарчуну ссюрхь рирщусса кагу, яларай дурургун гьаваллаву зурчІай тІутІисса бартканил кІисригу...»<sup>1</sup> Портрет ххал диргьуну махь, учительнал бусайссар ва бутІул кутІасса мурад. БутІа хьунмасса бакъашиврийн бувну,

---

<sup>1</sup> Лакрал литература. 7 класс. МахІачкъала, 2008. С. 73.

бучИссар буклаки бан классравува. Бувккун махъ, чIун духъурча вара дарсирай, дакъахъурча хъиривмур дарсирай бучИссар хъирив лаян А. къапиевлул Сулайманнул хасият-табиат чIалачИ дан ишла бувсса мазрах, пасихIшиврул ярагъунних. Масала, «Ганал хIарачат бувну бия, хавар бакъулий вагондалуву бакIрайн багъсса хъамитайпа цаятува инжит къахъуншиврул, гиву къалиян къаучин».<sup>1</sup> Ванийну жунма чIалай бур халкъуннал шаэр лагма-ялттуминнах пикри бакъасса акъашиву.

Бурганну шаэрнал интуристнащалсса ихтилатрах: «Мунахъ уча, – увкуна ахиргу Сулайманнул, ганзухгу къаурувгун, ганал чулухуннай так бакIрал ишан дуллай, – мунахъ буси, цалчин на колхозник ушиву. БувчIуририв? КIилчингу, ина мунахъ буси на оърмулул угъарасса инсан ушиву. Шамилчингу, ина мунагъ буси, цуксса ци тIийнугу, на халкъуннал шаэр ушиву. ЧIивисса унугу, хъунасса унугу, му мунал иш бакъар, – простойсса шаэрди уча. Мукъилчингу, ина му цамур паччахIлугъраятусса инсаннахъ уча шикку мунал паччахIлугъ дакъашиву, душиву ттул паччахIлугъ! Ургулакъай да, ци тIий урив? Амма ччай бухъурча, цува лахъуча ялувмур полкалийн, на шикку щяикIантIиссара!» Ванал ихтилатрайну бувчIлай бур шаэр пахрулий ушиву цува колхозник, халкъуннал шаэр ушиврия акъа, цува ва паччахIлугъраясса ушиврия. Ганан цува паччахIлугърал заллуну чIалай ур, цамур паччахIлугъраясса инсаннал цува куклу-кутIа ангу ацIлай акъар.

Произведение ххал бивгъуну махъ лавхъхъумур жям баву мурадрай бучИссар суаллал кумаграйну:

1. Интуристнащал С. Стальскийл ихтилат ци сававну хъуну бур?
2. Интуристнащал гъалгъа тIутIийни шаэр ссая пахрулий ур?
3. Интуристнахъхъун Сулейманнул дуллусса жаваб зун цукун дизай?

Шаппай ва бутIул мурад бусан ва шаэрнал сипат щаллу дуллалисса кIанттурду луттирал мазрачIан гъанну бусан булайссар.

---

<sup>1</sup> Лакрал литература. 7 класс. МахIачкъала, 2008. С. 72.



## МУХІУТТИН ЧАРИНОВ

(1893–1937)

### «Лакку кІану»

«Лакку кІану» тІисса назму лахьланнин хьхьичІ, учительнал оьрчІру дус бан аьркинссар М. Чариновлул оьрмулушал ва ганал дурмунишал.

М. Чариновлул «Ххалав» тІисса произведениялушал оьрчІру ряххулчинмур классраву кІул хьуссар, кІул хьуссар мукунма ганал биографиялушал.

М. Чариновлул «Ххалав» тІисса произведениялушал оьрчІру ряххулчинмур классраву кІул хьуссар, кІул хьуссар мукунма ганал биографиялушал. Ва дарсирай бучІиссар ганал биографиялушал цахьий гьарза-гьартану кІул бан.

МухІуттин Чаринов увну ур Лаккуй ХьурукІуннал шяраву хьудугьу МахІаммадлул кулпатраву.

Чивинийва МухІуттин тарбия уллай бивкІун бур диндалух шавкъ дуну, амма ганаву дунявийсса дуккаврихсса ччаву ххув хьуну дур, цувагу циняннан ххирасса, мунияту ттјонгъану яуллалисса оьрчІ ивкІун ур. ХьурукІрав къурандалий ивтун махъ, га дуккин гъан увну ур Гъумукун, яла, 1906-ку шинал, Щурагъсса реальный училищалувун. Училищалуву М. Чаринов дус хьуну ур Гъ. Саэдовлушал. Та чІумух бурувгун, МухІуттиннул ларайсса дуккаву дурну дур.

Революциялул ва граждан дяьвилул чІумал Чаринов кумаг буллай ивкІиссар «Илчи» газетран. 1919-ку шинал М. Чариновлул итабавкъссар «ХІавиват ва ХІажияв» тІисса пьеса. Га чІярусса шиннардий сценалий бивхьуссар Лакрал драматический театрданул. Ганала чивчуссар «Шумайсат», «Шагъалай» тІисса драмартту, ганияр махьгу оьрус мазрай «Зунттал тІутІив», «ЦІуртти къалешайссар» ва «Оьрмулул кІюрх» тІисса луттирду. 1962-ку шинал бувккуссар «Язи бувгьуми» тІисса лу, 1934-ку шинал СССР-данул чичултрал Союзрал член хьуссар. Гара шинала

МухІуттин Чаринов гьуртту хьуссар Дагьусттаннал чичултрал Цалчинсса съездрай. ИвкІуссар 43 шинал оьрмулуву.

«Лакку кІану» тІисса назму лахьланнин оьрчІахь бусайссар ва лакрал миллатрал гимн куннасса назму душиву. Ва назмулуву шаэр дакІнихтуну чІалачІи дуллай ушиву цала ватандалухсса ччаву. Назму лахьлан хьхьичІ бучІиссар оьрчІру вичІидишин бан М. Чариновлул мукьурттийсса «Лакку кІану» тІисса балайлух (магнитофондалувух итабавкъуну).

Яла бучІиссар балай буккин учительнан цанма оьрчІан бюхханну.

Назму дурккуну махь, бучІиссар оьрчІал ябурган бан шаэр лакку кІану цуксса мискинсса бунугу, цанма цуксса ххирасса буссарив чІалачІи бувсса куццух:

Агь, ттул буттал кІануй, Лакку билаят,  
Жул цинянналагу аьзизсса нинуй!  
Ци неьмат бунугу чил билаятрай,  
Гьич ина къабитан жуца къашара!

Шаэр аьтІий ур буттал билаятрал къянатшиврий. Га буслай ур лакрал цуксса захІмат бишайссарив чивух маэшат буллан:

Дукралуя къукьлай, шануя къукьлай,  
Чурххал цІуллушиву хІисав къадурну.  
Хьхьу къинилин дуллай, даврий гьа дурну,  
Шаппасса кулпатран дуланмагь дайсса.

Шаэрнал цала буттал кІану лащан буллай ур дунияллийсса яла ххуйми шагьрурдаха:

ХьхьичІва-хьхьичІ ссихІ лавсьсса гьава нацІуссар,  
Вил гьава шарабну жун чІалан бикІай,  
Берлиннай, Парижлив жува бунугу,  
ДакІмур мудан вичІан кІункІу тІун дикІай.

Агь, ттул буттал кІануй, Лакку билаят,

Вил къянатшивулий аьтгий икIара,  
 Янил аькълулийну диван кьукъайнал  
 Дагъусттаннал Париж Гъумучи бур чай.

БучIиссар оьрчIал я бурган бан шаэрнал буттал кIанттул тIабиаьтрал  
 сурат чIалачIи дурсса куццух:

Ци шагърурду, багъру кьатIув бунугу,  
 Вил щархъурду, мащив хъама къаритай,  
 Ци арду, майданну лагма бунугу,  
 Вил муруллив, ххяллу къаритан къашай.

Зунттурдив, ратI-ккутIру, щамарал хъачIру,  
 Дарардавух нани жиндрал хьу нехру,  
 Бюхттул барзунттайсса кIяла марххалтту,  
 Дунъяллул неъматрах жу къабулару.

Бусайссар оьрчIахъ вана укун цала Лакку Биляятрахсса, Буттал  
 кIанттухсса ччаву цала назмулийну чIалачIи дуршиву лакрал чичу М.  
 Чариновлул.

Яла бусайссар оьрчIахъ Лакку кIанттухасса назмурду душиву жула  
 лакрал чIявуми шаэртурал: Гъ. Саэдовлул, С. Габиевлул, Ю. Хаппалаевлул,  
 М.-З. Аминовлул, М. МахIаммадовлул, С. Къурбановал ва м.ц.

Бусайссар лакрал чичу ва революционер С. Габиев хьинну аьсивну  
 ивкIшиву цала оьрму буттал кIанай бутан къавхьуну тIий. ДакIнин  
 бутайссар оьрчIан цала ряххулчинмур классраву лархьхьуну диркIсса  
 «Аманат» тIисса назму. Цала назмулуву шаэр аманат буллай ур, цува  
 гъурбатрай ивчIарча Лаккуй уччара тIий:

Ца аманатри зухъ, лакрал жагьилтал,  
 Нажагъ гъурбатрай ттун бивкIу булурча,

Ттул гъаривсса нурчІи ласунмур бара,  
ДакІнин ччи зунттаву къакъурув дуччин.

Хъуннех чІалачІиний, АхІилу гъанний,  
ВацІилу ххал шайний, Гъумук шагърулий,  
Ялун бувкІ зулмурду ялтту къявхъ тІиний,  
Душманнащал биян цив сакин шайний.

Бусайссар мукунма, халкъуннал мунал аманат биттур бувшиву,  
Ттуплислия лавсун му Гъумук увччуну ушиву.

БучІиссар дуккин оърчІащал мунала «Аьйб мадари» тІисса назмугу:

Аьйб мадари, ччисса буттал кІанттурдив  
ЗучІатува ччяни левххун лавгун тІий.  
Аьйб мадари зугу, щюлли барзунттив,  
Зуюту гъурватрай на арх хьуну тІий.  
КІюрххил лавай ивзун, чани ххал хьукун

ХъхьичІра-хъхьичІ зул сурат ттун чІалан дикІай.

Ттунма хавар бакъа зухух лавгукун,  
Хъюхъу тІий иттату макъ цирда дачай.  
Ялтту бучІу ттуя, аьзизсса миллат,  
Зуха дансса даву къадурнна лирчІри,  
Душмантал сававрай гъурватрайн агъну,  
Жан дакъа зун дулун цичІар къалирчІри.

Укун дюххансса, цала ватандалухсса ччаву чІалачІи дуллалисса дур  
С. Габиевлул творчество.

Бусайссар оърчІахъ чичултран ва шаэртуран дакъассагу цинявгу  
лакран цивппа лявхъусса кІану ххирашиву. Лаккуй бушиву ва бивкІшиву  
къучагъсса, аькълу бусса, итххявхсса, щилчІав хъхьичІ ник къарищайсса,  
цала аьрщи чІиринугу, халкъ чаннугу, тачІав ялун бувкІсса душмантурайн

икрам къабувну, цала тархъаншиврухлу цивппа талан хІадурну бивкІсса ва бусса халкъ.

Яла лавхъхъумур жям баву мурадрай оърчІахъ тетрадирттай чичин байссар ватандалун хас бувсса учалартту:

1. Гъарцаннан лявхъу кІану Багъдадри;
2. Гъурватрай чурх гъели къалагайссар.
3. Дусшиву цІакъсса духъурча Ватангу цІакъссар.
4. Мурхъхъиран – мархха, инсаннан Ватан дакъа чара бакъассар.

М. Чариновлул чивчусса «Лакку кІану» тІисса назму шардай дакІних лахъхъин дулайссар.

**МАХІАММАД-ЗАГЪИД АМИНОВ**  
**(1938–1994)**

**«Бархъаллахасса балай», «Ттула Гъумук шагърулий»,  
«Аьрав Маннархъал Мусай»**

М.-З. Аминовлул произведениярду лахъланнин дуклаки оьрчІру шаэрнал кутІасса биографиялушал кІул байссар.

Лакрал шаэр, чичу, литературовед, журналист М.-З. Аминов увну ур 1938-кусса шинал Ккуллал райондалий Хъусрациял шяраву.

Дуклай ивкІун ур ДГУ-рал физико-математический факультетраву, 1965-кусса шинал къуртал бувну бур М. Горькийл цІанийсса Литературный институт. Зий ивкІун ур учительну Лавациял ва ЧІарадиял районнай. Зий ивкІссар редакторну Дагъусттаннал луттирду итабакъай идаралий, хъунама редакторну «Дусшиву» альманахрай, Чичултрал союзрал председателънал заместительну.

ХъхъичІва-хъхъичІ ганал итабавкъуссар «Ттул нину» тІисса поэма. Халкъуннал мазралун ххуй чулий багъну бур М.-З. Аминовлул итабавкъусса «Щюллисса марч», «Яла ххирамур», «КІира хъа» ва м.ц. луттирду. «Ттул мандолина», «Рутанну цІусса чІапІи», «Чабувкру, читІри» тІисса оьрчІансса луттирду.

Оьрус мазрай итабавкъуссар «Яблоко», «Эхо родных ущелий», «Искра из камня», «Помнишь ли ты», «Звёзды в кармане» тІисса луттирду.

ЧІявусса миллатирттал мазурдийн таржума бувну бур ванал чивчусса назмурду ва хаварду. Ванал цалагу оьрус мазрайн таржума бувну бур лакрал ва цайми миллатирттал фольклорданул бикІу чичулт-шаэртурал бикІу произведенияртту.

Ванал оьрмулушал оьрчІру кІул бувну махъ, бусайссар шаэрнан хъинну ххирасса бивкІшиву цала миллат, цала буттал кІану ва миннун хас бувну чичлай ивкІшиву назмурду, поэмарду. Бусайссар ва классраву

цивпа кІул хьунтІишиву «Бархъаллахасса балай», «Ттула Гъумук шагърулий», «Аврав, Маннархъал Мусай» тІисса назмурдашал.

«Бархъаллахасса балай» тІисса назму лахъланнин хъхъичІ бусайссар Ахъушиял райондалий душиву лак флапар хъанахъисса мукъра шяравалу: Бархъал, Хъюл, Уручул, ЦІалякъян.

Бусайссар Бархъарав бушиву захІмат ххирасса шаэрнал тІийкун «ларсун ччаннала аьрши, мусил къукъурду байсса» халкъ, миннал даврин къимат бишлай бушиву так жула республикалий, хІукуматрай бакъа, дазул къатІувгу, оьрмулукун ми цала канил захІматрайну дуланмагъ дуллай бивкІшиву.

Махъсса ппурттуву, хІукуматрай дахханашиннарду хъуну махъ, миннал дурсса давуртту чанну дакъа хъунадакълай дакъар, бюхъайссар оьрчІан къакІулну бикІан тІахІнидувултрал байсса урхъригу, кучригу, къюнарттугу цукунсса бикІайссарив. Мунияту ххуйну хъунссия «Бархъаллахасса балай» лахълахъисса дарсирайн вайннал тІахІунттив ларсун ккаккан дарча оьрчІан.

Назму лахъхъаву оьрчІан бигъа хъунссия Оь. Оьмаровлул чирчусса «Балхарки» тІисса триптих ляркъуну, мунишал оьрчІру кІул барча, му бакъассагу жула художниктурал ХІасан ва ХІусайн Сунгъуровхъал хъунмасса хІарачат бувну бур бархъаллал хъаннил усттаршиву чІалачІи дан, оьккину къахъунссия миннал суратругу учительнаща ляркъин бюхъарча.

Назму учительнал цала дуккин хъхъичІ оьрчІащал дувайссар мукъурттищалсса даву, яла назму учительнал пасихІну дуккайссар цала, хъириг дуклаки байссар оьрчІру.

ОьрчІан назмулуя бувчІумур жям баву мурадрай бучІиссар булун суаллу:

1. Бархъаллал бур тІахІни дувайсса пиша, жула лакрал цайми щархъурдал буссарив цанма хасъсса пишарду?

2. Назмулуву цукунсса халкъну ккаккан бувну бур Бархъал?

3. Зул шяраву ци пишалул агьлу бур?

Шардай назму пасихІну дуккин дулайссар ва маслихІат байссар цала шаппаминнахъ цІуххин бархъаллал цала тахІунттив цукун даххайсса диркІссарив.

«Ттула Гъумук шагърулий» тІисса назмулушал оърчІру кІул баннин бусайссар чІявуми шаэртурал цала творчествалуву буттал кІанттухсса ччаву ккаккан дурну душиву. Лавай кІицІ лавгсса куццуй цала миллатрая, лакку кІанттуя, мунил тарихрия пахрулий ушиву М.-З. Аминовгу. Цала «Ттула Гъумук шагърулий» тІисса назмулуву шаэр ушиву Гъумучи шяравалу дакъа шагъру кунма чІалачІи буллай, ганал Гъумучи лащан буллай ушиву Парижраха, Багдадраха, Москавуллаха. Шиву шаэрнал ччавулий ккаккан бувну бушиву цІувцІу чарил къатри дурсса ххаллилсса усттарталгу, чил билаятрал чапхунчитал ялун ххявхний миннал лув бацІан бюхъайсса виртталгу, щалагу Ухссавнил Кавказнаву цІа дурксса Гъумучиял базаргу. Хъамабивтун бакъар шаэрнан мусил кару дусса усттарталгу, Гъумучиял «ккуркки дагъани – бяргу», замзамраха лащан бувну бур къуллагу.

Яла бучІиссар оърчІан захІмат бизан кунмасса махъру доскалий ягу тетрадирттай чичин бувну, гай бувчІин бан.

Цалчинсса буккаву пасихІну, оърчІан бюхханну цала учительнал дайссар, хъирив буклаки байссар оърчІахъ.

Яла оърчІащал ххал бигъайссар назмулувусса пасихІшиврул ярагъру (лащан баву, метафора, гипербола, эпитет).

ОърчІан кІулмур жям баву мурадрай бучІиссар дакІнин бутан М. Чариновлул чивчусса «Лакку кІану» тІисса балайгу. Ххал бигъин бучІиссар вай кІирагу назмулувусса аьммур. Лавхъхъумур цІакъ байсса суаллал кумаграйну:

1. Цукунсса пишардал заллухъру бивкІун Гъумучи?



2. Цана яхьуну буссарив шаэрнал цала назмулуну чІалачІи бувсса бяргу, кьуллагу?

3. Зун ци кІулли Гъумучиял аьлимтурая, устартурая?

Шаппай балай пасихІну буккин булайссар.

«Аврав Маннархъал Мусай!» тІисса назму хас дурну дур лакку чувнан, космонавтанан Муса Маннаровлун.

Назму лахьлан хьхьичІ бусайссар оьрчІахь Гъухъалиятусса лаккучу Муса Маннаров левххун ивкІшиву космосравун 1987 шинал ва му кІий ивкІшиву щаллуксса шиначІан диявайсса чІумуй. Бусайссар Мусал цала гьунарданийну лакрал миллат бакъа, щала Дагъусттангу машгьур бувшиву.

Муса Маннаровлуха га чІумал чирчуну дур чІярусса назмурду. Ми чирчуну дур лакрал шаэртурал дакъа, цайми миллатирттал шаэртуралгу.

«Аврав Маннархъал Мусай» тІисса назму чирчуну ур М.-З. Аминовлул Муса космосрава зана ивкІсса чІумал, ванала чирчун диркІссар «Ххуллухъин баннав, Муса» тІисса назму га дахьва левхсса чІумалгу. Ва назму балайлий учайссар Лариса ХІажиевалгу, ххуйну хьунтІиссар учитель дарсирайн космонавтрал суратращал ва ганан хас бувсса балайрдал кассеталущал учІарча.

Балайлух вичІи дирхьуну махь, бучІиссар назму учительнан цанна пасихІну дуккин, яла оьрчІащал дурккуну ххал дигьин.

БувчІин бан бучІиссар оьрчІан бувчІин захІматсса махьру: ссавдакъу, лахІза, зарзала, ялгъузсса, хІалтІилий.

Шардай назму пасихІну дуккин ва луттирайсса суаллан жаваб дулун лахьхьин булайссар.

## Аьбдул Оьмаршаев

(1903–1935)

### «ХIухIалал балай»

«ХIухIалал балай» тIисса назму лахьланнин хьхьичI оьрчIахь бусайссар Аь. Оьмаршаев лакрал совет литературалул гьану бивзминнаясса ца ивкIшиву. Ганал оьрмулул хьуну дур дурагу 33 шин, му чIавасса оьрмулий мунал итабавкъун бур 10 лу. ОьрчIан хас бувну ганал чивчуну бур «Кьасим», «ХIухчу Рамазан», «Гьарив ва Загьир» тIисса хаварду.

«ХIухIалал балай» тIисса назму лакрал буккултран чьянира кIулссар, лакрал школардавугу чьянияцIа лахьлай буссар. Мукун лахьисса оьрмулий га назму халкъуннан ххирашиврул савав ца дуссар дакIнин асар хьунсса куццуй пасихIсса ва хьудугьул захIмат яргну чIалачIи буллалисса дунутIий. Бусайссар хьхьичIава хьу дугьлай, ттихIлай бивкIсса халкъуннал бусравсса захIматрая, хIухIалтрал цала къурду ласун банну тIий бивкIсса ххаллилсса балайрдая, ва назмугу хьудугьу бюхттул уллалисса назмуну хьанахьишиврия.

Назму дурчIинну, пасихIну дурккуну махь, ганил гьарца ххуттал мяьна дурчIин дайссар.

ХIухIала тIисса мукьул мяьна дур куртIсса: му та чIумал хIурмат бусса махь бур. Лакку мазраву хьуниха, ххалаха зузисса инсантурал дуллалисса давурттаха лархьхьуну цания-ца пишалул куннасса цIарду дур. (ГьайтIала – хьу гьай учайма; чIучIалт – хьу цIинцIал урттуцIа марцI дайма; хIухIала – хьу ттихIайсса инсантурал даврил цIа; цулуцала – ххулув буллалисса инсан; ххилаххала – къав, ххулув буллалисса инсан, м.ц.).

ХIухIалал цала даврил дайдихьу дуллай ур зунзул чаннахьра, даврил лябукку хьунмасса бикIаншиврул, га шания изайхтува хьувнай ур, урттуйх риртсса хьхьемай лажин дислай ур. Чанна цIуку букканнин, ганияр хьхьичI ивзун хьув уккаврия хьунмасса пахру буллай ур. КIилчин ажартташал

хъхъуниву ивзун, ссалу дугъайсса хъу ттихІлай ур, цала даврия дазу-зума дакъа рязийну ур, пахрулий ур. Шаэрнал назмулуву ишла дуллай ур лашанбавуртту:

Тти ххуйсса гъавалул къункъайн ссунтІа тІий,  
Ав був аслан куна, игъалаганна.

Даврил эбрат цайминнангу ккаккан дуллалисса хІухІала баявур буллай, дащуй бихълай ур тамбалтал, кІяла кару, чанна цІукугу ккаккан ччяни бизан къашайми:

Шанайнмари бусса захІмат къабувулт,  
МахІрумну цив ливчІун, вин якъавщуну.

КІа хІухІала пахру буллай ур цала кІюрх хъунадакълай уну тІий, цала кІюрххилсса къурув канай уну тІий, яла шаллусса къинигу даву дан махъ личІан дуллай унутІий (ганан зунсса чІун хъуннасса ччай дур).

Назмулул ахирданий шаэрнал ялун личин дуллай ур хІухІалал цала даврихсса хъуннасса ччаву. Ганал захІмат дакІ ххари дуллалисса, гъавас ххибан хасъсса хІухІалал балайгума тІутІисса бушиву тасттикъ буллай ур. Назму сакин дурну дур чанна цІукухъсса ихтилатрал, кІанийнсса оьвчаврил журалий:

Миннатри, цІукуй, вихъ, ца чансса бацІу,  
Мирхъирдах вичІилий, макъант дурцусса.  
Барчаллагъ, гъан ччарча, бахълагу, насу,  
Гъунттийгу кІюрххицІун хъунабакъинну.

Назмулул хъирив лаллалени, оьрчІал ябурган байссар шивусса пасихІшиврул ярагъунних: эпитетиртта, лашанбавуртта, метафорартта:

ЦІуну хъяку тІутІун чурхгу лавхъхъуну,  
Дукралух ва шанух ишттахІгу хъуну,  
Ширхну игъалаглай дакІнил шадшиврул.  
Ххарисса хІухІалал балай учинна...

Мазрал пасихІшиврул ярагъру ххалбивгъуну махъ, учительнан бучІиссар буккин балай оърчІан бюхханну пасихІну. Яла бусайссар оърчІахъ ва балайгу, хъхъичІва жува лавхъхъусса «Яла кымат лаваймур» тІисса произведениялун гъансса бушиву. Бусайссар оърчІахъ цІана гъарзад урттун ххяххан диртун дунугу, хъхъичІава инсантурал хъуруннай буллай бивкІсса захІматрая, ччатІ ххяххан баву мурадрай колхозру, совхозру цукунсса давуртту дуллай бивкІссарив.

Шардайсса даву дулуннин хъхъичІ га назму дюхханну, асар хъунну дуккайссар, яла дуклаки байссар оърчІахъ.

Хъиривсса дарсирайнин назму дакІних лахъхъин дулайссар.

## НУРАТТИН ЮСУПОВ

(1931–2000)

### «КІул акъасса солдатнаясса баллада»

Ва произведение оьрчІан лахъхъин булланнин хъхъичІ кутІасса ихтилат байссар машгъурсса оьрчІансса чичу Нураттин Юсуповлул оьрмулуя ва дурмуния.

Лакрал шаэр Нураттин Юсупов бюхъай лакрал чичултраву яла машгъурману ккалли ан. Ганал оьрчІан чивчусса произведениярттан багъайсса къимат бивщуну бур хъунисса шаэртурал: Корней Чуковскийл, Сергей Михалковлул, Лев Кассиллул, Агния Бартол, Владимир Берестовлул. Ганал мюрщи оьрчІан чивчусса луттирдал тиражру дур миллионнайсса.

Н. Юсупов увссар Лакрал райондалийсса КІулушацІрал шяраву къалайчишивугу кІулсса хъудугъу Абакардул кулпатраву. 1948-ку шинал ганал къуртал бувссар Гъумучиял педучилище, 1952-ку шинал С. Стальскийл цІанийсса пединститутрал тарихийсса факультет. 1956-кусса шинал Н. Юсупов къамул увссар СССР-данул Чичултрал союзравун.

Гания махъгу га ур дуклай, цала кІулшиву куртІ дуллай. Москавлив ганал къуртал бувну бур 1960-ку шинал А.М. Горькийл цІанийсса Литературалул институтравусса Лавайми литературалул курсру, 1962-ку шинал – СССР-данул Кинематографистурал союзрал бачин бувсса Лавайми сценариярдал курсру.

Нураттин зий ивкІун ур Дагъусттаннал радиокомитетрай, «Дусшиву» альманахрал редакторну, Дагъусттаннал Чичултрал союзраву консультантну, жаваб дулайсса секретарьну, Правлениялул председателънал заместительну.

Гай давурттай зузисса чІумал Нураттиннул цацава бюхъаймур бувссар жагъилсса чичултран кумаг бан, гай тІайла бацІан бан, лашанми произведенияртту къаитабакъин.

Цала творчестволуву Н. Юсупов айивхьуну ур хьуни дакъасса назмурду чичаврия. Чичлайгу айивхьуну ур жагьилнийва. Цала хьхьичІва-хьхьичІсса назмурдал жуж – «Нитгиясса махъ» – ганал итабавкъуну бур 1955-кусса шинал. Гания махъ бувкссар тамансса жужру цаймигу.

Н. Юсупов шала союзрайх, шала Аьрасатнавух машгьур увссар оьрчІан хас дурсса назмурдал. Ганаща бювхьуссар оьрчІансса поэзиялуву лайкъсса кІану бувгьуну, га цІулаган бан, цала произведениярттаву мюрщисса оьрчІал психология, хияллу, пикри-зикри, хасиятру, тІул-тІабиаьт, тІуркІурду хьинну тІайлану ккаккан бан.

Мюрщими буккултрансса произведениярттаву Юсуповлул ишла дуллай ур ххуйсса сюжет, пиш чин ансса хьярч, аькьлу бусса махъ, оьрчІал ххуйсса тІул. Гайннуву шаэр ур оьрчІан захІмат бангу, виричушиврийн хьит чингу, хьинмунил хьхьичІ дакІ тІитІингу, оьккимур ва ххуймур кунния ку личІи бангу лахьхьин буллай, оьрчІру бюхъавай тІайлану тарбия бан кумаг буллай. Ганал назмурдавусса мюрщи вирттал цивпагу ккаккан бувну бур оьрмулуву бикІайсса куццуй.

Чичул дурмуния бувсун махъ бучІайссар «КІул акъасса солдатнаясса балладалуйн». Бусайссар кІа баллада оьрус мазрайнгу таржума бувну, личІи-личІисса сборникирттай бивщуну, шала союзрайсса буккултран кІулсса машгьурсса произведение бушиву.

БувчІин байссар баллада ссайн учайссарив – га халкъуннан хьинбала баврил цІаний цала жан харж дурсса, виричусса инсанная бусласисса, щаллусса мяьна дусса, хьун дакъасса назму душиву.

Дарс дайдишайссар Буттал кІанттул цІанийсса хьунмасса дяьвилул шиннардий жула халкъуннал дурсса дяьвилул ва захІматрал къучагьшивурттая бусаврийну. Яла бучІиссар оьрчІащал вичІи дишин Ф. Графченкол оьрус мазрай буклакисса кассеталух ва Н. Юсуповлул цала лакку мазрай ва баллада буклакисса кассеталух. Вай кассетарду бувххун

буссар 2001-ку шинал итабавкъусса литературно-художественный фонохрестоматиялувун.

Учительнал цала назму дуклакини, оърчІан бувчІин байссар балладалул куплетирттал мяъна:

Ружокрал чІу лагъба

Чансса, пионер!

Шагу лагъну гъаз ба

Чансса, пионер!

Циняннал муданма хІурмат бан буржссар Буттал кІанттул цІанийсса дяъвилува цала жанну дуллусса, цІарду кІулсса ва къакІулсса солдатнал, гайннан цІа куну дацІан дурсса гъайкалал. Мунихлуну, гайннал дурсса виричушивурттая бикІу, гайннал ядурсса ватандалул хІурматран бикІу дуклаки оърчІал гай дакІнин бичлай, гайннал аьпа тІий, ружокрал ва ччаннал чІурду лагъ буллай бур.

ДикІуча ва оърчІал организациялул оърмулува ишла хъанахъисса, укунсса иширттаву дуручлачисса ца ххаллилсса аьдатну, бувача гайннал кІу-къакІулсса бикІу, кІулсса бикІу саллатІнал хІурмат гъарца мудангу.

Назмудул кІилчинмур бутІува шаэрнал оърчІан бувчІинсса, дакІурдивун бюххансса, простойсса, амма мяъналул агъамшиврул дазу рищун къашайсса мазрайну буслай ур дяъвилул дайдихъулия ахирданийн бияннин Совет саллатІнал бивтсса хъинну захІматсса, амма цала дунияллун кІулсса къучагъсса ххуллуя кІул акъасса саллатІнал сипатрайну чІалачІи бувну бур жула Ватандалийсса чІявусса миллатирттал вакилтал, гайннал къадарданул бардулт.

КІилчинмур бутІул ахирданий шаэр дуручлай ур паракъатсса, ххишала дяъви къахъуннав тІисса заманалул тІалавшиннарду.

Шамулчинмур бутІуяту бувчІин буллалини, учительнал бусарча хъинссар цала шяраватусса, гайннал ливчІсса мачча-гъанная. Баллада бучІиссар пасихІну буккин цанма учительнан яла буккин бан оърчІахъ.

Дарсирал ахирданий оърчлшчал балладалия кІулмур жям буллалисса даву дайссар. Шардай бучІиссар дулун укунсса даву: та дяввилий жанну харж дурсса цала шяраватусса вирттаврая хьуниминнахь цІуххин ва цанма кІул хьумур хьиривсса дарсирай бусан.

КІилчинмур дарс кІира журалий сакин дан бюхълай бур. Цалчин вирттаврал гъайкалданучІан экскурсия бувну, гиккува дарс дишин.

КІилчинмур жура – дяввилул ветераннайнгу оьвкуну классиравурасса кьучагъшиврул дарс. Цумур журалул дарс дихълай ухьурчагу, учитель ва оърчІру кІайннуйн ххуйну хІадур хьун аьркинссар.

Бусанну миннуяту.

Вирттаврал гъайкалданучІан бувкІун оърчІал буккайссар. «КІул акъасса саллатІнаясса баллада», учайссар цаймигу вирттавран хас бувсса балайрду.

Ва дарсирай учительнал бусайссар фашистьтурашалсса дяввилия кутІану, яла бусайссар гъайкалданий цІарду чирчуминная, шяравусса дяввилул ветерантурал дурмуния, гайннал ларсьсса дяввилул орденная ва медаллая.

Ва дарсирайнсса хІадуршин дайссар баллада лахъланнин ччянира. Дарсирайн уцлацисса дяввилул ветераннан булун хІадур байссар ганал цІагу чирчусса лу, ягу ганахь барчаллагь тІутІисса открытка, тІутІал кацІ.

Дарс дихълахьисса учительнал оърчІахь кутІану бусайссар Буттал кІанттул цІанийсса Хьунмасса дяввилия, ганиву гьуртту хьушиву хІакьину, цачІана увкІсса пулан-касгу. Булайссар махь ветераннахьхьун. Га кьуртал хьуну махь дуклаки оърчІал щаллу байссар цала хІадур бувсса балайрду, буккайссар совет саллатІнаясса назмурду.

Классрал чІирттай лархьун дикІан аьркинссар армиялун хас дурсса суратирттая дурсса стендру, дяввилул ветерантурал цІарду, суратру.

Дарсирал ахирданий цанния ца оърчІал дяввилул ветераннан бахшиш байссар цала хІадур бувсса лу ва ганал хьхьичІ махь булайссар



ххуйну дуклан, тарбия хъанан ва саллатИнал дурсса виричушиврия эбрат ласлан, дяъвирдай ливтIуминнал цIарду хъамакъадитан.

Хъиривсса дарсирай оьрчIахъ буккин ягу бусан байссар дяъвирдайн лавгсса цала мачча-гъанная, шяравучувтурая цала чивчумур ва кIул бувмур. ОьрчIахъхъун шардайсса даву дулайссар «Дяъвилул ветеран» тIисса темалия цала дартIусса материаллайн бувну сочинение чичин.

Гайннун кыматру бишайссар дуккин бувну ягу дартIуну ххал дурну махъ. Укун сакин дурсса дарсирдал оьрчIру ватан ххирану тарбия бан хъунмасса кумаг байссар.

## АЪРКИН ДУРССА НАУЧНО-МЕТОДИЧЕСКИЙ ЛИТЕРАТУРА

### Лакку мазрайсса

1. Ахмедов С.Х. Лакрал литературалул тарих. I том. МахIачкъала, 2001.
2. Ахмедов С.Х. Лакрал литературалул тарих. II том. МахIачкъала, 2006.
3. Аминов М.-З. Лакрал мукъуясса махъ. МахIачкъала, 1995.
4. АхIмадов С.Х., Хъассиев А.Ю. Дагъусттаннал литература (педучилищалунсса учебник). МахIачкъала, 1992.
5. Халилов Х.М. ПартIу ПатIима. МахIачкъала: Дагъучпедгиз, 1972.
6. Парту Патима: народный эпос / На лак. яз., рус. яз. – МахIачкъала: ИД «Эпоха», 2010. (Сер. «Величие души»)
7. Магъдиева Ф.М. Мукъулчинмур классраву лакрал литература лахъхъаву. МахIачкъала, 1984.
8. Магъдиева Ф.М. Лакрал литературалул дарсирдай халкъуннал дакIнихсса творчество лахъхъаву. МахIачкъала, 1990.
9. Лакрал литературалул учебникру.

### Оьрус мазрайсса

1. Ахмедов С.Х. О современной лакской литературе. Махачкала: Дагкнигоиздат, 1975.
2. Ахмедов С.Х. На путях развития дагестанской проза. Махачкала: Дагкнигоиздат, 1975.
3. Ахмедов С.Х. Социально-нравственные ориентиры дагестанской прозы. Махачкала: Дагкнигоиздат, 1990.
4. Аминов М.-З. Тенденция развития дагестанского стихосложения. Махачкала: Дагкнигоиздат, 1974.
5. Акимов К.Х. Вопросы методики преподавания дагестанской литературы в IV-XI классах с русским языком обучения. Махачкала: Дагучпедгиз, 1981.

6. Гусейнаев А.Г., Кассиев Э.Ю. Очерки лакской советской литературы. Махачкала: ДФАН, 1964.
7. Голубков В.В. Методика преподавания литературы в средней школе. М.: Учпедгиз, 1995.
8. Дагестанская литература во взаимодействии с литературами народов СССР. Махачкала: ДФАН, 1985.
9. Дагестанские лирики. Л.: Советский писатель, 1961.
10. Дагестанская народная проза. Сборник. Махачкала: ДФАН, 1979.
11. Методика преподавания литературы. Под редакцией З.Ф. Резь. М.: Просвещение, 1985.
12. Мещерякова Н.Я. Нравственное воспитание на уроках литературы. М.: Просвещение, 1975.
13. Никольский В.А. Методика преподавания литературы в средней школе. М.: Просвещение, 1991.
14. Карпов П.К. Выразительное чтение дагестанской литературе. Махачкала: Дагучпедгиз, 1989.
15. Колокольцев Н.В., Владимиров Е.Д., Русина Н.С. Методическое руководство к хрестоматии русской литературы для 7 класса национальных школ. М.: Просвещение, 1988.
16. Зепалова Т.С., Мещерякова Н.Я. Методическое руководство к учебнику-хрестоматии «Родная литература для 7 класса». М.: Просвещение, 1999.
17. Поэтика художественного текста на уроках литературы: Сб. ст. / Отв. ред. О.Ю. Богданова. – М.: 1997.
18. Беленький Г.И. Методическое руководство к учебнику-хрестоматии «Родная литература для 7 класса». М.: Просвещение, 1986.
19. Мальцева К.В., Бакеева М.М. Методическое руководство к учебной хрестоматии «Русская литература для 7 класса национальных школ». Л.: Просвещение, 1985.